

యోహాను సుబుమ్ కబుర్ యోహాను రెగిడ్లి సుబుమ్ కబుర్

యేసుక్రీస్తు కొన్సొ

1 * మొదొల్ తెంతొ కి దేముడుచి †కోడు తిలో. కిచ్చొ జెర్మున్ నెంజిలి పొది తెంతొ కి జా కోడు దేముడు తెన్ తిలో. జా కోడుయి దేముడు జా తిలో. ‡ 2 జొయ్యి కిచ్చొ నెంజిలి జా పొది దేముడు తెన్ తిలో. ఎత్తి జోచి అత్తి కల్లుప జలి. 3 తిలిసి ఎత్తి జో నెంజితె జెర్మున్ జయె నాయ్. 4 జోచితె జివు తిలి, జా జివు మాన్సుల్క ఉజిడి జా అస్సె. 5 జా ఉజిడి అందర్తె ఉజిడి దెతె అస్సె గని అందర్ జా ఉజిడిక చినన్క నెత్తిరయ్కి.

6 దేముడు తెద్రయ్తికయ్, ఏక్ మాన్సు బార్ జలన్. జోవయించి నావ్ యోహాను. 7 జో సాచి సంగుక అయ్లన్. ఎత్తిజిన్ క్రీస్తుక నంపజా పాపుమ్ తెంతొ రచ్చించుప జతు మెన, 'దొర్కు జలి * ఉజిడి యేసుక్రీస్తుయి' మెన సాచి సంగుక అయ్లన్. 8 యోహాను, జలె, జా ఉజిడి నెంజె, గని 'క్రీస్తుయి దొర్కు జలి జా ఉజిడి' మెన సాచి సంగుక అయ్లన్. 9 ఈంజ లోకుమ్తె జెర్మిత ఎత్తి మాన్సుక ఉజిడి దెతి నిజుమ్ జలి ఉజిడి ఈంజ లోకుమ్తె జెతె అస్సె.

* 1:1 1:1 నముద్రుమ్ బుయి లోకుముల్ కిచ్చొయ్ నెంజిలి పొది † 1:1 1:1 మెలె, ఎక్కిలోచి పెట్టి తిలిసి జోవయించి కోడుతె కిసి చినుక జయెదె గే, దస్సె, ఎత్తి అదికారుమ్ తిలో దేముడు కిసా అస్సె గే చినుక జలె, యేసుక్రీస్తుక దెకుక. వడ్డె, ఎత్తి అదికారుమ్ తిలో దేముడుచి పెట్టి తిలిసి యేసుక్రీస్తుచి అత్తి జర్గు జయెదె. ‡ 1:1 1:1 'ప్రబు' మెలె కిచ్చొ అర్దుమ్ తయెదె మెలె, ఎత్తిక ఏలువ కెర్తొ దేముడు, ఎత్తి అదికారుమ్ తిలో దేముడు. దేముడు అబ్బొన్క కి దేముడు పుత్తున్క కి 'ప్రబు' మెనుల. బయ్బిల్చి ఈంజ నాటతె ముక్కిమ్క క్రీస్తుకయ్ 'ప్రబు' మెనుల. § 1:5 1:5 ఈంజ లోకుమ్చి పాపుమ్ ఆమన్ అందర్ రితి జలెకి, ఉజిడక అందర్ కిసి విజవుక నెత్తె గే, క్రీస్తుచి నత్తిమ్చి ఉప్పిరి పాపుమ్ జినుక నెత్తె. * 1:7 1:7 సత్తిమ్, నెక్తి.

10 జలె, ఈంజ లోకుమ్తె జో తిలో. ఈంజ లోకుమ్ జోచి అత్తి జెర్మున్ జలి, గని ఈంజ లోకుమ్చ మాన్సుల్ జోక చినితి నాయ్. 11 జోచి సొంత గేర్చి మాన్సుల్తె జో అయ్లన్, గని జోచి సొంత మాన్సుల్ జోక ఒప్పన్తి నాయ్, నంపజతి నాయ్. 12 దస్సి జలి పొది సగుమ్జిన్ జోక ఒప్పన బెదవన నంపజా గెల. జోవయింకయి, జలె, 'తెదొడి తెంతో దేముడుచ బోదల్ తుమ్ జలదు' మెన సెలవ్ దిలన్. 13 జోచ బోదల్ జతి జెర్మున్, జలె, కేన్ సెకుమ్తె జెర్మిలి రిసా జర్గు జలిసి నెంజె, కేన్ తేర్చి మున్సుసి ఆగ్గక ఆనచి రిసా జెర్మున్ జలిసి నెంజె. ఈంజ దేముడుచి దయచి రిసా జోచి అత్తున్కె దిలి రిసాచి జెర్మిలన.

14 జలె, దేముడుచి కోడు ఈంజ లోకుమ్తె మాన్సు జా జెర్మున్ జా అమ్ మాన్సుల్ తెన్ బెద జిలన్. పూర్తి దయ, పూర్తి సత్తిమ్ తా అమ్చి తెన్ జిలన్, చి జోచి పరలోకుమ్చి ఉజడి దెకిల్ రితి జలమ్, చి 'దేముడు తెంతో అయ్లో దేముడుచో ఎక్కి పుత్తుసి ఈంజోయి' మెన అమ్క నిజుమి రుజ్జు అయ్లి. 15 జోచి రిసా " 'అంచి కంట పడ్డె జెతోసా అంచి కంట వెల్లో. కిచ్చొక మెలె, అంచి కంట జో అగ్గెయ్ తిలోసా' మెన ఇన్నెచి రిసాయి సంగిలయ్" మెన యోహాను సాచి జా కేక్ గల సాట్ట కెర్తె తిలో.

16 జోచి ఎదివాట్ బెర్తుతె తిలి దయ తెంతో అమ్ ఎత్కిజిన్ దయ పడ్డె దయ పాయ అస్సుమ్. 17 మోసే పూర్గుమ్చోచి అత్తి దేముడుచ ఆగ్గుల్ అగ్గె తెంతో అమ్క దా అస్సె, గని దేముడుచి దయ, నిజుమ్ యేసుక్రీస్తుచి అత్తి దొర్కు జలి. 18 కేన్ మాన్సుకి కెయ్యకి దేముడుక దెకిత్ నాయ్. మాన్సు జోక దస్సె దెకుక నెంజితయ్. జాకయ్, జోచి పక్కయ్ తిలో దేముడుచో ఎక్కి పుత్తుసి, ఈంజ లోకుమ్తె జెర్మ అమ్చి తెన్ జియ, అబ్బొసి కిసాచో గే అమ్క దెకవ అస్సె, చి అబ్బొన్క దెకిల్ రితి జా అస్సుమ్.

బాప్తిసుమ్ దెతె తిలో యోహానుక పరిచ్చ కెర్రిసి
(మత్త 3:1-12; మార్కు 1:1-8; లూకా 3:1-9,15-17)

19 †యెరూసలేమ్ పట్టుమీచ ‡యూదుల్చ వెల్లెల మాన్సుల్ ‘తుయి కో?’ మెన పుసితి రిసా, జోవయించ పూజర్లుక చి దేముడుచి గుడిచి నేవ కెర్తి లేవీ పూర్ణమచొచి నెకుమచ మాన్సుల్ సగుమ్జిన్క బాప్తిసుమ్ దెతె తిలో యోహానుతె తెద్రయ్ల. 20 జేవ్ జోక ‘తుయి కో’ మెన పుసితికయ్, జో అబద్దుమ్ జయె నాయ్. జో కీసి సాచి జలో మెలె, “ఆవ్ క్రిస్తు నెంజి” మెన సత్తిమ్ ఒప్పున్లన్. 21 దస్సి ఒప్పున్తికయ్, “దస్సి జలె, దేముడుచ కబుర్లు సంగిలో ఏలీయా పూర్ణమచొ ఏక్ వేల జస్తె గే?” మెన పుసిల. పుసిలె, “నెంజి” మెన సంగిలన్, చి “దస్సి జలె, దేముడుచ కబుర్లు సంగుక జెంక తిలో జో అన్నెక్లో జస్తె గే?” మెన పుసిల, గని అన్నె “నెంజి” మెన యోహాను సంగిలన్. 22 జోక జేవ్ అన్నె, “దస్సి జలె, తుయి కొన్నో? అమ్క తెద్రయ్ల వెల్లెల మాన్సుల్క అమ్ సంగుక అస్సె. కొన్నో మెన తుయి సంగితసి?” మెన జో తెన్ పుసిల. 23 జో జోవయింక, “యెసయా పూర్ణమచొచి అత్తి దేముడు రెడ్డయ్లి ‘ప్రబు జెంక వాట్ సోగ కెర!’ మెన బయిలె ప్రదేసిమి కేక్ గల ప్రబుచి అవాడ్ ఆవ్. మెన రెడ్డ అస్సె, గెద. ఆవ్ ఎక్కి జో” మెన యోహాను సంగిలన్.

24 పిమ్మట్ యోహానుక జేవ్ పరిచ్చ కెర్లన, జలె, కీపరిసయ్యుల్ తెంతో జా అస్సి, 25 “తుయి క్రిస్తు నెంజిలె, ఏలీయా నెంజిలె, దేముడుచ కబుర్లు సంగిలో అన్నెక్లో కి నెంజిలె, తుక కిచ్చో అదికారుమ్ తయెదె, చి * బాప్తిసుమ్ దెతసి?” మెన జేవ్ పుసిల. 26 యోహాను,

† 1:19 1:19 యెరూసలేమ్ పట్టుమీతె ఎత్తి అదికారుమ్ తిలో దేముడుచి ఎక్కి దేముడుచి గుడి తయెదె. యూదుల్క జయి పట్టుమ్ ముక్కిమ్ జయెదె. ‡ 1:19 1:19 ‘యూదుల్’ మెలె, ‘అంచయ్ మాన్సుల్ జా అంకయ్ జోకర్లు’ మెన పూర్ణమ తెంతో ఎత్తి అదికారుమ్ తిలో దేముడు నిసాన్ల సైజల్. § 1:24 1:24 పరిసయ్యుల్ మెల పండితుల్, నద్దూకయ్యుల మెల పండితుల్, మోసే తెన్ దేముడు దిలి ఆగ్గుల్ సికడ్డన చి వెల్లెల పూజర్లు యూదుల్చి వెల్లి నబతె వెసుల. * 1:25 1:25 ‘బాప్తిసుమ్’ మెలె, ఎత్తి అదికారుమ్ తిలో దేముడు మాన్సుచి పాపుమ్ చెమించుప కెర్తి గుర్తుక కెర్తిసి. కీసి ఎక్కిలో బాప్తిసుమ్ నజనుక మెలె, “ఆవ్ పాపుమ్ నుదో” మెన జో మాన్సు ఒప్పున, పాపుమ్ దోయి జా గెతి గుర్తుక పానితె డుజ తా, అన్నె బార్ జంక. ఉవదెసిమ్ దెతోసా బాప్తిసుమ్ దెంక.

జలె, “ఆవ్ జలె, మాన్సుల్క పానితె బాప్తిసుమ్ దెతసి, గని తుమ్చి నెడిమి తుమ్ నేన్లొ ఎక్కిలో టీచ అస్సె. ²⁷ జో అంచి కంట పడ్డొ జెంక తిలొసా. జో అంచి పడ్డొ అయ్లె కి, జో కెద్ది ముక్కిమ్చొ మెలె, జోచ జోడ్లుచ వాలివొ యిపుక అంక విలువ నాయ్!” మెన జేవ్క ఇసి సంగిలన్. ²⁸ ఈంజ ఎత్తి యోర్దాను గాడుక తూర్పు పక్కచి ఒడ్డుతెచి బేతనియ మెలి ఏక్ టాన్తె జర్గు జలి.

పైజల్చి మొక్కి క్రీస్తుచి రిసా యోహాను సంగిలిసి

²⁹ అన్నెక్ దీసి, యేసు పాసి తతికయ్, యోహాను జోక దెక, “ఈంజ లోకుమ్చ చి పాపుమ్ వయ గెచ్చయ్తో అమ్చొ దేముడు దిలో మెండపిల్ల జలొసా ఓదె!” మెన సంగిలో. అన్నె, ³⁰ “ఇన్నెచి రిసాయి ఆవ్ సంగిలి, ‘జో అంచి పడ్డొ జెర్మిలెకి, అంచి కంట అగ్గయ్ తెంతో తిలొసా, చి రిసా అంచి కంట వెల్లో జయెదె’ మెలయ్. ³¹ ఈంజొ కొన్సొ గే ఆవ్ కి అగ్గ నేన్లయ్, గని ఆవ్ అయ్లిసి జోచి రిసాయి. †ఇస్రాయేలులు ఇన్నెక ‘అమ్చొ రచ్చిండుప కెర్తొసా’ మెన చినుతు మెన, పాపుమ్ జో గెచ్చయ్తి రిసా పానితె మాన్సుల్క బాప్తిసుమ్ దెతసి.”

³² తెదొడి యోహాను అన్నెకిచ్చొ సాచి సంగిలన్ మెలె, ‡“దేముడుచి సుద్ది తిలి ఆత్మ పార్వ పిట్టచి రితి జా, ఆగాసుమ్ తెంతో ఉత్ర జా, జోచి ఉపీర్ టీచిలిసి ఆవ్ దెకిలయ్. ³³ ఆవ్ జోక ‘జొయ్యి’ మెన నేన్లయ్. నేన్తయ్, గని పానితెచి బాప్తిసుమ్ ఆవ్ దెంక మెన అంక తెద్రయ్లో జో అమ్చొ దేముడు కిచ్చొ గుర్తు సంగ తిలొ మెలె, ‘అంచి ఆత్మ ఉత్ర జా ఎక్కిలోచి ఉప్పిర్ టీచెదె, కచి ఉప్పిరి ఉత్ర జా టీచెదె గే, అంచి పరలోకుమ్చి సుద్ది తిలి ఆత్మక జోక నంపజలనక జొయ్యి బాప్తిసుమ్ దా కెరెదె.’ ³⁴ జలె, జోక ‘దేముడుచొ పుత్తుసి ఈంజొయ్’ మెన ఆవ్

† **1:31 1:31** ‘ఇస్రాయేలులు’ మెలె, యూదుల్క అన్నెక్ నావ్ జయెదె. ‡ **1:32 1:32** ఎత్తి అదికారుమ్ తిలొ దేముడుచి సుద్ది తిలి ఆత్మక తెలుగు తెన్ నగుమ్తె ‘పరిశుద్ధాత్మ’ మెంతతి నెంజిలె ‘చెంగిల్ ఆత్మ’ మెంతతి.

రుజ్జు దెక అస్సి, సాచి జా అస్సి” మెన ఒత్త తిలసక యోహాను సాచి సంగిలన్.

యోహానుచ సిస్సుల్తె దొగుల యేసుచి పట్టి గెలిసి

35 అన్నెక్ దీసి, యోహాను జోచి దొగుల సిస్సుల్ తెన్ టీచ తతికయ్, 36 యేసు జా వాట్ ఇండ గెతె తతికయ్, యోహాను జోక దెక, “పాపుమ్ గెచ్చయ్తో దొర్కు జలి దేముడుచి మెండపిల్ల, ఓదె!” మెన సంగిలన్. 37 యోహానుచ జేవ్ దొగుల సిస్సుల్, జలె, నూన కెర, యేసుచి పట్టి గెచ్చుక దెర్ల.

38 జలె, యేసు పస్స, జేవ్ పట్టి జెతె తిలిసి దెక కెర, జోవయింక “కిచ్చొ చజితను?” మెన పుసిలన్, చి జేవ్ ‘గురుబాబు’ మెలి అర్దుమ్ తెన్ జోవయించి అరమయ్ బాస తెన్ “రబ్బీ” మెన సంగ, “కేనె బన జా అస్సిని?” మెన జోక పుసిల. 39 జో “జొమ్మ. జా, దెక” మెన సంగిలన్, చి జేవ్ జో తెన్ గెచ్చ, జో బన జలి టాన్ దెకిల. జలె, పాసి పాసి చెత్తర్ గంటల్ సంజె జలి రిసా, జా దీసి జేవ్ దొగుల యేసుతె తా గెల.

అంద్రెయ పేతురు మెలో అన్నొన్క యేసుతె బుకారా ఆన్సిసి

40 యోహానుచి జా కోడు సూన యేసుచి పట్టి గెల జేవ్ దొగులతె ఎక్కిలో అంద్రెయ మెలోసా జయెదె. జో కొన్సొ మెలె, సీమోను పేతురుచొ బావొసి. 41 జో జలె, అన్నెక్ దీసి వెందలె కిచ్చొ తొలితో కెర్లన్ మెలె, సీమోను మెలో జోచొ అన్నొన్క చజ కెర, “మెస్సయక జలె క్రీస్తుక చజ దెక అస్సుమ్!” మెన సంగిలన్. 42 ‘మెస్సయ’ మెన జా బాస తెన్ సంగిలె, గ్రీకు బాస తెన్ ‘క్రీస్తు’ మెలి అర్దుమ్ తయెదె. 42 దస్సి సంగ, సీమోనుక అంద్రెయ యేసుతె కడ ఆన్సొ. కడ ఆన్తికయ్, యేసు సీమోనుక చెంగిల్ దెక, “యోహాను మెలో ఎక్కిలోచొ సీమోను మెలో పుత్తుసి, తుయి. జలె, అప్పె తెంతొ తుక ‘కేపా’ మెన నావ్ తితసి”

§ 1:41 1:41 ‘క్రీస్తు’ మెలె, మెస్సయ మెలె, ‘దొర్కు జలె రచ్చొంచుప కెర్సొక తెర్దుయందె’ మెన ఎత్తి అదికారుమ్ తిలో దేముడు పూర్లుమ్ తెంతొ సంగ తిలోసా. అన్నె కిచ్చొ అర్దుమ్ తయెదె మెలె, ‘రాస’, ‘ఎత్తి అదికారుమ్ తిలో దేముడు ఏలువ కెరయ్లోసా’ మెలి అర్దుమ్.

మొన సంగిలన్. *‘కేషా’ మొన అరమయ్ బాస తెన్ సంగిలె, గ్రీకు బాస తెన్ ‘పేతురు’ జయెదె.

అన్నె దొగులక యేసు సిస్సుల్ కెరన్లసి

43 అన్నెక్ దీసి, గలిలయ ప్రాంతుమ్తె ఉట్ట గెచ్చిందె మొన యేసు ఉట్ట గెలన్. ఒత్త పాచె కెర, పిలిప్ మెలో ఎక్కిలోక చజ కెర, “అంచి పట్టి జా అంచొ సిస్సుడు జా” మొన, యేసు జోక బుకార్లన్. 44 పిలిప్ బేత్తయిదా పట్టుమ్చొ. అంద్రెయ పేతురు కి జయ్యి పట్టుమ్చ.

45 జలె, నతనియేలు మెలో ఎక్కిలోక పిలిప్ చజ కెర, “అమ్చొ, మోసే పూర్లుమ్చొచి అత్తి దేముడు రెగ్డయ్లి †ఆగ్గుల్తె, క్రీస్తుచి రిసా రెగిడ్లె, గెద. ‡అమ్చొ దేముడుచ కబుర్లు సంగిల పూర్లుమ్చ కి జోవయించి రిసా రెగిడ్లె, గెద. జలె, జో క్రీస్తుక అమ్ చజ అస్సుమ్. జో కొన్సొ మెలె, నజరేతు గఁవ్విచొ యోసేపుచొ యేసు మెలో వుత్తుసి. జొయ్యి” మొన నతనియేలుక సంగిలన్. 46 సంగిలె నతనియేలు అన్మానుమ్ జా “నజరేతు గఁవ్వి తెంతొ కిచ్చొ జలెకు చెంగిల్ తిలిసి బార్ జయెదె గే?” మొన పుసిలన్, గని పిలిప్ జోక “తుయి జా కెర, సాంత దెకు!” మొన జోక యేసుతె కడ ఆన్లొ.

47 జలె, నతనియేలు పాసి జెతె తతికయ్, యేసు జోక దెక జోచి రిసా “ఈందె, సత్తిమ్ తిలో ఇస్రాయేలుడు, ఈంజొ. ఇనాచితె కిచ్చొ ఉప్రమెన్సు నాయ్!” మొన సంగిలన్. 48 దస్సి సంగితికయ్, నతనియేలు ఆచారిమ్ జా “తుయి కీసా మాన్సుచి అంచి బుద్ది చినిలది?” మొన యేసుక పుసిలన్, చి యేసు జోక “పిలిప్ తుక

* 1:42 1:42 ‘కేషా’ మెలె, ‘పేతురు’ మెలె, ‘పత్తుర్’ మెలి అర్దుమ్ తయెదె. † 1:45 1:45 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెగ్డయ్లి ఆగ్గుల్ మొన అమ్ జానుమ్. ఈంజ కొణె ఎత్తి బైబిల్తె అగేచి పాచె పుస్తకుమ్తె రెగ్డయ్ జా అస్సె. ఈంజ దెకవుక మొన కుపియ బాసతె నొయి ప్రమానుమ్తె మోసే పూర్లుమ్చొచి అత్తి రెగిడ్లె దేముడుచ ఆగ్గుల్ మొన రెగ్డవ అస్సె. ‡ 1:45 1:45 ‘ఎత్తి అదికారుమ్ తిలో దేముడుచ కబుర్లు సంగిల పూర్లుమ్చ’ మెలె, ఎత్తి అదికారుమ్ తిలో దేముడు సగుమ్జన్చి పెత్తి జోచి ఆత్మ దా జోచ కబుర్లు సంగయ్లో, చి రెగ్డయ్లో. మెలె, జోచి ఆత్మ జోవయించి చొండి పుట్టవ జోచ కబుర్లు లట్టబణ్ణె, చి జోవయించి మెన్సుతె సికయతికయ్ రెగిడ్లె.

నే బుకార్తె అగ్గె, తుయి జో రూక్ మొదొలె వెన తిలి పొది తుక ఇన్నె తెంతో దెకిలయ్” మెన జబాబ్ దిలన్, చి 49 నతనియేలు జోక “గురుబాబు, దేముడుచి పెట్టిచొ దేముడు పుత్తుసి, తుయి! అమ్చ ఇస్రాయేలులుచొ రానొ, తుయి!” మెన సంగిలన్. 50 యేసు జోక “‘ఆవ్ తుక రూక్ మొదొలె దెకిలయ్’ మెన సంగిలి రిసా తుయి అంక నంప కెర్లది, గెద. ఇన్నెచి కంట అన్నె వెల్లెల కమొ దెకితె” మెన సంగ యేసు అన్నె, 51 “జలె, ఆవ్ తుక కిచ్చొ నిజుమి కచితుమ్ సంగితసి మెలె, పరలోకుమ్ ఉగ్గి జతిసి, చి ఆవ్ కీమాన్సు జా జెర్మున్ అయ్లోసాచి ఉప్పిరి దేముడుచి దూతల్ పరలోకుమ్తె వెగితిసి చి పరలోకుమ్ తెంతో ఉత్త జెతిసి దెకితె” మెన యేసు సంగిలన్.

2

పానిక యేసు ద్రాచ రస్సుమ్ కెర్లిసి

1 దొరతి గెతికయ్, గలిలయ ప్రాంతుమ్తెచి కానా మెంతి గెవ్వి ఏక్ పెండ్లి జలి. యేసుచి అయ్యసి ఒత్త జా పెండ్లితె అస్సె. 2 యేసుక, జోచ సిస్సుల్క కి పెండ్లితె బుకారా అస్తి.

3 జలె, పెండ్లి విందుతె అయ్లస పితి *ద్రాచ రస్సుమ్ ఎత్కి కేడ గెలి. యేసుచి అయ్యసి జోతె జా కెర, “విందుక అన్నె ద్రాచ రస్సుమ్ నాయ్” మెన సంగిలి. 4 యేసు జాక “అంచి తెన్ తుక కిచ్చొ కామ్, అయ? అంచి నమయుమ్ అప్పెక కి జెంక నేతయ్” మెన అయ్యన్క సంగిలన్. 5 తెదొడి అయ్యసి, జా గెర్చ గొత్తి సుదల్క “తుమ్ కెరుక మెన ఈంజొ కిచ్చొ సంగెదె గే, జయ్యి కెర” మెన సంగిలి.

§ 1:51 1:51 ‘మాన్సు జా జెర్మున్ అయ్లోసా’ మెన బయ్బిల్తె రెగ్గ తిలె, జేవ్చి అర్దుమ్ కిచ్చొ మెలె, ‘ఎత్కి అదికారుమ్ తిలొ దేముడు తెద్రయ్లో క్రిస్తు రచ్చించుప కెర్లొసా.’ పూర్గుమ్ తెంతో దస్సి మెన జోవయించి రిసా ప్రబుచ కబుర్లు సంగిలస రెగ్గిన్తె ‘మాన్సు జా జెర్మున్ జెంక తిలొసా’ మెన రెగ్గ తిలినచి అర్దుమ్ ఒగ్గర్ నదు కెర్ల యూదుల్ అర్దుమ్ కెరసుల, ఇస్సుమ్ తిలె. * 2:3 2:3 మాములుమ్ ద్రాచ రస్సుమ్ మెలె, ఓస్తు నే గలిలి ద్రాచ రస్సుమ్ జిర్గ నూరుచి రితి తియస తయెదె. ఒగ్గర్ పిలెకయ్ మచ్చుక జయెదె. పెండ్లివొతె యూదుల్ దస్సిచి పివుల.

6 జలె, ఒత్త పాని దెర్ల పత్తుర్ బానల్ సొవ్వు అస్తి. ఏక్ బానో, జలె, పుంజెక్ నెంజలె పుంజెక్ యాబయ్ కాయల్ పాని దెరెదె. ఇన బానల్తె పాని కిచ్చొక ఒత్త తయెదె మెలె, యూదుల్ సుద్ది కెరంత అలవాట్లు చి రిసా. 7 యేసు, జలె, కిచ్చొ కెర్లన్ మెలె, “తుమ్ ఈంజేవ్ బానల్తె బెర్తు పాని సుచ” మెన, కామ్ కెర్లసక సంగిలన్. సంగితికయ్, జేవ్ బానల్తె పాని బెరయ్ల. 8 తెదొడి జో “అప్పె, బానల్తె తిలిసి తుమ్ డుంబ కెర, విందు వంటితో మాన్సుతె నా దాస” మెన సంగిలన్, చి జోక నా దిల.

9 జలె, జా పాని ద్రాచ రస్సుమ్ మార్పుప జా అస్సె. ద్రాచ రస్సుమ్ మార్పుప జలి జా పానిచి రుసి జో విందు వంటితో మాన్సు చక దెకిలన్. జా ద్రాచ రస్సుమ్ కేనె తెంతో అయ్లి గే పాని డుంబిలసక ఎర్కె, గని విందు వంటితో మాన్సుక ఎర్కె నాయ్. తెదొడి జో, ఆచారిమ్ జా, †పెండ్లిబూలోక బుకారా కెర, జోక 10 “అమ్చి తెన్ ఇన విందుల్తె కో కి చెంగిలి రస్సుమ్ తొలితొ వంట దెవుల. మాన్సుల్ ఒగ్గర్ పిలి పడ్డొ, గర్చి రస్సుమ్ బార్ కెరుల. గని చెంగిల్చి ఆకర్క పితి రితి తుమ్ తియ తిలదు. కిసి?” మెన పుసిలన్.

11 గలిలయ ప్రాంతుమ్తెచి కానా మెంతి గవ్వి, యేసు ఈంజ వెల్లి కామ్ జర్గు కెర్లొ. జోవయింబి అదికారుమ్ దెకయ్త వెల్లెల కమొ ఎత్కితె ఈంజయి తొలితొ చి. జోచ సిస్సుల్ జోచి ఉప్పిరి నముకుమ్ తిల.

12 ఒత్త తెంతో యేసు, జోచి అయ్యసి, జోచ బావుడులు, సిస్సుల్, ఇదిల్ ఉత్తర పక్కచి కపెర్నహూమ్ పట్టుమ్తె ఉట్ట గెచ్చు, ఒత్త సగుమ్ దీసల్ తా గెల.

దేముడుచి గుడితె సామన్ వికితసక యేసు ఉదడ్డిసి

(మత్త 21:12-13; మార్కు 11:15-17; లూకా 19:45-46)

13 యూదుల్చి ‡పస్కా పండుగు పాసి అయ్లి. ఈంజ పండుగ్చి రిసా యెరూసలేమ్ పట్టుమ్తె యేసు ఉట్ట గెలన్. 14 జలె,

† 2:9 2:9 పెండ్లి ఉబెడొ ‡ 2:13 2:13 పూర్ణమ్ పొది యూదుల్ ఐగుప్తు దేసిమి తా గొతిమాన్సు జలిన్ తెంతొ ఎత్కి అదికారుమ్ తిలో దేముడు రచ్చించుప కెర్లిసి ఏద కెర్లి పండుగు, ఈంజ.

దేముడుచి గుడితె పెన కిచ్చొ దెకిలన్ మెలె, 'అర్పితల్క' మెన, బెయిలల్, గొర్రెలు, పార్వ పిట్టల్, దనచ వికుక బెర తిల మాన్సుల్క దెకిలన్. కీడబ్బుల్ పల్లయ్తనచి కామ్ కి దెకిలన్. 15 తెదొడి, వాలివొ తెన్ కొర్డ తెయార్ కెర, జేవ్ ఎత్తిజిన్క, సొమ్ముల్క, గొర్రెల్క, ఎత్తి, దేముడుచి గుడి తెంతో ఉదడ గెలన్, అన్నె డబ్బుల్ పల్లయ్తనచి డబ్బుల్ ఎత్తి విచ గెల కెర, జోవయించ బల్లల్ సేడవ దిలన్. 16 దస్సి కెర, పార్వ పిట్టల్ వికితనక ఇసి మెన సంగిలన్: "ఈంజేవ్ ఎత్తి బయిలె దెర గెచ్చు! అంచో దేముడు అబ్బొచొ గేర్క బియ్యార్ కెర్తి సంత రితి కెరుక జయె నాయ్!" మెన గోల కెర్లన్.

17 జో దస్సి కెర్తికయ్, దేముడు పూర్ణమ్ రెగ్గయ్లి ఏక్ కోడు యేసుచ సిన్సుల్ ఏదస్ట కెర్ల.

"తుచొ గేరు జతి దేముడుచి గుడి సుద్ది తా తుకయ్ తవుసు మెన అంచి జీవ్ డడ్డెదె"

మెన దేముడు రెగిడ్లి కోడు.

18 తెదొడి, దేముడుచి గుడిచ అదికారుల్ జల యూదుల్చ వెల్లెల మాన్సుల్ యేసుతె జా కెర, "తుయి అప్పె కెర్లి రితి కెరుక తుక కిచ్చొ అదికారుమ్? తుక అదికారుమ్ తిలె, అమ్క రుజ్జు దెకయ్తి రిసొ కిచ్చొ వెల్లి కామ్ కెర్తె?" మెన కోపుమ్ తెన్ సంగిల. 19 యేసు, జలె, జోవయింక కిచ్చొ జుబాబ్ దిలన్ మెలె, "ఈంజ దేముడుచి గుడి తుమ్ సేడవ గెల, చి తిర్రతి తెడి ఆవ్ అన్నె బందిందె" మెన సంగిలన్. 20 యూదుల్చ జేవ్ వెల్లెల మాన్సుల్ "అప్పెక ఈంజ దేముడుచి గుడి బందుక దొన్ని విసొ సొప్పు వెర్పుల్ దెర అస్సె. సేడయ్లెగిన, తుయి తిర్రత్క బందుక కిసి? నెతిర్ని!" మెన ఆసెల. 21 గని, 'దేముడుచి గుడి' మెన జో కిచ్చొ అర్దుమ్ తెన్ సంగిలన్ గే, జేవ్ వెల్లెల మాన్సుల్

§ 2:14 2:14 జోవయింక ఆక్రమించుప కెర్లి రోమ్ దేసిమ్చి ప్రబుతుమ్చి డబ్బుల్ దేముడుచి గుడితె దెంక నెంజె. జేక, జోవయించి డబ్బుల్ దేముడుచి గుడితె కామ్క జెతికయ్ రగుమ్ డబ్బుల్తె పల్లవన, వేర వేర తెంతో అయ్ల బక్తుల్ అర్పితుమ్ దెత గొర్రెల్ పిట్టల్ గట్ట గెనసుల, నెంజిలె దేముడుచి గుడిక డబ్బుల్ దెవుల. జేవ్ డబ్బుల్ పల్లయ్తన నాయిమ్ నెంజిలి ఎదిలి లాబుమ్ కి కెరనుల.

నేస్త. జోచి సొంత ఆగుచి రిసొ సంగ తిలో. 22 జలె, పడ్డొ, మెలె జో మొర గెచ్చ తిర్రతి తెడి అన్నె జీవ్ జలి పడ్డొ, జో ఇసి సంగ తిలో మెన జోచ సిస్సుల్ ఉచార కెరుల. ఉచార కెర్లె, క్రీస్తు “మొర అన్నె జీవ్ జా ఉట్టెదె” మెన దేముడు పూర్గుమ్ రెగ్గయ్లి కోడు, చి క్రీస్తు అప్పె సంగిలి కోడు నంప కెరుల.

23 జా పస్కా వండుగు పొది, యేసు యెరూసలేమ్తె తా, కిచ్చొ కిచ్చొ వెల్లెల కమొ కెర్తె తిలన్, చి జేవ్ కమొ దెకితె తా, జోవయింక ‘క్రీస్తు జా తయెదె’ మెన ఒగ్గర్జన్ మాన్సుల్ నంప కెర్లె. 24-25 గని మాన్సుచి పెట్టి తిలి ఉప్రమెన్నుక యేసు జానె. మాన్సుచి బుద్ది కీసి గే కో జోక సాచి సంగుక నాయ్, జానెచి రిసొ, జోవయింక నంప కెరె నాయ్.

3

నీకొదేమొ యేసుతె అందరె అయ్లిసి

1 యూదుల్చొ అదికారి ఎక్కిలో, జో పరిసయ్యుల్ మెంత పండితుల్తె ఎక్కిలో, జోచి నావ్ నీకొదేమొ. 2 జో ఏక్ దీసి అందరె యేసుతె అయ్లన్, అన్నె, “గురుబాబు తుయి బోదన కెర్తి రిసొ అమ్చొ దేముడు తుక తెద్రవ అస్సె మెన జానుమ్. కిచ్చొక మెలె, దేముడు తోడు నెంజిలె, తుయి కెర్తె వెల్లెల కమొ కెరుక కో కి నెత్తిర్తి” మెన యేసుక సంగిలన్.

3 యేసు, జలె, జోక, “తుక ఆవ్ కిచ్చొ నిజుమి కచితుమ్ సంగితసి మెలె, *నొవర్ నే జెర్మిలె దేముడుచి రాజిమ్ దెకుక నెత్తిర్తి.” మెన సంగిలన్. 4 ఇసి సంగితికయ్, నీకొదేమొ జోక “మంత్రొ జలొ మాన్సు అన్నెక్ దప్ప జెర్ముక కీసి? అన్నెక్ సుట్టు అయ్యున్చి పెట్టి పెన గెచ్చ జెర్ముక జయెదె గె? నెంజె!” మెన సంగిలన్. 5 యేసు జోక,

* 3:3 3:3 నెంజిలె, ‘ఉప్పిర్ తెంతొ చి జెర్మున్ జలెకయ్’.

“దేముడుచి రాజిమ్తె మాన్సు బెదుక జలె, †పానిక చి దేముడుచి సుద్ది తిలి ఆత్మకచి జెర్మన్ జంకయ్. ఈంజ ఆత్మతె జెర్మన్ కో జతి నాయ్ గే, దేముడుచి రాజిమ్తె జో బెదుక నెంజె. 6 ఈంజ లోకుమ్తె ఆగ్తె జెర్మన్ జలె, ఆగ్చి జెర్మన్ జయెదె. ‡దేముడుచి రాజిమ్తె బెదుక జలె, దేముడుచి సుద్ది తిలి ఆత్మతె జెర్మన్ జెంక అస్సె. 7 ‘ఇసి కీనోవర్ జెర్మక అస్సె’ మెన తుక ఆచ్ సంగిలి రిసా తుయి బమ్మ జా నాయ్. 8 ఇసిచి రిసా వాదుక చి దేముడుచి సుద్ది తిలి ఆత్మక టాలి కెరుమ. వాదు, జలె, ఇస్టుమ్ అయ్లి పక్క వీర్తి రితి జతయ్. వీరితి సప్పుడు మాన్సు సూన్లె కి, కేనె తెంతో జెతయ్ గే, కేనె గెతయ్ గే, మాన్సుల్ నేన్తి. జలె, కేన్ మాన్సు దేముడుచి సుద్ది తిలి ఆత్మచి జెర్మన్ జలె, దస్సి. జా కిసి జర్గు జతయ్ గే కో నేన్తి, గని జర్గు జా అస్సె మెన జో మాన్సుచ కొడొతె కమెతె రుజ్జు జతయ్.”

9 నీకొదేమొ, జలె, యేసుక అన్నె “తుయి సంగిలి జెర్మన్ కిసి జర్గు జంక జయెదె?” మెన పుసిలన్. 10 యేసు జోక కిచ్చొ జబాబ్ దిలన్ మెలె, “ఇస్రాయేలులుక తుయి సికడ్తొసా జలెకి, ఇన్నెచి అర్దుమ్ కెరన్సి నాయ్ గె? 11 తుక ఆచ్ కిచ్చొ నిజుమి కచితుమ్ సంగితసి మెలె, అమ్ జాన్తిసి తుమ్క సంగితసుమ్, అమ్ దెకిలిసి తుమ్క సాచి సంగితసుమ్, గని అమ్చి సాచి తుమ్ వెల్లెల మాన్సుల్ నంప కెర్పు నాయ్. 12 మాములుమ్ ఈంజ లోకుమ్తె జర్గు జతిన్క తుమ్క సంగిలే కి తుమ్ నంప నే కెర్లె జలె, దస్సి, పరలోకుమ్చి రిసాచి తుమ్క

† 3:5 3:5 1. ‘పానిక’ మెలె, బాప్తిసుమ్చి కోడు మెన సగుమ్జన్ ఉచర్తతి. పరిసయ్యుల్ యోహాను దెతె తిలి, కెర్లె పావల్ ఒప్పున చెమించుప జతి గుర్తుచి బాప్తిసుమ్ నజనుక ఎద్దె నెసిల. పానికచి బాప్తిసుమ్ జలె, సుద్ది జతిన్చి గుర్తుయి జయెదె. ఆత్మచి కామ్ జలె, సుద్ది జతిసి జయెదె. 2. ‘పానిక’ మెలె అన్నె సగుమ్జన్ కిచ్చొ అర్దుమ్ ఉచర్తతి మెలె, మాన్సు మాములుమ్ అయ్యున్ పెట్టి జెర్మన్ జతిన్చి రిసా సంగితయ్ మెన ఉచర్తతి. ఈంజ అర్దుమ్ ఉచర్లె, దొన్ని రగల్ జెర్మన్ కావల్సుపచి కోడు జయెదె; మెలె, ఆగుకచి కి ఆత్మకచి కి. ‡ 3:6 3:6 మత్తయి మెలొ సిన్సుడు రెగిడ్డి సుబుమ్ కబుర్తె ఎత్తి అదికారుమ్ తిలొ దేముడుచి రాజిమ్క ‘పరలోకుమ్చి రాజిమ్’ మెనెదె; మత్తయి 3:2, 13:24. ఎక్కిలొ పరలోకుమ్చి రాజిమ్తె నెదితిసి కెయ్క మెలె, జో మాన్సు నంపజా వ్రబుచి ఆత్మక నోవర్ జెర్మన్ జలి గడియ తెంతో. § 3:7 3:7 నెంజలె, ‘ఉప్పిర్ తెంతో చి జెర్మన్ జంక అస్సె’.

సంగిలై కి, కిసి నంప కెర్తై! 13 కో మాన్సుయి పరలోకుమ్తె వెగ గెతి నాయ్, చి తుమ్క సికడుక నెతిర్తి, గని ఆవ్ మాన్సు జా జెర్మున్ అయ్లోసొ ఒత్త తెంతో ఉత్త జా అస్సి, చి ఒత్తయ్ అన్నె వెగ గెచ్చిందె. 14 నూను, పూర్ణమ్ 'అయివొ చడితిన్ తెంతో పైజల్ రచ్చించుప జా జితు' మెన జా బయిలు దేసిమి మోసే కంచుక తెయార్ కెర్తి * అయిచి బొమ్మక కిసి ఉక్కుల టీచడన్ గే, దస్సి ఆవ్ మాన్సు జా జెర్మున్ అయ్లోసొక ఉక్కుల † టీచడుక అస్సె. 15 కిచ్చొక మెలె, అంచి ఉప్పిరి కో, జోచి నముకుమ్ తివుల గే, ‡ పరలోకుమ్చి రాజిమ్తె బెద, మొర్లె పరలోకుమ్తె గెచ్చ కెయఱ తెయఱ జివుల" మెన జోక యేను సంగిలన్.

16 జలె, దేముడు ఈంజ లోకుమ్చక ఎదివాట్ ప్రేమ కెర్తి రిసొ, జోచొ సొంత ఎక్కి పుత్తుసి ఈంజ లోకుమ్చ చి పాపుమ్ వయితి రితి జోవయింక తెద్రవ దిలన్. కిచ్చొక మెలె, కోయి జోక నంపజా గెచ్చుల గే, ఎత్కిక నానినుమ్ నే జతె, సిచ్చతె నే గెతె పరలోకుమ్తె గెచ్చ కెయఱ తెయఱ చెంగిల్ తా జివుల. 17 దేముడు జోచొ సొంత పుత్తున్క ఈంజ లోకుమ్తె తెద్రయ్లిసి కిచ్చొక మెలె, లోకుమ్చక పాపుమ్ వయడ సిచ్చతె తెద్రయె నాయ్, గని జోచి ఎత్కి పాపుమ్ తెంతో జోవయింక రచ్చించుప కెర్తి రిసొ తెద్రయిలో. 18 కో జోక నంపజా గెచ్చుల గే, జోవయించి పాపుమ్ జేవ్ వయుక నాయ్. గని కో జోవయింక నంపజతి నాయ్ గే, జోవయించి పాపుమ్ అప్పె కి వయ అస్సి, చి దేముడుచొ సొంత ఎక్కి దేముడు పుత్తున్క నంపజతి నాయ్ చి రిసొయి సిచ్చ జతి మొర్నుతె గెచ్చుల.

19 జేవ్ కిచ్చొక జోవయించి పాపుమ్ వయ సిచ్చతె గెచ్చుక మెలె,

* **3:14** 3:14 పైజల్ ఒగ్గర్ పాపుమ్ కెర్తి రిసొ, ఏక సిచ్చక ప్రబు ఒగ్గర్ అయివొ తెద్రయ్లన్. చడిలె, మొరుక జయెదె, గని 'అంచి కోడు నంప కెర్తన రచ్చించుప జతు' మెన "మోసే తెయార్ కెర్తి కంచుచి అయిక కో దెకుల గే రచ్చించుప జా జివుల" మెన ప్రబు సంగిలన్, చి జాక దెకిలన చెంగిల్ జా జిల. † **3:14** 3:14 యేనుక కిసి టీచడుక మెలె, జోవయింక నిలువతె గల టీచడుక. కో జోవయింక నంపజలె, జోవయించి పాపుమ్ గెచ్చయ్తి రిసొ. ‡ **3:15** 3:15 ఎక్కిలో ఎత్కి అదికారుమ్ తిలో దేముడుచి రాజిమ్తె బెదితిసి కెయఱక మెలె, జో మాన్సు నంపజా ప్రబుచి ఆత్మక నొవర్ జెర్మున్ జలి గడియ తెంతో.

ఉజిడి ఈంజ లోకుమ్తె అయ్లె కి, గర్చ కమొ కెరుక ఒగ్గర్జిన్ అలవాట్ జా అస్తిచి రిసా, అందర్ రితి పాపుమ్తె ఇండుక ఆస జా, జా ఉజిడి నెసితి. 20 పాపుమ్ కెరుక ఓజ జల మాన్సుల్, జలె, జా ఉజిడి ఎద్దరె నెస కెర, జోవయించ కమొ బయిలె దెకవనుక నెస కెర బియె, జా ఉజిడతె జెతి నాయ్. 21 గని కో సత్తిమ్ ఇండుల గే, జా ఉజిడక బింక నాయ్, చి జేవ్ కెర్త కమొక 'దేముడుచ కమొ, జోచి అత్మసెక్తిక సత్తిమ్క కెర్త కమొ' మెన రుజ్జు జతి రితి, దయిరిమ్ తెన్ జోచి జా ఉజిడతె జెవుల.

క్రీస్తు వెల్లో జతిసి యోహాను దాక్ జతిన్చి కోడు

22 ఒత్త తెంతొ, యేసు జోచ సిస్సుల్ తెన్ బార్ జా, యూదయ ప్రదేసిమ్చి బయిలె ఉట్ట గెల. జా పొది యేసు జోచ సిస్సుల్ తెన్ తా, జోవయించి అత్తి మాన్సుల్క బాప్తిసుమ్ దెతె తిలో, 23 అన్నె, ఒత్త తెంతొ ఇదిల్ దూరిక, సలీము మెలి గవ్విచి పాసి తిలి అయ్నోసు మెలి టాన్తె ఒగ్గర్ పాని తతికయ్, యోహాను కి బాప్తిసుమ్ దెతె తతికయ్, మాన్సుల్ జోతె జా కెర బాప్తిసుమ్ నజన్తె తిల. 24 జా పొది యోహానుక హేరోదు రానో జేలి కెరుక నేతయ్.

25 జలె, యోహానుచ సిస్సుల్ సగుమ్జిన్, సుద్ది కెరంత అలవాట్లు చి రిసా యూదుల్చొ వెల్లో మాన్సు ఎక్కిలో తెన్ లట్టబుక దెర్ల. 26 తెదొడి జేవ్ యోహానుతె జా కెర, జోవయింక "గురుబాబు, ఈంజ యోర్దాను గాడు ఒత్తల్తో జా పొది తుచి తెన్ తిలోసా, తుయి సాచి సంగిలోసా, జో కి ఇన్నె తుచి రితి బాప్తిసుమ్ దెతయ్, చి ఎత్కిజిన్ జోతె గెతతి" మెన సంగిల. 27 యోహాను జోవయింక కిచ్చొ జబాబ్ దిలన్ మెలె, "పరలోకుమ్చొ దేముడు జా దిలెకయ్ మాన్సుక జా అదికారుమ్ తయెదె. జో కెర్తిసి తప్పు నెంజె. 28 తుమ్క అగ్గె సంగిలయ్, గెద. 'క్రీస్తు నెంజి, గని ఆవ్ జోచొ బారికి జా జో జెతిసి సాట్టు కెరుక మెన దేముడు అంక జోచి పురైతో తెద్దవ అస్సె' మెన తుమ్క ఆవ్ తెదొడి సంగిలయ్. ఆవ్ దస్సి సంగిలిన్క తుమి సాచి జా అస్సున్. 29 జలె, కేన్ జలెకు పెండ్లితె, పెండ్లిబూలి

పెండ్లిబూలోకయ్ గెచ్చెదె, గెద. బూలోచొ మింతుసి జోచి వచ్చెన జా అయ్లె కి, జో ఒత్త టీచ, బూలోక దెక, జోచి అవాడ్ నూన, సర్దసంతోసుమ్ జయెదె. జలె, పెండ్లితె బూలోయి కిసి ముక్కిమ్ జయెదె గే, దస్సి, క్రీస్తు ముక్కిమ్ జా అస్సె, చి అంక సర్దసంతోసుమ్. 30 జో వెల్లో జంక, ఆవ్ దాక్ జంక” మెన యోహాను సంగిలన్.

క్రీస్తుచి అదికారుమ్చి రిసా సంగిలిసి

31 పరలోకుమ్ తెంతొ అయ్లోసా ఎత్కిచి కంట వెల్లో. మాములుమ్ ఈంజ లోకుమ్చ మాన్సుల్, జలె, మాములుమ్ ఈంజ లోకుమ్చి రగుమ్ తా, మాములుమ్ ఈంజ లోకుమ్తె తిలిన్చి రిసా లట్టబుల. గని యేసుక్రీస్తు పరలోకుమ్ తెంతొ అయ్లోచి రిసా, జో ఎత్కిచి కంట వెల్లో. 32 ఒత్త దేముడు అబ్బొన్తె సొంత దెకిలిసి సొంత సూన్లినచి రిసా జో సాచి సంగిలే కి, మాములుమ్ ఈంజ లోకుమ్చి బుద్ది తిల మాన్సుల్ కోయి జోచి సాచి నంప కెర్తి నాయ్. 33 గని, జోచి సాచి కో నూన నంప కెర్తతి గే, ‘దేముడు సత్తిమ్చొ’ మెన పూర్తి దయిరిమ్ జా జోచి సాచి దెతతి. 34 దేముడు తెద్రయ్లోసా జా, జో దేముడుచ కబుర్లు నిదానుమ్ తెన్ సంగితయ్, అన్నె జోచి పెట్టి దేముడుచి సుద్ది తిలి ఆత్మ ఎదివాట్ దెతయ్. 35 జలె, దేముడు అబ్బొసి దేముడు పుత్తున్క పూర్తి ప్రేమ అస్సె, చి అదికారుమ్ ఎత్కి జోచి అత్తి సార్ప కెర దాయి గెల అస్సె. 36 దేముడు పుత్తున్క కో నంపజా గెచ్చుల గే, పరలోకుమ్చి రాజిమ్తె కచితుమ్ బెద, మొర్లె ఒత్త గెచ్చ కెయ్క తెయ్క జివుల. గని, దేముడు పుత్తున్చి కొడొ రితి కో కెర్తి నాయ్ గే, జోచి జా పాపుమ్ వయ అస్తి, చి దేముడు దిలి సిచ్చ జోవయింక కెయ్యక కి పిట్టె నాయ్.

4

సమరయ ప్రదేసిమ్చి తేర్బోడక యేసు బోదన కెర్తిసి

1 యోహానుచి కంట యేసు అప్పె ఒగ్గర్ సిస్సుల్ కెరన బాప్తిసుమ్ దెతయ్ మెన పరిసయ్యుల్ సూన్ల. 2 యేసు మాత్తుమ్ సొంత

బాప్తిసుమ్ దెయె నాయ్, గని జోచ సిస్సుల్చి అత్తి దెతె తిలన్, ³ జలె, “బాప్తిసుమ్క ఎత్తిజన్ అంచితె జెతిన్చి రిసొ పరిసయ్యుల్ నూన అస్తి” మెన యేసు చిన కెర, “జోవయించి కోపుమ్చి రిసొ అప్పెచి మట్టుక ఇన్నె తంక బెదె నాయ్” మెన, యూదయ ప్రదేసిమ్ ముల దా, జో వడ్డిలి గలిలయ ప్రాంతుమ్తె గెచ్చుక మెన అన్నె బార్ జలన్.

⁴ అప్పె యేసుక సమరయ ప్రదేసిమ్చి వాల్ గెచ్చుక జంకయ్. ⁵ జలె, సిస్సుల్ తెన్ బార్ జా సమరయ ప్రదేసిమ్చి నూరూ మెంతి ఏక్ గావ్ సొడి అయ్ల. జా గావ్ కేనె మెలె, యాకోబు మెలో పూర్గుమ్చొ జోచొ యోసేపు మెలో పుత్తున్క దిలి బుయి పాసి అస్సె. ⁶ ఊంటక యాకోబు కూనయ్లి కుండి ఒత్త అస్సె. జలె, యేసు ప్రయానుమ్చి రిసొ అల్పు జా, జా కుండి సొడి వెసిలన్. పాసి పాసి మెద్దెన్ జా అస్సె. ⁷ తెదొడి, అన్నిమ్ గెన ఆన్తి రిసొ యేసుచ సిస్సుల్ జా గవ్వి పెస గెల. యేసు ఎక్కిలో ఒత్త వెస అస్సె ⁸ జా సమరయ ప్రదేసిమ్చి తేర్బోద ఎక్కి పాని కడన్తి రిసొ అయ్లి. యేసు జాక “పాని దె, పియిందె” మెన సంగిలన్.

⁹ జలె, యూదుల్ సమరయ సుదల్ తెన్ బెదితి నాయ్ చి రిసొ, జా తేర్బోద ఆచారిమ్ జా, “ఆవ్ ఈంజ సమరయతెచి తేర్బోద, తుయి యూదుడు. జలె, ‘పాని దే’ మెన కిచ్చొక అంచి అత్తి తుయి సంగితసి?” మెన యేసుక సంగిలి. ¹⁰ యేసు జాక, “మాన్సుల్క దేముడు దిలి వరుమ్ తుయి చినితది జలె, అన్నె, ‘పాని దే, పియిందె’ మెన తుక సంగితొసొ కొన్సొ జయిందె గే తుయి చినితది జలె, ‘జీవ్ దెతో పాని అంక దే’ మెన తుయి అంకయ్ సంగితది,” మెన యేసు జాక జబాబ్ దిలన్.

¹¹ జలె, జా తేర్బోద అర్దుమ్ కెరనె నాయ్ చి రిసొ, “బాబు, ఈంజ కుండి దీగ్ అస్సె. పాని కడన్తి సామన్ కిచ్చొ నాయ్, తుక. జీవ్ దెతో జో పాని కేనె తెంతొ తుక దొర్కు జయెదె? ¹² అమ్చొ యాకోబు పూర్గుమ్చొ, జోచ పుత్తర్సులు, జోచ సొమ్ముల్ ఎత్తి ఈంజయ్ ఊంటచి పాని పితె తిల. జొయ్యి అమ్క ఈంజ కుండి దిలన్. తుయి అమ్చొ యాకోబు పూర్గుమ్చొచి కంట వెల్లో గే?” మెన సంగిలి.

13 జా తేర్బోద దస్సి సంగితికయ్, యేసు జాక, “ఈందె, ఈంజ పాని కేన్ మాన్సు పిలెకి, జోక అన్నె తాన్ కెరెదె. 14 గని ఆవ్ దెతిసి *‘పాని’ కో పివుల గే, జోక కెయెక కి అన్నె తాన్ కెరె నాయ్. ఆవ్ దెతో పాని జోచి పెట్టి ఊంట పుట్టి రితి జతె తయెదె, చి †కెయెక తెయెక చెంగిల్ తతి జివుమ్ జోక దొర్కు జయెదె.”

15 జలె, జా తేర్బోద అర్దుమ్ కెరనుక నేతయ్చి రిసా, “అప్పె తెంతో అంక తాన్ నే కెర్తి రితి, పానిక ఆవ్ అన్నె ఇన్నె నే జెతె తతి రిసా, తుయి సంగిలో పాని అంక దె” మెలి. 16 యేసు జాక, “తుయి గెచ్చు, తుచొ మున్సుద్క కడ ఆను” మెన సంగిలన్. 17 జా తేర్బోద జోక “అంక మున్సు నాయ్” మెన సంగిలి, చి యేసు జాక “ ‘అంక మున్సు నాయ్’ మెన తుయి సంగిలి కోడు సత్తిమ్. 18 తుక అప్పె ఎద పాచ్జిన్ మున్సుల్లు అస్తి, చి అప్పె తిలోసా తుచొ మున్సుది నెంజె. సత్తిమ్ సంగిలది” మెన యేసు సంగిలన్.

19 యేసు ఇసి సంగితికయ్, జా తేర్బోద, “బాబు, ‡దేముడు తుక కిచ్చొ కిచ్చొ దెకయ్తయ్ మెన అప్పె ఆవ్ చినితసి. జొయ్యి తెద్రయ్లో మాన్సు, తుయి. 20 అమ్చ పూర్గుమ్చ తెంతో అమ్ సమరయ సుదల్ ఈంజ అమ్చి మొక్కె తిలి డొంగురతె దేముడుక బక్తి కెర్తనుమ్, గని ‘యెరూసలేమ్తె దేముడుచి గుడితె జోక బక్తి కెరుక అస్సి’ మెన తుమ్ యూదుల్ సంగితసు” మెన జా సంగిలి. 21 యేసు జాక, “అమ్మ, ఇదిల్ పడ్డొక, ‘దేముడు అబ్బొక బక్తి కెర్తి రిసా ఈంజ డొంగుర జవున్, యెరూసలేమ్ పట్టుమ్ జవున్ ముక్కిమ్ మెనుక నాయ్’ మెన మాన్సుల్క అర్దుమ్ జయెదె. 22 తుమ్ సమరయ సుదల్, దేముడుక బక్తి కెర్లె కి, జోవయింక అప్పొక కీదూరి అస్సున్. అమ్ యూదుల్క మాత్రుమ్, జో నిసాన అస్సె. మాన్సుల్క దొర్కు జలొ రచ్చించుప

* 4:14 4:14 ఇన్నె ‘పాని’ మెలె, జా టాలిచి అర్దుమ్ కిచ్చొ మెలె, పరలోకుమ్చి రాజిమ్తె బెదితి అత్తుజెర్కున్ దెతి జోవయించి సుద్ది తిలి అత్తు. † 4:14 4:14 ‘కెయెక తెయెక చెంగిల్ తతి జివుమ్’ మెలె, పరలోకుమ్చి రాజిమ్తె బెదితి, మొర్లె ఒత్త గెచ్చు జితి, సెక్తి. ‡ 4:19 4:19 నెంజెలె, “తుక ‘ఎత్తి అదికారుమ్ తిలో దేముడుచ కబుర్లు సంగితొసా ఎక్కిలో’ మెన ఆవ్ అప్పె చినితసి”. § 4:22 4:22 నెంజెలె, “నేస్సు. అమ్ యూదుల్ మాత్రుమ్, జోవయింక జానుమ్.”

కెర్తొసా అమ్ యూదుల్తె జెర్ముక జోచి సెలవ్. ²³ జలె, ఇదిల్ పడ్డొక, అప్పె రితి కి, జో దేముడు అబ్బొక నిజుమి నంపజల మాన్సుల్ కో జవుల గే, జోవయించి ఆత్మతె నిదానుమ్ జా జోవయింక సత్తిమ్ తిలి బక్తి కెరుల. దేముడు అబ్బొన్ దన్న మాన్సుచి రిసా రకితయ్. ²⁴ దేముడు డీస్తొసా నెంజె, గెద. ఆత్మయి, జో. జాకయ్, కో జోక బక్తి కెరుక ఉచరుల గే, జోవయించి ఆత్మయి నిదానుమ్ తెన్ జోక సత్తిమ్ తిలి బక్తి కెరుక అస్సె” మెన యేసు జా తేర్బోదక సంగిలన్. ²⁵ జో ఇసి సంగితికయ్, జా తేర్బోద, “ ‘దేముడు తెద్రయిందె’ మెన సంగ తిలో *‘మెన్నయ మెలో రచ్చించుప కెర్తొసా జెయెదె’ మెన జాని. జో అయ్లి పొది, జోయ్యి అమ్క ఎత్తి దెకయెదె” మెన సంగిలి†. ²⁶ జలె, జా దస్సి సంగితికయ్, యేసు జాక “ఆవ్ తుచి తెన్ లట్టబ్బొసా జోయ్యి” మెన సంగిలన్.

²⁷ యేసు ఇసి సంగిలి బేగి, జోచ సిన్సుల్ జా గెవ్వి తెంతో బుల అయ్ల. తేర్బోద తెన్ యేసు లట్టబ్తయ్ మెన దెక ఆచారిమ్ జల, గని ‘తుక కిచ్చొ కావలె?’ జలెకు, ‘జాచి తెన్ కిచ్చొక లట్టబ్తసి?’ జలెకు మెన కో పుసితి నాయ్.

²⁸ తెదొడి జా తేర్బోద, జాచి గేడి ముల దా నిగ గెచ్చ, జా గావ్ తెడి పెన, ²⁹ “తుమ్ బేగి జా ఎక్కిలోక దెక! ఈంజొ మాన్సు కక్క నే పుసితె, ఆవ్ అగ్గె కెర్లిసి ఎత్తి అంక సంగ దిలో. ఈంజొయి క్రిస్తు జయెదె, కిచ్చొగె” మెన ప్రెజల్క బుకార్లి, ³⁰ చి జా తెన్ ఒగ్గర్జిన్ యేసుతె జెంక బార్ జల.

³¹ జా తేర్బోద గెవ్వి పెన ప్రెజల్క బుకార్లి మెద్దెనె, యేసుచ సిన్సుల్ జోక “గురుబాబు, అన్నిమ్ కెరు!” మెన బలవంతుమ్ కెర్ల. ³² గని జో “తుమ్ నేన్లి ఏక్ రగుమ్ అన్నిమ్ అంక అస్సె” మెన జబాబ్ దిలన్. ³³ జో ఇసి సంగిలి రిసా, జోచ సిన్సుల్ “ఇన్నెక కో జలెకు కిచ్చొ జవున్ అన్నిమ్ ఆన దా అస్తి గే?” మెన ఎక్కిలో తెన్ ఎక్కిలో లట్టబుక దెర్ల.

* **4:25** 4:25 ‘మెస్సీయ’ మెలె, ‘క్రిస్తు’ మెలె, అన్నె కిచ్చొ అర్దుమ్ తయెదె మెలె, ‘రాస’, ‘ఎత్తి అదికారుమ్ తిలో దేముడు విలుప కెరయ్లోసా’ మెలి అర్దుమ్. † **4:25** 4:25 అరమయ్ బాన తెన్ ‘మెస్సీయ’ మెలె, గ్రికు బాన తెన్ ‘క్రిస్తు’ జయెదె.

34 జేవ్ దస్సి జతికయ్, యేసు జోవయింక, “అంచి అన్నిమ్ కిచ్చొ మెలె, అంక తెద్రయ్లోసాచి ఇస్టుమ్ రితి కెరుకయ్. జోచి కామ్ పూర్తి జర్గు కెరుకయ్.

35 “ఈందె, ‘అన్నె చెత్తర్ జొన్నొ గెలెకయ్ పంటొ లాయ ఆనుక జయెదె’ మెన మొక్కల్ రోవెతి పొది సంగితను. జలె, ఆవ్ తుమ్క కిచ్చొ మెంతసి మెలె, ఆదె! అంకివొ ఉగుడ దెక! బట్టిలె పంటొ అప్పె పిక తెయార్ జా రితి, అంక సంపజంక ఎతిమాట్జిన్ మాన్సుల్ తెయార్ జలి రితి సమయుమ్ జా అస్సె. 36 ప్రెజల్క దేముడుచి రాజిమతె బెదయ్తి ఈంజ ఆత్మపంటొ లాయితితె కో లాయ ఆన్తన జవుల గే, జోవయింక ఆత్మజీతుమ్ దొర్కు జయెదె. జాచి రిసా, అంచి సుబుమ్ కబుర్ తిలి బి గలిలన కి, జా ఆత్మపంటొ లాయ ఆన్తన కి, సర్దనంతొనుమ్ జవుల. 37 అంచి ఆత్మపంటొచి కామ్తె, జలె, ‘ఎక్కిలో బి గలెదె, అన్నెక్కో పంటొ లాయ ఆనెదె’ మెలి కోడు సత్తిమ్ జయెదె. 38 అల్లె, తుమ్ మొదొల్ నే కెర్లి ఈంజ కామ్తె బెదుక తుమ్క ఆవ్ తెద్రవ అస్సి. కో కో కస్తుమ్ జా అగ్గె తెంతొ ఈంజ కామ్ కెర తతికయ్, తూమ్ కి అప్పె ఈంజ కామ్తె బెద అస్సున్” మెన యేసు జోచ సిస్సుల్క సికయ్లన్.

సమరయచ మాన్సుల్ ఒగ్గర్జిన్ యేసుక సంపజలిసి

39 జలె, ‘ఆవ్ కెర్లిసి ఎత్తి అంక సంగ దిలో’ మెన యేసుచి రిసా జా తేర్బోద సంగిలి సాచి సూన కెర, జా గవ్వొచ సమరయ సుదల్ ఒగ్గర్జిన్ యేసుక సంపజల. 40 జాకయ్, యేసుతె జా కెర, “అమ్చి గవ్వొ జా తా” మెన జేవ్ సమరయ సుదల్ బతిమాల్పా జా సంగిల, చి దొరతి తా గెలన్. 41 జో సొంత బోదన కెర్లికయ్, అన్నె ఒగ్గర్జిన్ జోక సంపజల, 42 చి జా తెర్బోదతె జా కెర, “తుక ‘జయ్యి సంగిలి రిసా సంపజలమ్’ మెన అప్పె తెంతొ సంగుమ్ నాయ్. కిచ్చొక మెలె, అమ్ అప్పె జోచి కొడె సొంత సూన్లి రిసా, ‘ఈంజ లోకుమ్చ ఎత్తిక దొర్కు జలొ రచ్చించుప కెర్తొసా ఈంజొయి’ మెన పూర్తి దయిరిమ్ జా అస్సుమ్” మెన సంగిల.

గలిలయచ మాన్యుల్ యేసుక మరియాద దెకిలిసి
(మత్త 8:5-13; లూకా 7:1-10)

43 జా దొరతి గెలి వడ్డో, యేసు జోచ సిన్సుల్ తెన్ ఒత్త బార్ జా గెచ్చ, గలిలయ ప్రాంతుమ్తె పాఁవిల. 44 'దేముడుచ కబుర్లు సంగితోసా కో జలెకు సొంత టాన్తె తిలె, సొంత టాన్చ మాన్యుల్ జోక గవురుమ్ దెకితి నాయ్' మెన జాన కెర, యేసు సొంత సంగితె తిలన్. జాకయ్ యూదయ ప్రదేసిమ్ ముల తిలో.

45 గలిలయ ప్రాంతుమ్చ ప్రెజల్ ఒగ్గర్జిన్, జలె, యెరూసలేమ్ పట్టుమ్తె పండుగ్క జేవ్ కి గెచ్చ తా అన్నె ఉట్ట జా అన్తి. జేవ్ యెరూసలేమ్తె తిలి పొది, యేసు కెర్ల కమొ ఎత్కి దెక తిల. జేవ్, జలె, జేవ్ గలిలయులు, సర్ల తెన్ జోక మరియాద కెర్ల.

46 జలె, జా గలిలయ ప్రాంతుమ్తెచి కానా మెంతి గవ్వి యేసు అన్నె ఉట్ట అయ్లన్. జా సుట్టు, ఒత్తయ్ పానిక ద్రాచ రన్నుమ్ మార్పుప కెర తిలో. జలె, యేసు అప్పె కానాతె తతికయ్, ఇదిల్ దూరి తిలి కపెర్నహూమ్ మెంతి గవ్వి హేరోదు రానోచొ వెల్లో అదికారి ఎక్కిలోచొ పుత్తుసి జోర్ణో సేడ అస్సె.

47 యేసు యూదయ ప్రదేసిమ్ ముల దా గలిలయ ప్రాంతుమ్తె జా అస్సె మెన జో వెల్లో మాన్సు సూన్లి బేగి, బార్ జా, యేసుతె అయ్లన్. జోచొ పుత్తుసి మొర గెచ్చెదె గే జియెదె గే, దస్సి జా అస్సెచి రిసా, "బేగి జా అమ్చొ పుత్తుక చెంగిల్ కెరు" మెన యేసుక బతిమాల్పా జా సంగిలన్. 48 జలె, యేసు జోక, "దేముడు దిలి అదికారుమ్క రుజ్జు దెకయ్త కమొ నే దెకిలె, తుమ్ నంప కెర్పు నాయ్" మెన సంగిలన్. 49 యేసు ఇసి సంగితికయ్, జో "బాబు, అమ్చొ బోబొ నే మొర్తి రితి బే బేగి జె" మెన జో అన్నె బతిమాల్పా జా సంగిలన్. 50 తెదొడి యేసు జోక, "గో, తుచొ పుత్తుది జియెదె!" మెన సంగిలన్. యేసు సంగిలి కోడు జో మాన్సు నంప కెర, గెరి గెచ్చుక బార్ జలన్.

51 జో వట్టె గెతె తతికయ్, జోచ గొత్తి నుదల్ జో తెన్ దన్నుల్ జల. "తుచొ పుత్తుది జిలో!" మెన జోక సంగిల. 52 "కెత్తి గంటల్క చెంగిల్ జలో?" మెన జో పుసిలన్, చి జేవ్ జోక "కాలి ఒంటి గంటక జోర్ణో

గెలి!" మెన నంగిల. ⁵³ జలె, "తుచొ పుత్తుది జియెదె" మెన యేసు నంగిలి గడియ జయ్యి మెన జొణ్ణొ సేణ్ణొ నాడుచొ అబ్బొసి చినన్లో. జాకయ్, జోచి గెర్చ మాన్సుల్ ఎత్తిజిన్ యేసుక నంపజా గెల.

⁵⁴ యూదయ ప్రదేసిమ్ ముల గలిలయ ప్రాంతుమ్తె తొలితో ఉట్ట అయ్లి జా సుట్టు తెంతొ, ఈంజొ నాడుక చెంగిల్ కెర్లిసి తెన్ జోచి అదికారుమ్క రుజ్జు దెకయ్త కమె దొన్ని జల.

5

యేసు యెరూసలేమ్ పట్టుమ్తె ఉట్ట గెలిసి

¹ ఈంజ జర్గు జలి పడ్డొ, యూదుల్చి పండుగు అన్నెక్ అయ్లిచి రిసా దేముడుచి దేవులుమ్ తిలి యెరూసలేమ్ పట్టుమ్తె యేసు ఉట్ట గెలన్.

² జలె, జా పట్టుమ్తె 'మెండల్ వీది' మెన ఏక్ టాన్ అస్సె. ఒత్త ఏక్ వెల్లో కుండి అస్సె. ఎబ్రీ బాస తెన్ జా కుండిచి నావ్ 'బేతెస్స'. జా కుండిచి సుట్టునంత, పాచ్ గుమ్మల్ తిలి టాన్ ఏక్ అస్సె. ³ ఒత్త రగరగాల్ రోగల్చ బెర అస్తి, గుడ్డి మాన్సుల్, సొట్ట మాన్సుల్, అత్తో చట్టొ లంబ గెల మాన్సుల్, దసచ అస్తి. ⁴ *కిచ్చొక ఒత్త అస్తి మెలె, గడియ గడియక ఏక్ దూత జా గడ్డె ఉత్త జా కెర, పాని కదుల్ కెరెదె, చి జో పాని కదుల్ జలి బేగి కో జలెకు రోగి తొలితో పానితె ఉత్తెదె గే, జోవయించి జబ్బు గెచ్చ, చెంగిల్ జియెదె.

⁵ జలె, ముప్పయ్ అట్టు వెర్సుల్చి జబ్బు తిలొ ఏక్ మాన్సు ఒత్త అస్సె. ⁶ యేసు జా వెల్లి కుండి తిలిన్తె గెచ్చ, జో రోగిక దెక, 'ఒత్త ఎత్తివాట్ దీసల్ తెంతొ జోచి అంతుర్నొతె నిజ తా మాలజ్ జా అస్సె' మెన చిన కెర, "తుక నిజామి చెంగిల్ జంక ఇష్టుమ్ అస్సె గే?" మెన జోక పుసిలన్. ⁷ జో రోగి "బాబు, పాని కదుల్ జలి బేగి అంక పానితె ఉత్తయ్తొసొ కో నాయ్, చి ఆచ్ ఉత్తిరై ఎద అస్సె కో గే అంచి కంట

* **5:4** 5:4 గ్రీకు బాస తెన్ ఈంజ తొలితో రెగిడ్ల సగుమ్ పుస్తకల్తె 4 నంబర్చి కోడు తయె నాయ్.

అగ్గె ఉత్తెదె” మెన సంగిలన్. 8 యేసు జోక “తుయి ఉట్ట, తుచి అంతుర్నొ వయన ఇండు!” మెన సంగిలన్. 9 సంగిలి బేగి, జో మాన్సు చెంగిల్ జా జోచి అంతుర్నొ వయన ఇండిలన్.

10 జా దీసి, యూదుల్చి బక్తి కెర్తి సెలవ్ కడన్లి దీసి. జలె, యూదుల్చ వెల్లెల మాన్సుల్ సగుమ్జిన్ చెంగిల్ జలో జో మాన్సుక దెకిల. దెక, “ఈంజ సెలవ్ కడన్లి దీసి. తుచి అంతుర్నొ వయన గారు!” మెన సంగిల. 11 దస్సి సంగితికయ్, చెంగిల్ జలో జో మాన్సు “ ‘తుచి అంతుర్నొ వయన ఇండు’ మెన, అంక చెంగిల్ కెర్లొసా సంగిలన్, చి వయన ఇండిలయ్” మెన జోవయింక జబాబ్ దిలన్. 12 “ ‘తుచి అంతుర్నొ వయన ఇండు’ మెలొసా కో?” మెన జేవ్ వెల్లెల మాన్సుల్ పుసిల. 13 జో కొన్సొ జయెదె గే చెంగిల్ జలో జో మాన్సు నేనె. కిచ్చొక మెలె, ఒత్త ఒగ్గర్జిన్ జనాబ్ తతికయ్, యేసు, కో నే దెకితె, ఉట్ట గెచ్చు తిలొ.

యేసు జో మాన్సు తెన్ అన్నె దస్సుల్ జా జాగర్త సంగిలిసి

14 పడ్డొ, చెంగిల్ జలొసొక యేసు దేముడుచి గుడితె చజ కెర, జోక “ఈందె, అప్పె తుయి చెంగిల్ అస్సిసి. అన్నె కిచ్చొ జవున్ వెల్లి బాద నే నేడ్డి రిసొ అన్నె పాపుమ్ కెరు నాయ్” మెన జాగర్త సంగిలన్. 15 జో మాన్సు ఒత్త తెంతొ గెచ్చు, “అంక చెంగిల్ కెర్లొసా యేసుయి” మెన యూదుల్చ వెల్లెల మాన్సుల్క సంగిలన్. 16 జలె, సెలవ్ కడన్లి దీసి యేసు ఈంజ కామ్ కెర్లి రిసొ, యూదుల్చ వెల్లెల మాన్సుల్ జోక అల్లర్ కెరుక దెర్ల. 17 దస్సి జతికయ్, యేసు జోవయింక, “అగ్గె తెంతొ ఎద కి అంచొ దేముడు అబ్బొ కామ్ కెర్తె తత్తయ్. ఆవ్ కి జోచి కామ్ కెర్తె అస్సి” మెన సంగిలన్. 18 జలె, ‘సెలవ్ కడన్లి దీసి పిట్టవన కామ్ కెర్తయ్’ మెన, అన్నె, దేముడు తెన్ సమ్మందుమ్ మెనన్లొ జోక ‘అబ్బొ’ మెన యేసు సంగిలిన్చి రిసొ, యేసుక మారుక మెన అన్నె ఒగ్గర్ ఉచర జల.

యేసుచి అదికారుమ్ కేనె తెంతొ జెతయ్

19 జలె, కోపుమ్ జల జేవ్ వెల్లెల మాన్సుల్క యేసు ఇసి మెన సంగిలన్. “ఆవ్ తుమ్క కిచ్చో నిజుమి కచితుమ్ సంగితసి మెలె, దేముడు అబ్బొ కెర్తిసి కేన్ జలెకి ఆవ్ పుత్తుసి దెకిలె, జయ్యి దస్సి కెర్తె తయిందె, వేరచి కిచ్చో కెరుక నెంజె. అబ్బొ కిచ్చో కెర్తె, ఆవ్ పుత్తుసి జయ్యి కెర్తసి. 20 ఆవ్ పుత్తున్క దేముడు అబ్బొ ప్రేమ కెర్తయ్. దేముడు అబ్బొ కెర్తిసి ఎత్తి ఆవ్ జోచొ పుత్తున్క దెకయ్తె తత్తయ్. తుమ్ దెకిల ఈంజేవ్ కమొచి కంట అన్నె జిన్ల కమొ ఆవ్ పుత్తున్క దేముడు అబ్బొ దెకయెదె. తుమ్ ఆచారిమ్ జస్తె. 21 కిస కమొ మెలె, మొర గెలసక ఉట్టవ దేముడు అబ్బొ జోవయింక కిసి అన్నె జియడ్తయ్ గే, దస్సి, కక్క, జియడుక సర్ల జయిందె గే, జోవయింక జియడ చెంగిల్ కెరిందె. 22 వడ్డొ, దేముడు అబ్బొ కక్క, సొంత తీర్పు కెరె నాయ్. తీర్పు కెర్తి అదికారుమ్ ఆవ్ జోచొ పుత్తున్క సొర్పు కెరె దా అస్సె. 23 దేముడు అబ్బొక మాన్సుల్ కిసి గవురుమ్ కెర్తతి గే, దస్సి ఎత్తిజిన్ ఆవ్ జోచొ పుత్తున్క కి గవురుమ్ కెర్తు మెన, జో సెలవ్ దా అస్సె. ఆవ్ పుత్తున్క కో గవురుమ్ కెర్తి నాయ్ గే, అంక తెద్రయ్లో దేముడు అబ్బొక కి గవురుమ్ కెర్తి నాయ్.

24 “తుమ్క కిచ్చో నిజుమి కచితుమ్ ఆవ్ సంగితసి మెలె, అంక తెద్రయ్లో సొక నంప కెరె కో అంచి కోడు సూన కెరుల గే, పరలోకుమ్చి రాజిమ్తె బెదితి వరుమ్ జోవయింక దొర్కు జా అస్సె. పాపుమ్చి రిసొ జేవ్ మొర గెల రిత జా తిలె కి, జేవ్ కెర్లె పావల్ చెమించుప జా సిచ్చుతె గెతి నాయ్, గని జివ్వి జా అస్తి.

25 “తుమ్క నిజుమి కచితుమ్ ఆవ్ కిచ్చో సంగితసి మెలె, మొర గెలస ఆవ్ దేముడు పుత్తున్చి అవాడ్ సూన్తి సమయుమ్ జెతయ్, అప్పె కి జా అస్సె, కో సూన నంపజవుల గే, నొవర్ జిలి రితి జా, దేముడుచి రాజిమ్తె బెదుల. 26 జివ్ కెర్తి సెక్తి జో అబ్బొసి జలో దేముడుచి అత్తి అస్సె, జలె, దొర్కు జలి జయ్యి సెక్తి ఆవ్ జోచొ అబ్బొ జలో దేముడు పుత్తున్క దా అస్సె. 27 అస్సె, ఆవ్ మాన్సు జా జెర్మున్ అస్సిచి రిసొ అంక మాన్సుల్క తీర్పు కెరె సిచ్చు కెరుక, చెమించుప

కెరుక, అదికారుమ్ దా అస్సె. 28 ఇన్నెచి రిసా తుమ్ కిచ్చొ ఆచారిమ్ సేడ నాయ్, కిచ్చొక మెలె, మొర గెల మాన్సుల్, మెస్సున్లతె తిలస ఎత్కి, అంచి అవాడ్ నూన బార్ జతి సమయుమ్ జెయెదె. 29 తెదొడ్క జేవ్ బార్ జా, సత్తిమ్ కెర్లస అన్నె జివ్ జా ఉట్ట పరలోకుమ్తె గెచ్చ చెంగిల్ జితె తవుల, సత్తిమ్ నే కెర్లస ఉట్ట, సిచ్చతె గెచ్చుల.

30 “జలె, కిచ్చొ అవ్వి కెరుక అంక అదికారుమ్ నాయ్, దేముడు అబ్బొతె ఆవ్ నూన్లి రితి ఆవ్ తీర్పు కెర్తసి ఆవ్ కెర్తె తీర్పుతె కిచ్చొ తప్పు నాయ్. కిచ్చొక మెలె, ఆవ్ కిచ్చొ వేర ఉచరి నాయ్, గని అంక ఎక్కి ఆస. కిచ్చొ మెలె, అంక తెద్రయ్లోసాచి ఇస్టుమ్ తిలిసి పూర్తి జర్గు కెరుక.

యేసుచి రిసా సాచి

31 “అంచి రిసా ఆవ్ ఎక్కిలో సాచి సంగనై, అంచి సాచి సత్తిమ్చి గే అబద్దుమ్చి గే రుజ్జు నాయ్. 32 అంచి రిసా సాచి సంగితోసా అన్నెక్లొ అస్సె. జో అంచి రిసా సాచి సంగిలిసి సత్తిమ్ మెన జాని. 33 మెలె, యోహానుక ‘కిచ్చొ సాచి సంగెదె?’ మెన నూన్తి రిసా తుమి జా సుట్టు సగుమ్జిన్చి అత్తి కబుర్ తెద్రయ్లదు, చి ఆవ్ కొన్సొ గే జో సాచి సంగిలన్. 34 అంచి రిసాచి ముక్కిమ్ జలి సాచి మాన్సు సంగిలిసి నెంజె, గని తుమ్క ‘నంపజా రచ్చించుప జతు’ మెన, యోహానుచి సాచిచి రిసా తుమ్క ఆవ్ ఉచరయ్తసి. 35 దొర్కు జలిసి మాన్సు చినితి రిసా దీవు లగితె తిలె కిసి తమ్మస ఉజిడ్ దెతయ్ గే, దస్సి, ఉజిడ్ రితో జా, అంచి రిసా యోహాను సాచి సంగితె తిలొ. జో సంగిలి సాచి నూన, తూమ్ కి గడియయ్ సర్ల తెన్ తిలదు.

36 “గని, యోహానుచి సాచిచి కంట అంక జిన్ని సాచి అస్సె. ఆవ్ కెరుక మెన దేముడు అబ్బొ దిల కమె, ఈంజేవ్ ఆవ్ కెర్త కమెయి దెకిలె, జొయ్యి అంక తెద్రయ్లో మెన ఈంజేవ్ కమెయి అంచి రిసా సాచి సంగితతి.

37 “పడ్డొ, అంక తెద్రయ్లో అబ్బొయి అంచి రిసా సొంత సాచి సంగిలన్. తూమ్ కెయ జోచి అవాడ్ నూన్సు నాయ్, జోచి రూపుమ్ తుమ్ కెయ దెకున్ నాయ్. 38 జోచి కోడు తుమ్చి పెట్టి నాయ్ మెన

కిచ్చొ రుజ్జు తత్తయ్ మెలె, జో తెద్రయ్లోసాక తుమ్ నంప కెర్చు నాయ్. 39 దేముడుచి రాజిమ్తె బెద పరలోకుమ్తె గెతి రిసా దొర్కు జలి గ్యానుమ్ పున్నిమి దెతిసి దేముడుచ కొడొతె తయెదె మెన దేముడుచ కొడొ తుమ్ రోజుక దెకితను. జలె, జెవ్వి అంచి రిసా సాచి సంగితతి. 40 జేవ్ కొడొ అంచి రిసా సాచి సంగిలే కి, అంచితె దొర్కు జతి పరలోకుమ్చి జివ్ సంగితి రిసా తుమ్ అంచితె జెంక ఎద్దరె నెనును. అంక నంపజలె, తుమ్క దొర్కు జతి.

41 “మాన్సు దెతి గవురుమ్ అంక నాయ్. 42 గని దేముడుచి ప్రేమబుద్ధి తుమ్చి పెట్టి నాయ్ మెన జాని. 43 అంచొ అబ్బొసి జలో దేముడుచి నావ్ తెన్ ఈంజ లోకుమ్తె ఆవ్ జా అస్సి, గని తుమ్ అంక నంప కెర్చు నాయ్. గని, కో జలెకు వేర మాన్సు అవ్వి కెర అయ్లె, జోకయ్ నంప కెర్తె. 44 మాన్సు సంగితి గవురుమ్ ఎక్కిలోతె ఎక్కిలో తుమ్ సంగితను, గని ఎక్కిలో దేముడు దెతి గవురుమ్క తుమ్ కోర్ప జసు నాయ్. జాకయ్ తుమ్ కీసి నంప జస్తె, నెతుర్చు.

45 “జలె, అబ్బొసి జలో దేముడుచి మొక్కె తుమ్క నేరిమ్ వయడ్డొసా ఆవ్ మెన తుమ్ ఉచర నాయ్. ‘మోసేచి అత్తి ప్రబు రెగిడ్డి ఆగ్గుల్ నంపజలమ్, చి జాకయ్ రచ్చించుప జమ్దె.’ మెన, తుమ్క తుమి ఉచర్తను. గని జయి బోదన తుమ్క నేరిమ్ వయడ్డె అస్సె. 46 మోసే పూర్గుమ్చొచి అత్తి దేముడు రెగిడ్డిసి కోడు తుమ్ నంప కెర్తదు జలె, అంకయ్ నంప కెర్తదు! కిచ్చొక మెలె, అంచి రిసాయి జో రెగిడ్డె. 47 గని మోసే రెగిడ్డిసి తుమ్ నంప నే కెర్తె, ఆవ్ సంగిత కొడొ కీసి నంప కెర్తె!” మెన జేవ్ వెల్లెల మాన్సుల్క యేసు సంగిలన్.

6

పావ్ వెయిల్ జిన్క యేసు అన్నిమ్ దిలిసి

(మత్త 14:13-21; మార్కు 6:30-44; లూకా 9:10-17)

1 ఇన్నెచి పడ్డె యేసు గలిలయ ప్రాంతుమ్తె అన్నె గెచ్చ, జా గలిలయచి సముద్రమ్ గాడు జిన ఒత్తల్తొ గెలన్. జా గాడుక

‘తిబెరియ గాడు’ కి మెనుల. ² జలె, జబ్బుల్ క జో యేను చెంగిల్ కెర్త దేముడు అబ్బొసి దిలి అదికారుమ్ క రుజ్జు దెకయ్ త కమొ జేవ్ దెక తిలి రిసా, ఒగ్గర్ జిన్ జనాబ్ గాడుచి ఒడ్డువాట్ ఇండ యేనుచి పట్టి గెచ్చుక బార్ జల. ³ జలె, యేను జోచ సిస్సుల్ తెన్ ఏక్ మెట్టయ్ వెగ, వెస అస్తి. ⁴ యూదుల్ చి *పస్కా మెంతి పండుగు అన్నెక్ సుట్టు పాసి జెతయ్. ⁵ యేను దెకిల్ పొది, ప్రెజల్ జట్టు జట్టు తెన్ జోతె జెతిసి దెక, పిలివ్ మెలో సిస్సుడుక “ఈంజేవ్ ప్రెజల్ కతి రిసా అమ్ కిసి అన్నిమ్ గెనుక?” మెన పుసిలన్. ⁶ కిచ్చొ కెరుక గే యేను జానె, గని, జోచి రిసా పిలివ్ కెడ్డి దయిరిమ్ తెన్ నంపజతయ్ గే దెకితి రిసా దస్సి మెన యేను పుసిలన్.

⁷ జలె, పిలివ్ జోక, “ఈంజేవ్ మాన్సుల్ ఎత్కిజిన్ క ఇదిల్ ఇదిల్ జవున్ దెంక జలె, †వెయి వెండ్లుచ పోడియొ జలెకు నే బెరె” మెన సంగిలన్. ⁸ గని సీమోను పేతురు మెలో సిస్సుడుచొ అంద్రెయ మెలో బావోని జేవ్ సిస్సుల్ తె అస్సె. ⁹ ఈంజో, జలె యేనుక “ఓదె, ఇన్నె తిలో ఇదిలోసా నాడు ఎక్కిలోక పాచ్ పోడియొ చి దొన్ని ఇదుర్ల మొస్సు అస్తి, గని ఎత్కిజిన్ క తెడ్డిలి కిసి వంట దెంక జయెదె!” మెన సంగిలన్. ¹⁰ యేను “ఎత్కిజిన్ క వెసవ దాస” మెన సిస్సుల్ క సంగిలన్. జలె, ఒత్త చెంగిలి వెసితి రితి గర్చి చివ్వర్ తిలి టాన్ ఒగ్గర్ అస్సె, చి ఎత్కిజిన్ ప్రెజల్ వెసిల. ఎక్కి మున్సుబోదల్ క లెక్క కెర్ల, జేవ్ మొత్తుమ్ పాసి పాసి పాచ్ వెయిల్ జిన్ జల.

¹¹ జలె, యేను జేవ్ పోడియొ నజన, “తూయి ఈంజ అన్నిమ్ దా దయ కెర్లది” మెన దేముడు అబ్బొన్ క ఉచర, వెన తిలన ఎత్కిజిన్ క పాచితి రితి వంట దిలన్. మొస్సుతెన్ కి దస్సి కెర, జేవ్ పేట్ బెర్తు కతి రితి వంట దిలన్.

* **6:4** 6:4 పూర్ణమ్ పొది యూదుల్ ఐగుప్తు దేసిమి తా గొతిమాన్సుల్ జలిన్ తెంతో ప్రబు రచ్చించువ కెర్లిసి ఏద కెర్ల పండుగు, ఈంజ. జా పండుగ్ క నే పులయ్ ల పోడియొ రిత పోడియొ కవుల. † **6:7** 6:7 నెంజలె, డోన్ పుంజోజిన్ మాన్సుల్ క ఏక్ దీన్ చి కూలి డబ్బుల్ దెతి ఎదిలి డబ్బుల్.

12 ఎత్కిజిన్ పేట్ బెర్తు కయ్లి పడ్డొ, “ఆరి పాడ్ జవున్ నాయ్ మెన, సేంసిల గండల్ గుడ్డ ఆన” మెన సిస్సుల్క యేసు సంగిలన్.

13 జలె, ఎత్కిజిన్ కయ్ల జేవ్ పాచ్ పొడియొచ సేంసిల గండల్ సిస్సుల్ గుడ్డెల. గుడ్డెలె, బార గంపల్ బెర్తు జల.

14 జలె, దేముడు అబ్బొసి దిలి అదికారుమ్క రుజ్జు దెకయ్లి ఈంజ కామ్ పైజల్ దెక కెర, “ఒహొ, ‘అంచి కబుర్ నూనయ్తోసొక బూలోకుమ్తె బార్ కెరిందె’ మెన దేముడు సంగిలోసొ ఈంజొయి” మెన సంగితె తిల. 15 తెదొడి, జోక రానొ కెర్తి రిసొ దెరుక మెన పైజల్ కోర్ప జల, గని జోవయించి ఉద్దెసుమ్ చిన కెర, యేసు జోవయింక ముల దా, ఎక్కిలో గెచ్చ, మెట్టయ్ అన్నె గెలన్.

యేసు పానిచి ఉప్పిరి ఇండితయ్

(మత్త 14:22-27; మార్కు 6:45-52)

16 సాంజ్ జతికయ్, అందర్ జంక దెర తిలి, చి యేసు జోవయింతె అన్నె ఉత్త జెంక నేతయ్చి రిసొ సిస్సుల్ “గెరి గెచ్చుమ!” మెన గడ్డె గెచ్చ, 17 జోవయించి దోనితె వెగ, గాడు ఒత్తల్తో తిలి కపెర్నహూమ్ పట్టుమ్తె గెచ్చుక మెన, దోని జినవుక దెర్ల.

18 ఇదిల్ దూరి జినయ్లి పొది, వాదు ఒగ్గర్ కెర్లి, చి వెల్లెల కెర్తల్ కెరుక దెర్లి. 19 దస వెల్లెల కెర్తల్ కెర్తెన్తె జేవ్ పాసి పాసి దొన్ని కోసుల్ దూరిక దోని ఇండయ్తికయ్, యేసు పానిచి ఉప్పిరి ఇండ జా, దోనిక పాసి పావెలన్. జో దస్సి పాసి ఇండ జెతె తతికయ్, సిస్సుల్ దెక, “డుంబొ, కిచ్చొ గే!” మెన, బియఁ గెల. 20 యేసు జోవయింక “తుమ్ బియఁ నాయ్. ఆవ్వి జెతసి” మెన దయిరిమ్ సంగిలన్. 21 తెదొడి సర్ల తెన్ జోకయి దోనితె వెగయ్ల, చి బేగి జేవ్ గెతి ఒడ్డుతె దోని పాచ గెలి.

పైజల్ యేసుక చజిలిసి

22 జలె, జా గెలి దీసి పొడియొ మొస్సు కయ్ల పైజల్ సగుమ్జిన్, అన్నెక్ దీసి ఎద గాడు ఒత్తల్తో రకితె అస్తి. ‘గెలి దీసి ఎక్కి దోని తిలి’ మెన, ‘యేసు జోచ సిస్సుల్ తెన్ దోనితె వెగె నాయ్, చి జో

నెంతె సిస్సుల్ ఉట్ట గెచ్చు తిల' మెన, జేవ్ ప్రెజల్ ఉచార కెర అస్తి. జాకయ్, యేసుచి రిసా 'మెట్టయ్ తెంతొ ఉత్త్ర జెంక నేతయ్. కిచ్చొగ్' మెన రకితె అస్తి. ²³ రకితె తిలె, తిబెరియ పట్టుమ్ తెంతొ, వేర దోనివొ అయ్ల. గెలి దీసి యేసు దేముడు అబ్బొన్క ఉచర వంట దిల పోడియె కయ్ల జేవ్ ప్రెజల్ తిలిస్తె, జలె, జేవ్ దోనివొ అయ్ల. ²⁴ జెతికయ్, జోచ సిస్సుల్ కి యేసు కి ఇన్నె నాయ్ మెన ప్రెజల్ దెక, జేవ్ అప్పె అయ్ల దోనివొతె వెగ, యేసుక చజాక మెన, కపెర్నూహూమ్ పట్టుమ్తె గెచ్చు పావెల.

పరలోకుమ్తె బెదితి సెక్తి దెతి పోడియె

²⁵ ప్రెజల్ గాడు జీన, యేసుక చజ, జో తిలిసి జానన "గురుబాబు, కెయ ఉట్ట అయ్లది?" మెన పుసిల. ²⁶ యేసు జోవయింక, "తుమ్ ఆవ్ నిజుమి కచితుమ్ కిచ్చొ మెంతసి మెలె, తుమ్ ఒత్త పేట్ బెర్తు పోడియె కా కెర సుకుమ్ జలి రిసా అంక చజాక అయ్లదు, గని అంచి అదికారుమ్క రుజ్జు దెకయ్లి జా కామ్చి గుర్తు అర్దుమ్ కెరల్లి రిసా నాయ్. ²⁷ అగ్ నుకుమ్ కెర్తి అన్నిమ్ గటచి రిసా తుమ్ ఉచరై తా నాయ్. జా ఎత్తి పాడ్ జతిసి. అన్నిమ్, మెన పరలోకుమ్తె బెదితి సెక్తి దెతిన్క టాలి కెర్లె, జయ్యి అన్నిమ్క కోర్ప జా. జయ్యి అన్నిమ్, జలె, కెయక తెయక తా గెతిసి. జయ్యి అన్నిమ్. జలె, ఆవ్ మాన్సు జా జెర్మన్ అయ్లోసా తుమ్క దెయిందె. జయ్యి తుమ్క ముక్కిమ్. జా దెంక అంక అదికారుమ్ కిసి తంక మెలె, దేముడు అబ్బొ, దేముడు, అంచి అదికారుమ్చి రిసా సాచి సంగ జోచి ముద్ద దా అస్సె," మెన ప్రెజల్క యేసు సంగిలన్.

²⁸ తెదొడి జేవ్ ప్రెజల్ జోక "దేముడుచ కమె అమ్ కెరుక మెలె, అమ్ కిచ్చొ కెర్లె జయెదె?" మెన పుసిల. ²⁹ యేసు జోవయింక "దేముడు తుమ్క కిచ్చొ పూచి తియార్తయ్ మెలె, ఆవ్ జో తెద్దయ్లోసాక తుమ్ పూర్తి నంపజంకయ్" మెన సంగిలన్. ³⁰ సంగితికయ్, జేవ్ జోక "జలె, 'జో తెద్దయ్లో రచ్చించువ కెర్లొసా తుయి' మెన అమ్ దయిరిమ్ తెన్ నంపజతి రిసా తుచి అదికారుమ్క

కిచ్చొ గుర్తు అమ్క దెకయ్తె? కిచ్చొ వెల్లి కామ్ కెర అమ్క రుజ్జు దెకయ్తె? ³¹ అమ్చ పూర్గుమ్చ వెల్లి బయిలె బుల్తె తిలి పొది, †‘మన్నా’ మెలి పోడియె రితిసి కతె తిల. జాకయ్, పరలోకుమ్తె తెంతో చి పోడియె రితిసి జోవయింక జో దిలో మెన దేముడుచ కొడొతె రెగ్గ అస్సి, గెద” మెన సంగిల.

³² పైజల్ యేసుక దస్సి సంగితికయ్, జో జోవయింక, “తుమ్క కిచ్చొ నిజమి కచితుమ్ ఆవ్ సంగితసి మెలె, తుమ్చ పూర్గుల్క పరలోకుమ్ తెంతో చి పోడియె మోసే దిలిసి నెంజె. దేముడు అబ్బొయి దిలిసి. జలె, తుమ్క నిజమ్ జలి పోడి రితి, నిజమ్ జలి పోడి దేముడు అబ్బొ అప్పె పరలోకుమ్ తెంతో తెద్రవ దా తుమ్క దెతయ్. ³³ దేముడు అబ్బొ దిలి జయ్యి పోడియె, కిచ్చొ జయెదె మెలె, పరలోకుమ్ తెంతో అప్పె రితి ఉత్త్ర అయ్లిసి. జయ్యి పోడి ఒండి లోకుమ్చక సరి జతి జీవ్ దెతిసి” మెన యేసు సంగిలన్.

³⁴ యేసు దస్సి సంగితికయ్, “బాబు, జయ్యి పోడి అమ్క దెతె తా” మెన పైజల్ సంగిల. ³⁵ జలె, యేసు జోవయింక, “సరి జతి జీవ్ దెతి జా పోడి ఆవ్వి. కో అంక పూర్తి నంపజా కీఅంచితె జెవుల గే, జోవయింక చూ, తాన్ కెయడ అన్నె కెరె నాయ్. ³⁶ గని, ‘అంక దెకిలెకి తుమ్ నంప కెర్పు నాయ్’ మెన తుమ్క అగ్గ తెంతో సంగితసి.

³⁷ “‘నంపజా రచ్చించుప జతు’ మెన కక్క దేముడు అబ్బొ అంచితె తెద్రయెదె గే, జెవుల, చి కో అంక నంపజా జెవుల గే, జోవయింక కెయడ కి ‘తుమ్క నెసి’ మెన ఉడడి నాయ్. ³⁸ ఆవ్ పరలోకుమ్ తెంతో అయ్లిసి కిచ్చొక మెలె, అంచి సొంత ఇస్టుమ్ అయ్లి రితి కెరుక నాయ్, గని, అంక తెద్రయ్లోసా సంగిలిసి నెరవెర్చుప కెరుకయ్. ³⁹ అంక నంపజతి రిసా కక్క జో అంచితె తెద్రయెదె గే, జోవయింతె కక్క నే పిట్టయ్తె, వెల్లి తీర్పు కెర్తి జా ఆకర్

† **6:31** 6:31 జా బయిలు దేసిమి బుల్తె తిలి పొది కిచ్చొ కతిసి యూదుల్క నాయ్, చి ఎత్తి అదికారుమ్ తిలో దేముడు రోజుక ఆగాసుమ్ తెంతో జా ‘మన్నా’ మెలిసి నువితె తిలన్. ఏక రగుమ్ పిట్టల్ కి సేడయ్తె తిలన్; ‘పోడ కతు’ మెన. నిర్దుకమాండుమ్ 16:1-36.

‡ **6:35** 6:35 మెలె ‘అంచి తెన్ బెదుల, అంచి రాజిమ్తె బెదుల’.

దీనిక, జోవయింక జియడ పరలోకుమ్తె బెదవుక అస్సె. ⁴⁰ మెలె, అంచొ అబ్బొసి జలో దేముడుచి ఇస్టుమ్ కిచ్చొ మెలె, 'దేముడు ప్రబుచొ ఎక్కి పుత్తుసి ఈంజొయి', మెన 'ఈంజొయి అమ్క దొర్కు జలో రచ్చించువ కెర్తొసొ' మెన, కో అంక చిన పూర్తి నంపజవుల గే, పరలోకుమ్తె బెదితి జీవ్ జోవయింక దొర్కు జయెదె, చి వెల్లి తీర్పు కెర్తి జా ఆకర్ దీనిక జోవయింక జియడ పరలోకుమ్తె బెదయిందె. ఈంజయ్ అబ్బొసి జలో దేముడుచి ఇస్టుమ్' మెన యేసు సంగిలన్.

యేసుచి రిసొ యూదుల్ అన్మానుమ్ జలిసి

⁴¹ 'పరలోకుమ్ తెంతొ ఉత్ర అయ్లి పొడి ఆవ్వి' మెన యేసు సంగిలి రిసొ, ఒత్త తిల జేవ్ యూదుల్చ వెల్లెల మాన్సుల్ జోచి రిసొ కోవుమ్ జా, ⁴² ఇసి మెన లట్టబన్ల. "ఈంజొ యేసు యోసేపుచొ పుత్తుసి, గెద. జోచ అయ్యస్అబ్బొన్క జానుమ్, గెద. దస్సి జలె, 'పరలోకుమ్ తెంతొ ఉత్ర అయ్లయ్' మెన కిచ్చొక సంగితయ్?" మెన ఆసిల.

⁴³ జేవ్ దస్సి జతికయ్, యేసు జోవయింక కిచ్చొ జబాబ్ దిలన్ మెలె, "ఆవ్ సంగిలిన్చి రిసొ అన్మానుమ్ జా లట్టబన నాయ్.

⁴⁴ అంక తెద్రయ్లో దేముడు అబ్బొ మాన్సుచి పెట్టి జోవయింక సికడ బుకార్లెకయ్ జేవ్ అంక నంపజా జెవుల. అయ్లె, వెల్లి తీర్పు కెర్తి జా ఆకర్ దీనిక జోవయింక జియడ పరలోకుమ్తె బెదయిందె.

⁴⁵ పూర్గుల్చి అత్తి సంగిల దేముడుచ కబుర్లుచ కొడొతె రెగ్గ అస్సె.

దేముడు జేవ్ ఎత్కిజిన్క సొంత సికడెదె"

మెన రెగిడ్లి కోడు. దేముడు అబ్బొ జోవయింక సంగిలిసి కో నూన సికుల గే, అంక నంపజా జెవుల.

⁴⁶ "జోతె తెంతొ అయ్లొసొక పిట్టవ, కోయి దేముడు అబ్బొక కెయె దెకితి నాయ్. ఎక్కిలోయి జోక దెక అస్సె. ⁴⁷ జలె, ఆవ్ తుమ్క కిచ్చొ నిజుమి కచితుమ్ సంగితసి మెలె, అంక కో సత్తిమ్ తెన్ నంపజవుల గే, జేవ్ నంపజలి తెంతొ, పరలోకుమ్చి రాజిమ్తె బెదయ్ అస్తి.

⁴⁸ సరి జతి జీవ్ దెతి పొడి, ఆవ్వి.

49 “తుమ్చ పూర్ణమ్చ జా వెల్లి బయిలె బుల్తె తిలి పొది ‘మన్నా’ మెలి జా పోడి కయ్లెకి, మాములుమ్ మొర్తి సమయుమ్ జా అయ్లె పొది, మొర గెల. 50 ఆవ్ అప్పె సంగితిసి, జలె, పరలోకుమ్ తెంతో దొర్కు జతి ఈంజయ్ పోడి, జలె, కిచ్చొక ఉత్ర జా అస్సె మెలె, ఈంజయి పోడి, కో కవుల గే, మొర్లె పొది సిచ్చ తిలి మొర్లుతె గెతి నాయ్. 51 పరలోకుమ్ తెంతో ఉత్ర అయ్లి జీవ్ దెతి పోడి ఆవ్వి. ఈంజయ్ పోడి కో కవుల గే, పరలోకుమ్తె గెచ్చ కెయ్చ తెయ్చ చెంగిల్ జవుల. జలె, ‘జోవయించి పాపుమ్చి సిచ్చ జతి మొర్లుతె గెతు నాయ్, గని అంచి వరుమ్ నజ రచ్చించుప జతు’ మెన ఆవ్ కిచ్చొ పోడి దెయిందె మెలె, అంచి *ఆగ్” మెన సంగిలన్.

52 యేసు జా సంగితికయ్, యూదుల్చ వెల్లెల మాన్సుల్ బమ్మజా, “అమ్ కతి రిసా ఈంజో మాన్సు జోచి ఆగ్ అమ్క కీసి దెంక జయెదె?” మెన ఎక్కిలో తెన్ ఎక్కిలో లట్టబ్బె తిల. 53 జాకయ్ యేసు జోవయింక, “తుమ్క ఆవ్ నిజమి కచితుమ్ కిచ్చొ సంగితసి మెలె, ఆవ్ మాన్సు జా జెర్మున్ అయ్లొసాచి ఆగ్ తుమ్ నే కయ్లె, అంచి లొయి తుమ్ నే పిల్లె, తుమ్చి పెట్టి కిచ్చొ జీవ్ తయె నాయ్. 54 అంచి ఆగ్ కో కవుల గే, అంచి లొయి కో పివుల గే, దేముడుచి రాజిమ్తె బెదితి జీవ్ జోవయింక దొర్కు జా అస్సె, చి వెల్లి తీర్పు కెర్తి జా ఆకర్ దీసిక, జోవయింక జియడ, పరలోకుమ్తె బెదయిందె. 55 జాకయ్, అంచి ఆగ్ ముక్కిమ్ జలి అన్నిమ్, అంచి లొయి ముక్కిమ్ జలి పితిసి జయెదె. 56 కో అంచి ఆగ్ కతి రితి అంచి లొయి పితి రితి జతతి గే, జో అంచి పెట్టి తత్తతి, చి ఆవ్ జోచి పెట్టి తయిందె.

57 “జీవ్ తిలొ దేముడు అబ్బొ అంక ఈంజ లోకుమ్తె తెద్రయ్లొ. జోచి జీవ్ అంచి పెట్టి అస్సె, చి జోచి జీవ్కయ్ ఆవ్ జితసి. దస్సి అంకయ్ కో కయ్లి రితి జా అంక జోచి పెట్టి తియనుల గే, అంచి జీవ్చి రిసా జేవ్ కి జివుల. 58 పరలోకుమ్ తెంతో ఉత్ర అయ్లి పోడి ఈంజయి. తుమ్చ పూర్ణమ్చ కయ్లి రగుమ్ నెంజె. గని, ఈంజయ్

* 6:51 6:51 ఈంజ లోకుమ్చి పాపుమ్ గెచ్చయ్తి రిసా జో అర్పితుమ్ జంక తిలిన్చి రిసా ‘అంచి ఆగ్ దెయిందె’ మెన యేసు టాలి సంగితయ్.

పోడియో కో కవుల గే, పరలోకుమతె గెచ్చు కెయఁక తెయఁక జివుల”
మెన యేసు సికథన్. 59 యేసు కపెర్నూహామ్ పట్టుమ్చి జేవ్
యూదుల్చి నబ గెరి ఇసి మెన సికథన్.

యేసు సంగిలి బోదనచి రిసా జో తెన్ బులుక ములిలిసి

60 యేసుక ఇదిల్ నంపజా సిస్సుల్ జంక దెర్ల మాన్సు, జలె, జో
సంగిలిసి నూన కెర, జోవయింతె సగుమ్జిన్ బమ్మ జా, “జా కోడు
అల్లర్చి! జా కోడు కో నూనుల!” మెన సంగిల. 61 జో నిసాన్ల
సిస్సుల్ కి అన్మానుమ్ లట్టబ్తతి మెన యేసు పెట్టి జానిలన్, చి
“ఆవ్ అప్పె సంగిలిసిచి రిసా తుమ్ అన్మానుమ్ జతసు గే? 62 జలె,
ఆవ్ మాన్సు జా జెర్మున్ అయ్లోసా ఆవ్ అగ్గె తిలిన్తె అన్నె వెగ
గెతిసి తుమ్ దెకిలె, కిన్ జస్తె! 63 జివ్ తిలెకయ్ మాన్సు జియెదె.
జివ్ నెంజిలె, ఆగ్ కామ్క నెంజె. ముక్కిమ్ జలి ఆవ్ సంగిలి
జివ్ కిచ్చొతె మెలె, ఆవ్ తుమ్క సంగిల కొడెతెయ్ అన్సు. 64 గని
తుమ్చితె సగుమ్జిన్ నంపజతి నాయ్” మెన జోవయింక సంగిలన్.
జోవయింతె కో నంపజతి నాయ్ గే, అన్నె పడ్డొక జోక మార్తసచి అత్తి
కో దెర దెయెదె గే, యేసు అగ్గె తెంతో జానె. 65 తెదొడి అన్నె, “జాకయ్
‘దేముడు అబ్బొ జా సెక్తి దిలెకయ్, నెంజిలె కో కి అంక నంపజంక,
అంచితె జెంక నెతిర్తి’ మెన తెదొడి సంగిలయ్” మెన సంగిలన్.

66 జలె, జా దీసి జో సంగిలిసి ఓర్పువ జంక నెత్త కెర, జోవయించి
పట్టి గెతె తిలనతె ఒగ్గర్జిన్ సిస్సుల్ అన్మానుమ్ జా, ఒత్త తెంతో
జో తెన్ బుల్లి నాయ్. 67 జేవ్ దస్సి జతికయ్, జో నిసాన్ల బారజిన్
సిస్సుల్క యేసు, “తుమ్ కి అంక ముల దా ఉట్టు గెతె గే?” మెన
పుసిలన్. 68 “ప్రబు, అమ్ అన్నె కత్తెయ్ గెచ్చుమ్దే? దేముడుచి
రాజిమతె బెదుక కిసి గే తుచయ్ కొడెతె నూనుక జతయ్, గని అన్నె
కత్తెయ్ నాయ్. 69 జాకయ్ ‘దేముడుచి సుద్ది తిలోసా† క్రిస్తు తుయి’
మెన తుకయ్ అమ్ నంపజా అస్సుమ్, కచితుమ్ జానుమ్” మెన
సిమోను పేతురు దయిరిమ్ తెన్ సంగిలన్.

† 6:69 6:69 దేముడు తెద్రయ్లో రచ్చించుప కెర్తొసా జలోసా,

70 తెదొడి యేసు జేవ్ బారజిన్ కిచ్చొ జాగర్త సంగిలన్ మెలె, “తుమ్ బారజిన్ ఎత్కిక ఆవ్ నిసాన్లయ్, గెద. గని, తుమ్చితె కి సయ్తాన్చొ సేవ కెర్తొసా ఎక్కిలో అస్సె” మెన సంగిలన్. 71 కచి రిసా దస్సి సంగిలో మెలె, సీమోసు ఇస్కరియోతు మెలో ఎక్కిలోచొ యూదా మెలో పుత్తుస్చి రిసా. కిచ్చొక మెలె, పడ్డొ, జేవ్ జోక మార్తి రిసా, విరోదుమ్ సుదల్చి అత్తి యూదా యేసుక దెర దెయెదె మెన తెదొడి కి యేసు జానె.

7

1 జా మదెనె, యూదుల్చ వెల్లెల మాన్సుల్ జోక మారుక కోర్ప జా అస్తి మెన యేసు జానెచి రిసా జోవయింక ముక్కిమ్ తిలి యూదయ ప్రదేసిమ్తె గెచ్చె నాయ్, గని గలిలయ ప్రాంతుమ్తె బుల్తె తిలో. 2 జలె, యూదుల్చి అన్నెక్ పండుగు పాసి జా అయ్లి. జాక ‘కుడియల్ పండుగు’ మెనుల. 3 జలె, యేసుచ బావుడ్చివో జోక కిచ్చొ మెల మెలె, “ఒత్త తిల తుచ సిస్సుల్ జల మాన్సుల్ దెకితి రిసా, ఈంజ డొగుర్ దేసిమ్ ముల దా, * యూదయ ప్రదేసిమ్తె గెచ్చె, తుచ వెల్లెల కమె ఒత్తయ్ కెరు. 4 మెలె, ‘అంచి అదికారుమ్ మాన్సుల్ చినుతు’ మెన ఎక్కిలోచి ఆస జలె, జోచ కమె కో నెంజితె కెరె నాయ్. ఒగ్గర్జిన్ తిలిన్తె కెరెదె. తుయి వెల్లెల కమె కెర్తసి జలె, ఎత్కిజిన్ దెకితి రితి ఒత్త కెరు” మెన సికడుక దెర్ల. 5 జోచి అయ్యున్చి పెట్టి జెర్మిల ఈంజేవ్ బావుడ్చివో కి జోక ‘దేముడు తెద్రయ్లో క్రీస్తు రచ్చించుప కెర్తొసా’ మెన నంప కెర్తి నాయ్.

యేసు దిలి జబాబ్

6 జేవ్ దస్సి సంగితికయ్, యేసు జోవయింక, “ఆవ్ గవురుమ్ జతి సమయుమ్ జెంక నేతయ్. తూమ్, మాత్రుమ్, కెడ్డొడ్ తెదొడ్ గవురుమ్ జంక జతయ్. 7 జేవ్ కెర్తి రితి తూమ్ కి కెర్తనుచి రిసా, ఈంజ లోకుమ్చ మాన్సుల్ తుమ్క విరోదుమ్ దెకుక నెత్తిర్తి, గని

* 7:3 7:3 ‘యూదయ ప్రదేసిమ్తె గో’ మెన కిచ్చొక సికడ్డతి మెలె, యెరూసలేమ్ పట్టుమ్ చి దేముడుచి గుడి జయి ప్రదేసిమి తవుల, చి పండుగ్క మాన్సుల్ ఒత్తయ్ బెర తవుల.

జోవయించ కమొక 'గర్బ' మొన ఆవ్ తీర్పు సంగితనివి రిసా అంక విరోదుమ్ దెకితతి. ⁸ తుమి ఒత్త గెచ్చు పండుగు కెర. ఆవ్ అప్పెచి మట్టుక ఈంజ పండుగక గెచ్చి నాయ్. ఆవ్ గెతి సమయుమ్ పూర్తి జెంక నేతయ్" మొన సంగ, ⁹ యేసు గలిలయతె తా గెలో.

కుడియల్ పండుగు కెర్తినతె యేసు గెలిసి

¹⁰ జలె, జోవయించ బావుడ్చివో పండుగతె ఉట్ట గెలి ఇదిల్ పడ్డె, యేసు కి గెలన్. ఎత్తిజిన్ దెకిత్ రితి నాయ్, గని కో నేన్లి రితి గెలన్. ¹¹ జా మదెనె, పండుగతె గెల యూదుల్చ వెల్లెల మాన్సుల్ 'యేసు కేతె?' మొన జోక చజతె తిల. ¹² ప్రెజల్ కి జోచి రిసా జోవయింతెన్ ఇనయింతెన్ లట్టబై తిల. "జో చెంగిలో మాన్సు" మొన సగుమ్జిన్ సంగితె తిలె, "నాయ్, ప్రెజల్క మోసిమ్ కెర్తయ్" మొన అన్నె సగుమ్జిన్ సంగితె తిల. ¹³ గని వెల్లెల మాన్సుల్క బియె కెర, జోచి రిసా కో ఎదార్దుమ్ లట్టబై నాయ్.

దేముడుచి గుడితె యేసు బోదన కెర్తినె

¹⁴ జలె, సగుమ్ పండుగ్ కేడ్లి పొది, యేసు దేముడుచి గుడితె గెచ్చు, తెడి పెన, బోదన కెరుక దెర్లన్. ¹⁵ జోచి బోదన సూన కెర, యూదుల్చ వెల్లెల మాన్సుల్ "అమ్చి తెన్ ఈంజో మాన్సు కెయ నే నదు కెర్లె కి, బలే తెలివి తెన్ బోదన కెర్తయ్, కిసి?" మొన ఆచారిమ్ తెన్ లట్టబన్న. ¹⁶ జాచి రిసా యేసు జోవయింక కిచ్చొ జబాబ్ దిలన్ మెలె, "ఆవ్ కెర్తి బోదన ఆవ్ ఉచర్లిసి నెంజె. ఈంజ అంక తెర్తయ్లోసాచి బోదన. ¹⁷ అంక తెర్తయ్లోసాచి ఇస్టుమ్ రితి కెరుక కో కోర్ప జవుల గే, జెవ్వి అంచి బోదన సూన్లె, జేవ్ 'దేముడు సికడ్లిసి జయెదె గే, నాయ్ మెలె, ఆవ్ ఉచర్లిసి జయెదె గే' జోవయించి పెట్టి చినుల. ¹⁸ గవురుమ్ ఆననుక ఆస జలస, జలె, జేవ్ జేవ్చి ఉచర్లిసి సికడుల. గని, జోక తెర్తయ్లోసాచి గవురుమ్ దెకవుక ఆస జలోసా జలె, సత్తిమ్చొ జయెదె, జోతె కిచ్చొ అబద్దుమ్ తయె నాయ్.

19 “మోసే పూర్ణమచో దేముడుచ ఆగ్గుల్ తుమ్చి రిసా దేముడుచ ఆగ్గుల్ రెగ్ల దిలన్. గని ఒత్త తిల ఆగ్గుల్ రితి తుమ్చితె కో కి నిదానుమ్ కెర్పు నాయ్. నెంజిలె, కిచ్చొక అంక మారుక కోర్ప జతసు?” మెన సంగిలన్. 20 యేసు దస్సి సంగితికయ్, ప్రైజల్ తుక “బూతుమ్ దెర అస్సె, కిచ్చొగె, చి దస్సి సంగితసి! కో తుక మారుక కోర్ప జతతి?” మెన సంగిల.

21 జలె, యేసు జోవయింక, “ఆవ్ జా సెలవ్ కడన్లి దీసి జో రోగిక చెంగిల్ కెర్లి కామ్ కెర్లయ్, చి ‘కామ్ కెర సెలవ్ కడన్లి దీసిచి ఆగ్గు పిట్టుయ్లో’ మెన తుమ్ ఎత్తిజిన్ అంచి రిసా బమ్మ జతసు. 22 తుమ్ ఉచర. ‘తుమ్ యూదుల్క మున్నుబోద జెర్మిలె, జోవయింక దేముడుచో మాన్సు జవున్’ మెన సున్నతి కెరనుక, జో బోదక ఇదిలిన్ సుద్ది కెర† మెన మోసే పూర్ణమచో రెగిణ్ణె, గెద. జా కారిమ్, జలె, మోసే తెన్ మొదొల్ జలిసి నెంజె. జోచి కంట అగ్గెచ పూర్గుల్ కి దస్సి కెర్తె తిల. గని సున్నతి కెర మెన ఆగ్గుల్తె రెగిణ్ణె. జాకయ్, ఏక్ నాడు జెర్మ అట్టు పొదుల్ జలిసి సెలవ్ కడన్లి దీసి సేడ్లె, జా ఆగ్గు పిట్టున్ నాయ్ మెన, జయ్యి దీసి, సెలవ్ కడన్లి దీసి జలెకి, జా కామ్ కెర్తసు. 23 జలె, ‘మోసే రెగిణ్ణె దేముడుచి ఆగ్గుల్ తెన్, ఈంజ ఏక్ ఆగ్గు పిట్టున్ నాయ్’ మెన సెలవ్ కడన్లి దీసి కి ఏక్ మాన్సుకి సున్నతి కెరుక జయెదె జలె, సెలవ్ కడన్లి దీసి కి ఏక్ ఒండొయి మాన్సుచి ఆగ్గ్ చెంగిల్ కెరుక నెంజె గె? 24 జలె, కిచ్చొ జవున్ జర్గు జా తిలె, ఇసి గే దస్సి గే డీసిలి రిసా ‘ఆగ్గు పిట్టి’ జవున్, నాయ్ మెలె, ‘ఆగ్గు పిట్టె నాయ్’ రిత ఆగ్గుల్క నంపజా అస్సున్. దస్సి, అర్దుమ్ నెంతె, కన్కారుమ్ నెంతె తీర్పు కెరుక పొన. ఆగ్గుచి అర్దుమ్, జర్గు జలిన్చి అర్దుమ్, సరిగా ఉచర తీర్పు కెర” మెన జేవ్ వెల్లెల మాన్సుల్క యేసు సంగిలన్.

యేసుచి రిసా ఈంజొయి క్రీస్తు గే

25 యేసు దస్సి బోదన కెర్తికయ్, యెరూసలేమ్ పట్టుమ్చ మాన్సుల్ సగుమ్జిన్ “ ‘జోక మారుమ’ మెన వెల్లెల మాన్సుల్ కోర్ప

† 7:22 7:22 సున్నతి

జలోసా ఈంజొయి, కిచ్చొగె. 26 గని, ఈందె, జోపయించి మొక్కె దయిరిమ్ తెన్ బోదన కెర్తయ్, గని జోక 'పోని' కి మెంతి నాయ్. జలె, జోక 'తెద్రయిందె' మెన దేముడు సంగిలో 'దొర్కు జలో రచ్చించుప కెర్తొసా జతో క్రీస్తు ఈంజొయి' మెన ఏక్ వేల అదికారుల్క రుజ్జు జా అస్సె గె? 27 నాయ్, కిచ్చొగె. మెలె, ఈంజొ మాన్సు కేనె తెంతో అయ్లో గే †జానుమ్. గని క్రీస్తు అయ్లెగిన, కేనె తెంతో జెతయ్ గే కక్క నేన్తె జయె నాయ్" మెన ఉచర లట్టబన్ల.

28 జేవ్ ఉచర్లెసి యేసు జాన్లి రిసా, దేముడుచి గుడితె బోదన కెర్తె తిలి పొది, ఇసి మెన కేక్ గలన్. " 'జోక జానుమ్! జో కేనె తెంతో అయ్లో గే అమ్ జానుమ్!' మెన, అంచి రిసా తుమ్ ఉచర్లను జలె. గని నేన్సు. ఆవ్ అవ్వి జెంక నాయ్. అంక తెద్రయ్లోసా సత్తిమ్ తిలోసా. జోక తుమ్ నేన్సు. 29 ఆవ్ మాత్రుమ్, జోక జాని. కిసి మెలె, ఆవ్ జోతె తెంతో ఉత్ర అయ్లయ్. జొయ్యి అంక తెద్రయ్లన్" మెన సంగిలన్.

30 యేసు దస్సి సంగితికయ్, జేవ్ వెల్లెల మాన్సుల్ "జోక జేలి కెరుమ!" మెన ఉచర్ల, గని జోక కో దెర్తి నాయ్. కిచ్చొక మెలె, అబ్బొన్తె జో గెతి సమయుమ్ తెదొడి జెంక నేతయ్.

31 యేసుక వెల్లెల మాన్సుల్ దస్సి విరోదుమ్ జలెకి, మాములుమ్ పైజల్, జలె, ఒగ్గర్జిన్ జోక నంపజల. "ఈంజొ మాన్సు ఒగ్గర్ ఒగ్గర్ వెల్లెల కమె కెర్తయ్. క్రీస్తు మెలో అమ్చొ రచ్చించుప కెర్తొసా అయ్లె ఇసి తయెదె. అన్నె వెల్లెల కమె కెరుక కో తెరితి గే? ఈంజొ జొయ్యి, కిచ్చొగె" మెన నంపజల.

32 పైజల్ యేసుక నంపజలి రితి జా ఎక్కిలో తెన్ ఎక్కిలో ఇసి తిరిమ్ లట్టబంతిసి పరిసయుల్ సూన్లచి రిసా "జోక జేలి కెరుక దెర జా!" మెన దేముడుచి గుడితెచ జమాన్లక వెల్లెల పూజర్లు చి పరిసయుల్ తెద్రయ్ల.

† 7:27 7:27 'నజరేతు గవ్వి తెంతో అయ్లో' మెన ఉచర్లతి. నేన కెర 'జానుమ్' మెంతతి గని పరలోకుమ్ తెంతో అయ్లో గెద.

33 జలె, జా మదెనె యేసు అన్నె బోదన కెరె తా, “అన్నె సగుమ్ దీసల్ తుమ్చి తెన్ తయిందె, చి తెదొడ్క అంక తెద్రయ్లోసాతె అన్నె ఉట్ట గెచ్చిందె. 34 ఆచ్ ఉట్ట గెలి పడ్డొ తుమ్ అంక చజితె, గని అంచితె పావుక నెతుర్సు. ఆచ్ కేనె తయిందె గే, తుమ్ ఒత్త జెంక నెతుర్సు” మెన సంగిలన్. 35 జాకయ్ యూదుల్చ వెల్లెల మాన్సుల్ ఎక్కిలోక ఎక్కిలో “అమ్ నే పావితీ రితి ఈంజొ కేనె గెచ్చెదె? గ్రీకు దేసిమి తిల చెదుర్ప జల అమ్చ యూదుల్తె గెచ్చు, గ్రీసు దేసుమ్చ సుదల్క బోదన కెరెదె గే? 36 నాయ్ మెలె, ‘తుమ్ అంక చజితె కి అంచితె పావుక నెతుర్సు’ మెన ‘కేనె తయిందె గే, తుమ్ ఒత్త జెంక నెతుర్సు’ మెన కిచ్చొక సంగిలన్?” మెన లట్టబనుక దెర్ల.

37 జా పండుగ్చి ఆకర్ దీసి అయ్లి. జాక ‘వెల్లొ దీసి’ మెనుల. జా దీసి, ఎత్కిజిన్ బెర తిలిన్తె యేసు టీచ జా, ఇసి మెన కేక్ గలన్. “కక్క జలెకు తాన్ కెరె, అంచితె జా పివుసు. 38 కో అంక పూర్తి నంపజవుల గే, దేముడుచి కొడొతె రెగ్డయ్లి రితి, జోచి పెట్టి తెడి ఊంట పుట్టి రితి జా, జివ్ దెతో పాని జోచి ఆత్మ చెంగిల్ కెరె తయెదె” మెన, ఎత్కిజిన్ సూన్తి రితి యేసు సంగిలన్.

39 ‘జివ్ దెతో పాని’ మెన కిచ్చొచి గుర్తుక సంగిలన్ మెలె, దేముడుచి సుద్ది తిలి ఆత్మచి గుర్తుకయ్. యేసు మొర దేముడు అబ్బొన్తె అన్నె గెలె, జోక కో నంపజా తవుల గే, జోచి జా ఆత్మ జోవయించి పెట్టి జెయెదె. జలె, యేసు తెదొడి అబ్బొన్తె అన్నె గెచ్చుక, గవురుమ్ జంక, నేతయ్చి రిసా, జో సంగిలి జా ఆత్మ తిలిసి తెదొడి జర్గు జంక నేతయ్.

40 యేసు దస్సి బోదన కెర్తికయ్, సూన కెర జోచి రిసా ప్రెజల్ సగుమ్జిన్ కిచ్చొ మెలె, “ ‘తెద్రయిందె’ మెన దేముడు సంగిలో జోచ కబుర్లు సంగుక జెంక తిలోసా ఈంజొ నిజుమ్ జా తయెదె” మెన సంగిల. 41 గని అన్నె సగుమ్జిన్ “తెద్రయిందె మెన దేముడు సంగిలో క్రీస్తు రచ్చించువ కెర్తొసా జా తయెదె” మెల, గని “నెంజె. ఈంజొ

గలిలయ ప్రాంతమచో మాన్సు. క్రీస్తు, జలె, గలిలయతె జెర్కుక నెంజె. 42 ఈందె, దేముడుచి కొడొతె రెగిడ్లి రితి, అమ్చో రానొ జలో దావీదు పూర్ణమచోచి సెకుమతె క్రీస్తు జెర్కెదె. దావీదుచి గావ్ బేల్లెహేమ్. ఒత్తయ్ జో జెర్కుక అస్సె. దస్సి జలె ఈంజొ క్రీస్తు జయె సీనాయ్” మెన సంగిల. 43 దస్సి జతికయ్, జోచి రిసా ప్రెజల్ దొన్ని మెన్ను జల. 44 జోవయింతెన్ సగుమ్జన్ “జోక జేలి కెర్తు!” మెన కోర్ప జల. గని జోక దెరుక మెన కో చడితి కి *నాయ్.

దేముడుచి గుడిచ అదికారుల్ కోపుమ్ జలిసి

45 తెదొడి, జోక దెర్తి రిసా గెచ్చ తిల జమాన్లు వెల్లెల పూజర్లు చి పరిసయ్యుల్ తిలిన్తె అన్నె అయ్ల. జెతికయ్, జేవ్ పరిసయ్యుల్, పూజర్లు, “కిచ్చొక జోక దెర ఆన్సు నాయ్?” మెన గోల కెర్ల. 46 గోల కెర్తికయ్, జేవ్ జమాన్లు, “కేన్ మాన్సు కెయె తెద్ది చెంగిల్చి బోదన సంగె నాయ్” మెన సాచి సంగిల. 47 పరిసయ్యుల్ కోపుమ్ జా జోవయింక కిచ్చొ జబాబ్ దిల మెలె, “తూమ్ కి జోచ కొడొక మోసిమ్ జలదు గే? 48 అమ్ పరిసయ్యుల్తె జవున్, అమ్చ అదికారుల్తె జవున్ కో జలెకు జోక నంపజా అస్సుమ్ గే? నాయ్, గెద. దస్సి జలె, తూమ్ కిచ్చొక జోక నంప కెరుక? 49 మాములుమ్ ఈంజేవ్ ప్రెజల్ నంప కెర అస్తి, గని మోసే తెన్ దేముడు దిలి ఆగ్గుల్ నేన్తి జేవ్క కిచ్చొ పున్నిమ్ నాయ్, దేముడుక నేన్తి” మెన ప్రెజల్ నంపజలిన్క వెల్లెల మాన్సుల్ నిస్కారుమ్ సంగిల.

50 యేసుతె అగ్గె రాతి లుంకచోరు కిచ్చొగె పునుక గెచ్చ తిలో నీకొదేమొ మెలో పరిసయ్యుడు, జలె, జో వెల్లెల మాన్సుల్తె అస్సె. 51 అన్నె తిల జేవ్ వెల్లెల మాన్సుల్క జో, జలె, “కేన్ జలెకు మాన్సుక

§ 7:42 7:42 నిజామి బేల్లెహేమ్తె, దావీదు రానొచి సెకుమతె జెర్కిలన్; మత్తయి 1:1, 2:1; గని నేన కెర దస్సి మెల. * 7:44 7:44 జో అబ్బొన్తె అన్నె గెతి సమయ్యుమ్ జంక నేతయ్చి రిసా దెరుక నెత్తిర్ల. అన్నె సగుమ్ సుట్టు కి వెల్లెల మాన్సుల్ అల్లర్ కెరుక ఉచర్లె కి, నెత్తిర్ల; లూకా 4:29-30, యోహాను 7:30, 8:20. జోవయించి సమయ్యుమ్ జా అయ్లీ పొది జేవ్ దెరుక జో ఒప్పణ్ణె; మత్తయి 26:53-54, మార్కు 14:41, యోహాను 18:4, 6.

నేరిమ్ వయడ తిలె, దేముడు మోసే తెన్ దిలి ఆగ్గుల్తె రెగ్డయ్లి రితి జో మాన్సు సంగన్తి సాచి నే సూన్తె అగ్గె, జో కిచ్చొ కెర్లొ గే నాయ్ గే, రుజ్జు నే దెకయ్తె అగ్గె జోక తీర్పు కెర సిచ్చు కెరుక అమ్చి తెన్ నాయిమ్ గే? నాయ్, గెద” మెన జాగర్త సంగిలన్. 52 జేవ్ అన్నె పండితుల్ నీకొదేమొక కిచ్చొ జబాబ్ దిల మెలె, “తూయి కి గలిలయచొ గే, చి జోచి పచ్చెనచి కోడు తుయి సంగితన్? దేముడుచి కొడొ సరిగా సదు కెరు, చి దేముడుచ కబుర్లు సంగితన్ కో కి †గలిలయతె జెర్మితి నాయ్ మెన దెకితె” మెన సంగిల.

53 తెదొడి ఎత్కిజిన్ జోవయించ గెరలె ఉట్ట గెల.

8

వెల్లెల మాన్సుల్ తేర్బోదక దెర యేసుతె కడ ఆన్లసి

1 *యేసు, దేముడుచి గుడి తెంతొ బార్ జా, జేవ్చి మొక్కె తిలి †బలీవ మెట్టయ్ ఎక్కిలొ గెలన్. 2 చి రాత్ పాయితికయ్, దేముడుచి గుడితె అన్నె ఉట్ట అయ్లో. అయ్లె, ఒగ్గర్జిన్ జనాబ్ అయ్ల, చి జో వెస కెర, జోవయింక బోదన కెరుక దెర్లన్. 3 యేసు బోదన కెరె తతికయ్, మోసే తెన్ దేముడు దిలి ఆగ్గుల్ సికడ్డన, పరిసయ్యుల్, బెద జా, ఏక్ తేర్బోదక కడ ఆన్ల. జా తేర్బోద లంజె జతె తతికయ్, దెర తిల. జలె, బెర తిల మాన్సుల్చి నెడిమి జాక టీచెడ్ల. 4 యేసుక కిచ్చొ మెల మెలె, “గురుబాబు ఈంజ తేర్బోద లంజె జతె తతికయ్, దెర్ల. 5 ‘ఇస లంజె జలసక పత్రల్ తెన్ పెట మారుక అస్సె’ మెన అమ్చొ మోసే పూర్గమ్చొచి అత్తి రెగిడ్లి దేముడుచి ఆగ్గుల్తె అమ్క ఆగ్గు దిలన్. జలె, ఈంజ తేర్బోదచి రిసా తూయి కిచ్చొ తీర్పు సంగితె?” మెన యేసుక పుసిల. 6 కిచ్చొక దస్సి పుసిల మెలె, జో కిచ్చొ

† 7:52 7:52 గని గలిలయతె జెర్మె నాయ్, యూదయ ప్రదేసిమ్చి బేత్సేహేమ్ పట్నమ్తె జెర్మిలన్, గెద. * 8:1 8:1 యోహానుచి సాచి రెగిడ్ల గ్రీకు బాస తెన్ తొలితొ రెగిడ్ల నగుమ్ పుస్తకల్తె ఈంజ మత్తెలి తయె నాయ్. నెంజిలె, వేరతె తయెదె. సగుమ్తె యోహాను 2:25చి పడ్డె తయెదె. † 8:1 8:1 ఒత్త బలీవ పండ్లు రూకుల్ తవుల, చి ఇసి నావ్ తయెదె.

జవున్ తప్పు సంగిలె, నేరిమ్ వయడుమ! మెన దస్సి కెర్ల. యేసు మాత్తుమ్, వంపొ జా, బుయ్యె ఊంటి తెన్ కిచ్చొగె రెగిడ్లన్.

7 జేవ్ జోక పుసుక ములితి నాయ్ చి రిసా యేసు టీవ, జోవయింక, “తుమ్చితె కో కిచ్చొ పాపుమ్ నే కెర తయెదె గే, జొయ్యి తొలితో చి పత్తురు జాక గలుక జయెదె” మెన సంగిలన్. 8 చి అన్నె వంపొ జా, బుయ్యె అన్నె కిచ్చొగె రెగిడ్లన్.

9 జలె, జో సంగిలిసి ఎత్తిజిన్ నూన అర్దుమ్ కెరన, తొలితో వెల్లెల మాన్సుల్, పడ్డె ఎత్తిజిన్ ఎక్కిలొచి పట్టి ఎక్కిలొ వర్స తెన్ బార్ జా, ఉట్ట గెల, చి టీవ తిలి జా తేర్బోదక పిట్టవ, యేసు ఎక్కిలొ ఒత్త తిలొ. 10 జలె, యేసు అన్నె ఉప్పిరి దెక, జా తేర్బోదక, “అమ్మ, కేతె జేవ్ ఎత్తిజిన్? కో తుక నేరిమ్ వయడ్డి నాయ్?” మెన సంగితికయ్, 11 జా తేర్బోద యేసుక, “బాబు, కోయి నాయ్!” మెన సంగిలి. తెదొడి యేసు జాక, “ఆవ్ కి తుక నేరిమ్ వయడి నాయ్. తుయి గో, చి అప్పె తెంతొ పాపుమ్ నే కెర్లె జి!” మెన సంగ తెద్రవ దిలన్.

“ఈంజ లోకుమ్చక దొర్కు జలి ఉజిడి ఆవ్వి”

12 అన్నెక్ నుట్టు యేసు బోదన కెరె తత్తికయ్ కిచ్చొ మెన సంగిలన్ మెలె, “ఈంజ లోకుమ్చక దొర్కు జలి ఉజిడి ఆవ్వి. కో అంచి పట్టి ఇండుల గే, అందర్తె తిలి రితి అందర్బుద్ది ఇండితి నాయ్, గని జివ్ దెతి ఉజిడి జోవయింక దొర్కు జా జోవయించి పెట్టి తయెదె” మెన సంగిలన్. 13 జో దస్సి సంగితికయ్, పరిసయ్యుల్ జోక, “తుచి రిసా తుయి సాచి సంగితసి; తుచి సాచి సత్తిమ్చి నెంజె” మెన సంగిల.

14 జలె, యేసు జోవయింక, “ఆవ్ సొంత సాచి సంగనై కి, అంచి సాచి సత్తిమి. కిచ్చొక మెలె, ఆవ్ కేనె తెంతొ అయ్లయ్ గే, కేనె అన్నె గెతసి గే, ఆవ్ జాని గని కేనె తెంతొ ఆవ్ అయ్లయ్ గే, కేనె గెతసి గే, తూమ్ నేన్ను. 15 తూమ్ అవ్వి కెర మాన్సు ఉచర్తి రగుమ్ తీర్పు కెర్లను, గని ఆవ్ అప్పెచి మట్టుక కక్క తీర్పు కెరి నాయ్. 16 గని ఆవ్ తీర్పు కెరుక జలె, అంచి తీర్పు సత్తిమ్ జయెదె. కిచ్చొక మెలె, ఆవ్

అవ్వి కెర కి ఎక్కిలో కి తీర్పు కెరి నాయ్. ఆవ్, అంక తెద్రయ్లోసా తెన్ని తీర్పు కెరుమ్దే.

17 “కో దొగుల ఎత్తి రితి సాచి సంగుల గే, జా సాచి సత్తిమ్చి జయెదే’ మెన తుమ్చి మోసే పూర్ణుమ్చొచి అత్తి దేముడు రెడ్డయ్ల ‡ఆగ్గుల్తె రెడ్డ అస్సె. 18 జలె, ఆవ్ సొంత సాచి సంగితసి, చి అంక తెద్రయ్లో అబ్బొకి అంచి రితి ఎక్కి రితి సాచి సంగితయ్” మెన వెల్లెల మాన్సుల్క యేసు జబాబ్ దిలన్.

19 జేవ్ జోక, “అబ్బొది కేతె?” మెన పుసిల. పుసితికయ్, యేసు జోవయింక, “తుమ్ అంక నేన్సు. అంచొ అబ్బొక కి నేన్సు. అంకయ్ జాన్తదు జలె, అబ్బొక కి జాన్తదు” మెన సంగిలన్.

20 బోదన కెర కెర ఇసి సంగిలి షొది యేసు కేనె తిలన్ మెలె, దేముడుచి గుడితెచి డబ్బుల్ పెట్టెల్ తిలి గదితె తిలన్. గని జోక జేలి కెర్తి నాయ్. కిచ్చొక మెలె, జో దేముడు అబ్బొన్తె గెతి సమయుమ్ జంక నేతయ్.

21 జేవ్ వెల్లెల మాన్సుల్క యేసు అన్సె, “ఆవ్ ఉట్ట గెచ్చింది. ఉట్ట గెలె, తుమ్ అంక చజలి కి, తుమ్చ పాపల్ తెన్ని మొర గెతె. మొర గెలె, ఆవ్ గెతిన్తె తుమ్ జెంక నెతుర్పు” మెన సంగిలన్.

22 యూదుల్చ జేవ్ వెల్లెల మాన్సుల్ ఎక్కిలో తెన్ ఎక్కిలో కిచ్చొ మెల మెలె, “ఆవ్ గెతిన్తె తుమ్ జెంక నెతుర్పు” మెన జో సంగిలిసి కిచ్చొక? జో అత్య కెరన ఎట్టొతో గెచ్చెదె గే?” మెన లట్టబన్, 23 జలె, యేసు జోవయింక, “తుమి ఎట్టొచ మాన్సుల్, ఆవ్ ఉప్పిర్ తెంతొచొ మాన్సు. తూమ్ ఈంజ లోకుమ్చ కమొ కెర్తన, ఆవ్ ఈంజ లోకుమ్చొ మాన్సు నెంజి. 24 ‘తుమ్చ పాపల్ తెన్ని మొర గెతె’ మెలయ్. కిచ్చొక మెలె ‘దేముడు తెద్రయ్లో క్రిస్తు, రచ్చించుప కెర్తొసొ, ఈంజొయి’ మెన

‡ 8:17 8:17 తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రెడ్డయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పావ్ పుస్తకుమతె రెడ్డయ్ జా అస్సె. ఈంజ దెకవుక మెన కుపియి బాసతె నొయి ప్రమానుమతె మోసి పూర్ణుమ్చొచి అత్తి రెగిడ్డి దేముడుచ ఆగ్గుల్ మెన రెడ్డవ అస్సె.

అంక తుమ్ నే నంపజలె, నిజుమి తుమ్చ పాపల్ తెన్ మొర గెతె, పాపుమ్తె గెతె” మెన సంగిలన్.

25 జోక, జేవ్ వెల్లెల మాన్సుల్ యేసుక “తుయి కొన్సో?” మెన పుసిల. యేసు జోవయింక, “ఆవ్ కొన్సో జయిందె గే ఆవ్ తుమ్క అగ్గె తెంతో సంగితసి గెద, జొయ్యి ఆవ్. 26 తుమ్చి రిసా, తుమ్ కెర్త కమొచి రిసా ఆవ్ ఒగ్గర్ ఒగ్గర్ తీర్పు సంగుక జయెదె. గని అంక తెద్రయ్లోసా సత్తిమ్చొ, చి లోకుమ్చక ఆవ్ నూనయ్తసి కిచ్చొ మెలె, అంక తెద్రయ్లోసాతెయి ఆవ్ సూన్లసి” మెన సంగిలన్.

27 గని, ‘తెద్రయ్లోసా’ మెన దేముడు అబ్బొన్చి రిసా సంగితయ్ మెన వెల్లెల మాన్సుల్ అర్దుమ్ కెరంతి నాయ్, చి రిసా 28 యేసు అన్నె, “ఆవ్ మాన్సు జా జెర్మున్ అయ్లోసాక తుమ్ టీచడ్డె. టీచడ్డె, అంక ‘జొయ్యి’ మెన వడ్డొక చినితె. తెదొడ్క అంక ‘జో అవ్వి కెర్లిసి కిచ్చొయ్ నాయ్, గని దేముడు అబ్బొసి సికడ్డి రితి కెర్తె తత్తయ్’ మెన అంచి రిసా అర్దుమ్ కెరంతె. 29 అంక తెద్రయ్లోసా అంక తోడు అస్సె, అంచి తెన్ అస్సె. జో కెయ్ అంక ములె నాయ్. కిచ్చొక మెలె, ఆవ్ కెయ్చ తెయ్చ జోచి ఇస్టుమ్ రితి కెర్తసి” మెన సంగిలన్. 30 జో దస్సి సంగితె తతికయ్, ఒత్త తిలసతె ఒగ్గర్జిన్ జోవయింక నంపజా గెల.

జోక నంప కెరుక దెర్లనక యేసు బోదన కెర్లిసి

31 జోక నంపజంక దెర్ల వెల్లెల మాన్సుల్క యేసు తెదొడి, “ఆవ్ సంగిలి రితి ఇండితె తస్తె జలె, నిజుమి అంచ సిన్సుల్ జస్తె. 32 చి సత్తిమ్ జాన్తె, చి జా సత్తిమ్ తుమ్క విడ్డల్ కెరెదె” మెన సంగిలన్.

33 గని, విడ్డల్ జతిసిక మాములుమ్ ఈంజ లోకుమ్తె జితిన్చి అర్దుమ్ జేవ్ కెరన, జోక “ఆవ్ అబ్రాహామ్ పూర్దుమ్చొచి సేకుమ్తెచ మాన్సుల్చి రిసా, కక్క కి కెయ్ కి గొతిమాన్సుల్ జము నాయ్. జాకయ్ ‘విడ్డల్ జస్తె’ మెన తుయి కిచ్చొక అమ్క సంగిలది?” మెన బమ్మ జా పుసిల. 34 యేసు జోవయింక, “తుమ్క ఆవ్ నిజుమి కచితుమ్ కిచ్చొ సంగితసి మెలె, కో కిచ్చొ పాపుమ్ కెరుల గే, పాపుమ్క గొతిమాన్సుల్ జా అస్తి. 35 గొతిమాన్సుల్, జలె, సావుకరిచొ గేరు కెయ్చ తెయ్చ

తంక జోవయింక సెలమ్ నాయ్. గని, సావుకరిచొ సొంత పుత్తుసి జలె, కెయఁక తెయఁక అబ్బొన్చి గెరి తయెదె. ³⁶ తుమ్ కెర్త పాపల్క తుమ్ దెర్ను సేడ్డిసి తెంతొ దేముడుచొ పుత్తుసి తుమ్క విడ్డల్ కెర్లెగిన, నిజుమి విడ్డల్ జస్తె.

³⁷ “అబ్రాహామ్ పూర్గుమ్చొచి సెకుమ్తె తుమ్ జెర్మ అస్సున్ మెన జాని, గని జోచి సెకుమ్తె తుమ్ జెర్మిలెకి, అంచి కొడొ తుమ్చి పెట్టి తియనుక నెనున్చి రిసొ, అంక మారుక కోర్ప జా అస్సున్. ³⁸ అంచొ అబ్బొతె ఆవ్ దెకిలిన్క ఆవ్ సొచి సంగితసి. తూమ్ మాత్రుమ్, తుమ్చొయ్ అబ్బొది సంగిలిసి కెర్తసు” మెన వెల్లెల మాన్సుల్క యేసు సంగిలన్.

³⁹ యేసు ఇసి సంగితికయ్, జేవ్ వెల్లెల మాన్సుల్ జోక, “అబ్రాహామ్ అమ్చొ అబ్బొ!” మెన సంగిలచి రిసొ యేసు జోవయింక అన్నె, “తుమ్ అబ్రాహామ్చ బోదల్ జతదు జలె, అబ్రాహామ్ కెర్త కమొ తూమ్ కి కెర్తదు. ⁴⁰ దేముడుతె ఆవ్ సూన్లొ సత్తిమ్ తుమ్క ఆవ్ సంగ అస్సి, గని అప్పె అంక మారుక తుమ్ కోర్ప జా అస్సున్. అబ్రాహామ్ దస్సి కెరె నాయ్. ⁴¹ గని తుమ్చొ సొంత అబ్బొది కెర్త కమొ తుమ్ కెర్తసు” మెన సంగిలన్. జేవ్ జోక “ఆమ్ లంజెపెట్టి జెర్మిలస నెంజుమ్. అమ్క ఎక్కిలో అబ్బొ జయెదె, మెలె, దేముడు” మెన సంగిల.

⁴² యేసు జోవయింక, “దేముడు తుమ్చొ అబ్బొది జతొ జలె, తుమ్ అంకయ్ ప్రేమ కెర్తదు. కిచ్చొక మెలె, ఆవ్ జోచి పెట్టి తా జోతె తెంతొ బార్ జా ఉట్ట అయ్లయ్. ఆవ్ అవ్వి జెంక నాయ్, జొయ్యి అంక తెద్రయ్లో. ⁴³ ఆవ్ సంగితిసి తుమ్ కిచ్చొక అర్దుమ్ కెరన్ను నాయ్? కిచ్చొక మెలె, అంచ కొడొతెచి సత్తిమ్ తుమ్క అల్లర్ కెర్తయ్, చి సూనుక ఓర్పుప జంక నెతుర్పు. ⁴⁴ తుమ్చొ అబ్బొది సయ్తాన్. తుమ్ జోచ మాన్సుల్ జా, జో కిసొచొ గే, తూమ్ కి దస్సచ. తుమ్చొ అబ్బొదచ ఆసల్ తీర్పుప కెరుక తుమ్ కోర్ప జా అస్సున్. మొదొల్ తెంతొ జో కూని కెర్తొసొ. సత్తిమ్, జోతె, ఎదిలి కి బెదితి నాయ్. జోతె

కిచ్చొ సత్తిమ్ కి నాయ్. జో అబద్దుమ్ సంగుక, జోచి సొంత అబద్దుమ్ జొయ్యి లట్టబెదె. జో పూర్తి అబద్దుమ్చొ. జో అబ్బుదల్క అబ్బొసి. 45 జాకయ్, ఆవ్ సత్తిమ్ సంగితసిచి రిసొ, ఆవ్ సంగితిసి తుమ్ నంప కెర్పు నాయ్. 46 ఆవ్ కెయ్య కేన్ పాపుమ్ కెర్లయ్ గే, చి తుమ్తె కో అంక 'అబద్దుమ్చొ' మెన సొచి సంగుక జయెదె? కెయ్ కేన్ పాపుమ్ కెరి నాయ్, చి కో కి దస్సి సొచి సంగుక నెతుర్పు. జలె, ఆవ్ సత్తిమ్ సంగితసి జలె, తుమ్ అంక కిచ్చొక నంప కెర్పు నాయ్? తుమ్ ఉచర. 47 దేముడుచ మాన్సుల్ కో జవుల గే, జో దేముడుచ కొణొ నూనుల. తూమ్ కిచ్చొక జోవయించ కొణొ నూన్సు నాయ్ మెలె. తుమ్ జోవయించ మాన్సుల్ నెంజుసు" మెన వెల్లెల మాన్సుల్క యేసు సంగిలన్.

వెల్లెల మాన్సుల్ యేసుక పత్రల్ గల మారుక ఉచర్లిసి

48 యూదుల్చ జేవ్ వెల్లెల మాన్సుల్, జలె, జోక "కిసమరయ సుదొ జస్సె, చి తుక బూతుమ్ దెరె అస్సి మెన అమ్ ఉచర్లిసి సత్తిమ్, కిచ్చొగె" మెన సంగిల. 49 జేవ్ దస్సి సంగితికయ్, యేసు జోవయింక కిచ్చొ జబాబ్ దిలన్ మెలె, "అంక బూతుమ్ దెరె నాయ్. ఆవ్, మాత్తుమ్, దేముడు అబ్బొక గవురుమ్ కెర్తసి, గని తూమ్ అంకయ్ గవురుమ్ కెర్పు నాయ్. 50 అంచి రిసొ అంక గవురుమ్ నాయ్. గని అంక గవురుమ్ కెర్తొ ఎక్కిలో అస్సె. జొయ్యి అంచి రిసొ తుమ్చి రిసొ తీర్పు కెర సత్తిమ్క రుజ్జు దెకయెదె.

51 "జలె, తుమ్క ఆవ్ నిజుమి కచితుమ్ కిచ్చొ సంగితసి మెలె, అంచ కొణొ కో నిదానుమ్ కెరుల గే, కెయ్క కి *మొర్తి నాయ్" మెన సంగిలన్. 52 దస్సి సంగితికయ్, జేవ్ వెల్లెల మాన్సుల్ జోక కిచ్చొ మెల మెలె, "అప్పె రుజ్జు అయ్లి. నిజుమి తుక బూతుమ్ దెరె అస్సె. అబ్రాహామ్ మొర గెలన్. దేముడుచ కబుర్లు సంగిల పూర్గుమ్చ కి

§ 8:48 8:48 యూదుల్ తెన్ ఎక్కిలోక 'సమరయ సుదొ' మెలె, 'నూనొ' మెలి రితి నిస్కారుమ్ కోడు జయెదె. సమరయ సుదొ మెలె సమరయ వ్రదేసిమ్చొ మాన్సు. * 8:51 8:51 నెంజితి 'మొర్తు దెకితి నాయ్'.

మొర గెల, గని 'అంచ కొడొ కో నిదానుమ్ కెరుల గే, కెయెక † మొర్రి నాయ్' మెన తుయి సంగితసి! 53 అమ్చొ పూర్గుమ్చొ అబ్రాహామ్చి కంట తుయి వెల్లొ గే? జో మొర గెలొ. దేముడుచ కబుర్లు సంగిలన కి మొర గెల. తుయి కొన్సొ మెన సంగితసి? సంగు!" మెన యేసుక పుసిల.

54 జలె, యేసు జోవయింక, "ఆవ్ సొంత గవురుమ్ సంగనైగిన, అంచి గవురుమ్ ఆరిచి. జలె, 'అమ్చొ దేముడు' మెన అంచొ అబ్బొచి రిసొ తుమ్ సంగితను. జొయ్యి అంక గవురుమ్ కెర్తయ్. 55 గని జోక తుమ్ అగ్గె తెంతొ నేన్సు. ఆవ్, మాత్రుమ్, జోక జాని. 'జోక నేని' మెన ఆవ్ ఏక్ వేల సంగితయ్ జలె, తుమ్చి రితి అబద్దుమ్చొ జతయ్. గని, నిజుమి జోక జాని, చి జోచి కోడు నిదానుమ్ కెర్తసి. 56 ఆవ్ ఈంజ లోకుమ్తె జెర్మ తతి దీసి దెకుక మెన తుమ్చొ పూర్గుమ్చొ అబ్రాహామ్, జలె, ఆస తెన్ తిలన్. జలె, అబ్బొసి జలొ దేముడుచి సెలవ్ తెన్ † దెకిలన్, చి సర్దసంతొసుమ్ జలన్" మెన యేసు సంగిలన్.

57 యూదుల్చ జేవ్ వెల్లెల మాన్సుల్ జోక, "తుక యాబయ్ వెర్సుల్ జంక నేతయ్. దస్సి జలె, తుయి పూర్గుమ్చొ అబ్రాహామ్క కిసి దెక తస్త! † నెంజిలె జో తుక దెక తయెదె గే? బెదె నాయ్!" మెన సంగిల, 58 చి యేసు, "తుమ్క ఆవ్ కిచ్చొ నిజుమి కచితుమ్ సంగితసి మెలె, అబ్రాహామ్ నే జెర్మితె అగ్గె తెంతొ ఆవ్వి తిలయ్, అస్సి" మెన సంగిలన్. 59 జో దస్సి సంగితికయ్, 'దేముడు తెన్ సమ్మందుమ్ సంగితయ్, జొ వెల్లి పాపుమ్' మెన ఉచర, యేసుక పత్రల్ తెన్ పెట మారుక మెన, వెల్లెల మాన్సుల్ పత్రల్ వెంట్ల, గని యేసు నే దెకయ్ జతె, దేముడుచి గుడి తెంతొ బార్ జొ, ఉట్ట గెలన్.

† 8:52 8:52 నెంజిలె 'మొర్రు చకితి నాయ్'. ‡ 8:56 8:56 ఎత్తి అదికారుమ్ తిలొ దేముడు దెకయ్లి సివ్వుతె దెకిలన్, కిచ్చొగె. § 8:57 8:57 ఈంజ మత్తెలి గ్రికు బాస తెన్ తొలితొ రెగిడ్ల సగుమ్ పుస్తకల్తె 'నెంజిలె' తెంతొ 'తయెదె గే?' ఎదచి కోడు తయె నాయ్.

9

గుడ్డి జా జెర్మిలోసాక యేసు చెంగిల్ కెర్లిసి

1 పడ్డా యేసు జోచ సిస్సుల్ తెన్ వట్టె గెతె తిలి పొది, జెర్మున్ తెన్ గుడ్డి మాన్సు ఎక్కిలోక దెకిల. 2 జోక దెక కెర, యేసుచ సిస్సుల్ కిచ్చొ పుసీల మెలె, “గురుబాబు, ఈంజో మాన్సు గుడ్డి జెర్మిలిసి జోచి పాపుమ్చి రిసా గే, అయ్యన్అబ్బొన్చి పాపుమ్చి రిసా గే?” మెన పుసిల. 3 యేసు జోవయింక, “ఈంజో పాపుమ్ కెర్లిసి నెంజె, అయ్యన్ అబ్బొన్ పాపుమ్ కెర్లిసి కి నెంజె. జలె, ఇన్నెక చెంగిల్ కెర్లిన్ తెన్ దేముడుచి గవురుమ్ జోచితె దెకయ్ జతి రిసాయి దస్సి జెర్మిలన్. 4 మెద్దెన్ తిలి రితి మదెనె, అంక తెద్దయ్లోసాచ కమె ఆమ్ కెర్తె తంకయ్. కిచ్చొక ‘మెద్దెన్’ మెలయ్ మెలె, అందర్ అయ్లె, కోకి కామ్ కెరుక నెంజె. 5 ఆవ్ ఈంజ లోకుమ్తె ఇసి బుల్తె తిలి మదెనె ఈంజ లోకుమ్చక దొర్కు జలి ఉజిడి అవ్వి జతసి” మెన యేసు బోదన కెర్లన్.

6 యేసు దస్సి సంగితె తా కిచ్చొ గుర్తు కెర్లన్ మెలె, బుయ్యె తుంక బుర్ల కెర, జా బుర్ల జో మాన్సుచ అంకివొతె గాఁస దా, 7 జోక “తుయి గెచ్చు సిలోయమ్ మెంతి వెల్లో కుండితె దోవను” మెన సంగిలన్. జా సిలోయమ్ మెంతి నావ్చి అర్దుమ్ కిచ్చొ మెలె, ‘తెద్దయ్లిసి’. జలె, యేసు సంగిలి రితి జో మాన్సు ఒత్త గెచ్చు, దోవన కెర, అంకివొ దెకయ్ జా, ఉట్ట అయ్లన్.

8 జో దస్సి చెంగిల్ జా ఉట్ట జెతికయ్, జోచి గవ్వెచ మాన్సుల్, జో అగ్గె బిచ్చిమ్ నజితె తిలిసి దెక తిల అన్నె నగుమ్జిన్ కిచ్చొ మెన లట్టబన్ల మెలె, “ఈంజోయి అగ్గె బిచ్చిమ్ నజ నజ రోజుక వట్టె వెస తిలోసా, కిచ్చొగె” మెన లట్టబంతె తిల. 9 నగుమ్జిన్ “జోయ్యి” మెన సంగిల. అన్నెనగుమ్జిన్ “నెంజె, గని జోచి పొలికచొ మాన్సు” మెన సంగిల. గని జో “ఆవ్ జోయ్యి!” మెన సంగిలన్.

10 జేవ్ ప్రైజల్, జలె, జో మాన్సుక, “జలె, కీసి జా అప్పె దెకితసి?” మెన ఆచారిమ్ జా పుసిల. 11 జో మాన్సు జోవయింక, “యేసు మెంతో జో మాన్సు బుర్ల కెర అంచ అంకివొతె గాఁస దా, తుయి గెచ్చ సిలోయమ్ వెల్లో కుండితె దోవను! మెన అంక సంగిలన్. ఆవ్ గెచ్చ దోవన్లయ్, చి అంకివొ డీసిల!” మెన సాచి సంగిలో. 12 “జో అప్పె కేతె?” మెన జేవ్ జోక పుసిల, చి “ఆవ్ నేని” మెన జో సంగిలన్.

పండితుల్ గుడ్డి మాన్సుక పరిచ్చ కెర్లిసి

13 జో గుడ్డి జా జెర్మిలోసాక ప్రైజల్ పరిసయ్యుల్తె కడనిల. 14 జలె, యేసు బుర్ల కెర జోచ అంకివొతె గాఁస చెంగిల్ కెర్లి దీసి కేన్ దీసి మెలె, జోవయించి బక్తి కెర్లి సెలవ్ కడన్లి దీసి. 15 జాకయ్, పరిసయ్యుల్ కి “తుక అంకివొ డీసయ్లిసి కీసి జర్లు జలి?” మెన పరిచ్చ కెర్ల. చి జో మాన్సు జోవయింక, “జో బుర్ల అంచ అంకివొతె గాఁసిలన్, చి ఆవ్ దోవన్లయ్, చి అప్పె దెకితసి” మెన సంగిలన్. 16 పరిసయ్యుల్తె సగుమ్జిన్ “జో మాన్సు దేముడుతె తెంతో అయ్లోసా నెంజె. కిచ్చొక మెలె, సెలవ్ కడన్లి దీసి పిట్టవన్తయ్” మెన యేసుచి రిసా తీర్పు సంగిల. గని అన్నె సగుమ్జిన్ “పాపుమ్ కెర్తో మాన్సు, జలె, దేముడుచి అదికారుమ్ దెకయ్త గుర్తుల్ కెరుక నెత్తో” మెల, చి దొన్ని జటుల్ జల. 17 జాకయ్, జో గుడ్డి మాన్సుక కిచ్చొ మెన అన్నె పరిచ్చ కెర్ల మెలె, “జో తుక అంకివొ డీసయ్లి రిసా, తుయి జోచి రిసా కిచ్చొ ఉచర్లసి?” మెన పుసిల. జో జోవయింక “దేముడుచ కబుర్లు సంగితో ఎక్కిలో జయెదె” మెన జబాబ్ దిలన్.

18 జో ‘నిజుమ్ అగ్గె గుడ్డి తిలో, చి చెంగిల్ జలో’ మెన, యూదుల్తచ జేవ్ వెల్లెల మాన్సుల్ మొదొల్క నంప కెర్లి నాయ్ చి రిసా జోచ అయ్యున్అబ్బొన్క బుకార్ల. 19 బుకారా కెర, జోవయింక “ఈంజో తుమ్చొ పుత్తుది గే? జెర్మిల్ తెంతో గుడ్డి తిలో గే? దస్సి జలె, కీసి జా అప్పె దెకితయ్?” మెన పుసిల. 20 అయ్యున్ అబ్బొసి కిచ్చొ జబాబ్ దిల మెలె, “ ‘ఈంజో అమ్చొ పుత్తు’ మెన, ‘ఈంజో గుడ్డి జా జెర్మిలన్’

మెన జానుమ్. 21 గని అంకివో అప్పె డీసిలిసి కిసి జర్గు జలి గే, కో జోచ అంకివో చెంగిల్ కెర్లన్ గే, నేనుమ్. జోక తుమ్ పుస దెక. జో ఉబెడోబోద గెద? జోయ్యి సంగెదె” మెన జబాబ్ దిల. 22 అయ్యసి అబ్బొసి కిచ్చొక దస్సి మెల మెలె, వెల్లో మాన్సుక బితె తిల. కిచ్చొక మెలె, యేసుక ‘దేముడు తెద్రయ్లో క్రీస్తు రచ్చించుప కెర్లోసా’ మెన కో జలెకు ఒప్పన్లె, జోవయింక సబగేర్ తెంతో ఉడడ గెలుక అస్సె, చి అన్నె కెయెక కి పెసడుక జయె నాయ్ మెన వెల్లెల మాన్సుల్ అగ్గె తెంతో ఉచర అస్తి. 23 జాకయ్, “జో ఉబెడోబోద. జోకయ్ పుస!” మెన అయ్యస్ అబ్బొసి సంగ తిల.

24 జాకయ్ తెదొడి, గుడ్డి జా జెర్వు తిలొ జో మాన్సుక జేవ్ వెల్లెల మాన్సుల్ అన్నెక్ సుట్టు బుకారా కెర జోక కిచ్చొ మెల మెలె, “జో యేసు పాపుమ్ కెర్లోసా మెన ఆమ్ జానుమ్. జాకయ్, తుయి చెంగిల్ జలిన్చి రిసా దేముడుక గవురుమ్ కెరు, గని జో యేసుక పోని” మెన అటంకుమ్ కెర్ల. 25 గని జేవ్ దస్సి సంగిలె కి, జో జోవయింక, “జో పాపుమ్ కెర్లోసా గే నెంజె గే ఆవ్ నేని, గని కిచ్చొకచితుమ్ జాని మెలె, ఆవ్ అగ్గె గుడ్డి జా తిలె కి, అప్పె దెకితసి” మెన సాచి సంగిలన్. 26 దస్సి సంగితికయ్, జేవ్ జోక “తుక జో కెర్లిసి కిచ్చొ? తుచ అంకివో కిసి చెంగిల్ కెర్లన్?” మెన అన్నెక్ సుట్టు పుసిల. 27 చి జో అన్నె జోవయింక, “ఆవ్ తెదొడి సంగిలయ్, గని తుమ్ సూన్సు నాయ్. కిచ్చొక అన్నెక్ సుట్టు సూనుక కోర్ప జతసు? తూమ్ కి ఏక్ వేల జోచ సిస్సుల్ జంక కోర్ప జతసు గే?” మెన పుసిలన్.

28 జో దస్సి పుసితికయ్, జేవ్ “తూయి జోచొ సిస్సుడు. తుచి ఇస్టుమ్! ఆమ్, మాత్తుమ్, మోసే పూర్గుమ్చొచ సిస్సుల్! 29 మోసేచి అత్తి ఎత్తి అదికారుమ్ తిలొ దేముడు జోచ కబుర్లు సంగ అస్సె మెన జానుమ్. జో యేసు జలె, కేనె తెంతో అయ్లో గే, నేనుమ్” మెన సంగిల.

30 జాకయ్, చెంగిల్ జలొ జో మాన్సు జోవయింక అన్నెకిచ్చొ జబాబ్ దిలన్ మెలె, “అబ్బవోమ్మా! అంచ అంకివో జో అన్నె డీసయ్లెకి, కేనె తెంతో అయ్లో గే తుమ్ నేన్సు గే? 31 ‘కో పాపుమ్ కెర్లోసా జవుల

గే, దేముడు జోక దెకె నాయ్ గని, కో జలెకు జోవయింక సత్తిమ్ కెరెదె గే, జోకయ్ జో ప్రబు దెకెదె' మెన ఎత్తిజిన్ జానుమ్. ³² లోకుమ్ జెర్మయ్లి తెంతో, కేన్ జెర్మన్ గుడ్డి జా తిలో మాన్సుక కో చెంగిల్ కెర్లిసి కో సూసుక నాయ్. ³³ దేముడు తెంతో ఈంజో మాన్సు జెతో నాయ్ జలె, అంచి బాద గెచ్చవుక ఎద్గరె నెత్తిర్తో" మెన వెల్లెల మాన్సుల్క బుద్ది సంగిలన్.

³⁴ జో దస్సి సంగితికయ్, జేవ్ వెల్లెల మాన్సుల్ జోక కిచ్చొ జబాబ్ దిలన్ మెలె, "నిజుమి రితి పాపుమ్ తెన్ జెర్మిలోసా, తుయి అమ్క సికడుక జయె నాయ్" మెన, జో కెయ్క కి అన్నె నే జెతి రితి సబగేర్ తెంతో జోక ఉదడ గెల.

చెంగిల్ జలో మాన్సుక యేసు దయిరిమ్ కెర్లిసి

³⁵ జో మాన్సుక వెల్లెల మాన్సుల్ ఉదడ్డి సిచ్చ కెర్లిన్చి రిసా యేసు సూన కెర, జోక చజ దెక, "మాన్సు జా జెర్మన్ అయ్లోసొక తుయి నంపజా అస్సిసి గే?" మెన పుసిలన్. ³⁶ జో మాన్సు యేసుక "బాబు, ఆవ్ జోక నంపజంక ఇస్తుమ్ జా అస్సి. జో కేతె?" మెన పుసిలన్, చి ³⁷ యేసు జోక, "తుయి జోక దెక అస్సిసి. తుచి తెన్ అప్పె లట్టబ్తోసా జొయ్యి." మెలన్. ³⁸ జో మాన్సు "ప్రబు, ఆవ్ నంపజతసి" మెన జొకర బక్తి కెర్తో.

³⁹ తెదొడి యేసు ఒత్త తిల మాన్సుల్క, "ఆవ్ ఈంజ లోకుమ్తె అయ్లిసి లోకుమ్చక తీర్పు కెర్తి రితి జతయ్. కిచ్చొక మెలె, ఆవ్ జెతికయ్, గుడ్డి జల మాన్సుల్ దెకితతి, చి గుడ్డి నెంజిల మాన్సుల్ గుడ్డి రితి జతతి" మెన సంగిలన్. ⁴⁰ జలె, జోచి పాసి తిల పరిసయ్యుల్ సగుమ్జిన్ ఈంజ కోడు సూన కెర "అమ్క కి 'గుడ్డి మాన్సుల్' మెన తుయి సంగితసి గే?" మెన యేసుక పుసిల. ⁴¹ యేసు జోవయింక, "తుమ్ నిజుమి గుడ్డి జా తత్తుదు జలె, తుమ్క కిచ్చొ పాపుమ్ తత్తి నాయ్. గని 'అమ్ దెకితయమ్' మెన తుమ్ సంగితసుచి రిసా తుమ్చి పాపుమ్ గెచ్చె నాయ్.

10

మెండల్సాడు అన్నె గొవుడు రకితిసి

1 “తుమ్క కచితుమ్ నిజుమి ఆవ్ కిచ్చొ సంగితసి మెలె, మెండల్సాడు ఏక్ తిలె, ఎక్కిలో జా కెర గుమ్ముమ్ వాట్ నే గెతె, కూడ్ డేవ పెసిలె, జో చోరు జయెదె. 2 గని గుమ్ముమ్ వాట్ కో పెనెదె దే, జొయ్యి గొవుడు జయెదె. 3 జా సాడుక గుమ్ముమ్ రకితోసా ఎక్కిలో తిలె, గొవుడుక వాట్ తయెదె. జో గొవుడుచి అవాడ్ జో రకిత మెండల్ కి చినుల, చి జో రకిత మెండల్క జో నవ్వొ తియ తయెదె, చి జోవయింక జో రోజుక బార్ కెరెదె. 4 జొయ్యి సొంత రకిత మెండల్క బార్ కెల్లె, జో కేసె ఉదడెదె గే, జేవ్ గెచ్చుల. కిచ్చొక మెలె, జేవ్ నంపజలి గొవుడుచి అవాడ్ జేవ్ చినితతి. 5 వేర మాన్సు అయ్లె, జోవయించి అవాడ్ నేన్తి, చి నంపజతి నాయ్, చి ఉట్ట నిగుల” మెన యేసు సంగిలన్. 6* జలె, యేసు జా సంగిలే కి, జేవ్ వెల్లెల మాన్సుల్ అర్దుమ్ కెరంతి నాయ్.

పరలోకుమ్చి రాజిమ్క దొర్కు జలి గుమ్ముమ్ ఆవ్

7 జాకయ్ యేసు జేవ్క అన్నె, “ఆవ్ తుమ్క నిజుమి కచితుమ్ కిచ్చొ సంగితసి మెలె, ఆవ్ సంగిలి మెండల్సాడె పెసితి గుమ్ముమ్ ఆవ్వి. 8 అంచి కంట అగ్గె అయ్ల గొవుడ్లు ఎత్తిజిన్ చోర్లు, చోర్లస జల. మెండల్ జోవయింక అవాడ్ సూన్తి నాయ్. 9 దొర్కు జలి గుమ్ముమ్ ఆవ్వి. ఆవ్ తిలి గుమ్ముమ్ వాట్కో పెనుల గే, రచ్చించుప జవుల, చి జా సాడు జోవయించి సొంత టాన్ జయెదె, చి పెనుక బార్ జంక జతె తవుల, చి చెంగిల్ అన్నిమ్ జోవయింక దొర్కు జతె తయెదె. 10 చోరు, జలె, ఆరి మెండల్క చోరుక, కండ గెలుక, పాడ్ కెరుక జెయెదె. ఆవ్, మాత్తుమ్, కిచ్చొక అయ్లయ్ మెలె, అంచ

* 10:6 10:6 జేవ్ వెల్లె మాన్సుల్కయ్ ‘చోర్లు’ ‘వేర మాన్సుల్’ మెన్తయ్. జోకయ్ ‘గొవుడు’ మెనంతయ్.

మెండల్ జల మాన్యుల్ క 'జితు, ఎదిలి చెంగిల్ †జీవ్ జోవయింక దొర్ను జవున్' మెనయ్ అయ్లయ్.

11 "ఆవ్వి చెంగిలో గొవుడు జయిందె. గొవుడు చెంగిలోచొ జలె, మెండల్ కిచ్చొ ప్రమాదుమ్ జతి రితి జలె, జోవయింక 'మొర్తు నాయ్. జితు' మెన జ్యొయ్ అడ్డు జా, జోవయింక రచ్చించుప కెర్తి రిసా జోచి జీవ్ దా మొరెదె. ఆవ్ కి దస్సి జయిందె. 12 ఎక్కిలో జవున్ నిజుమ్ తిలో గొవుడు నెంజితె, ఆరి డబ్బుల్ క జవున్ మంద రకిలె, జేవ్ మెండల్ జోచ సొంత మెండల్ నెంజిలి రిసా, మెండల్ క మారితొ కిచ్చొ జవున్ జంతు అయ్లె, కూలిక రకితొ జో మాన్సు ఉట్ట నిగ, మెండల్ నస్టుమ్ జతి రితి ముల దెయెదెచి. ఉట్ట నిగిలె, జో జంతు కేన్ మెండక దెర, తిల మెండల్ క చెదుర్ను కెరెదె. 13 జో వేర మాన్సు కిచ్చొక దస్సి ఉట్ట నిగ మెండల్ క మాలజ్ కెర ములెదె మెలె, ఆరి డబ్బుల్ కయ్ రకితయ్ చి రిసా. జోచ సొంత మెండల్ నెంజితి, చి మొర్లె కి జిలె కి, జోక బాద నాయ్.

14 "ఆవ్ జలె, చెంగిలో గొవుడు. 15 అంచొ అబ్బొ అంక జానె, ప్రేమ కెర్తయ్. ఆవ్ కి అబ్బొక జాని ప్రేమ కెర్తసి. దస్సి, అంచ మెండల్ క ఆవ్ జాని, ప్రేమ కెర్తసి. జేవ్ కి అంక జాన్తి, ప్రేమ కెర్తతి. అన్నె, జేవ్ అంచ మెండల్ జల మాన్యుల్ క 'మొర్తు నాయ్, గని జితు' మెన ఆవ్ మొర గెచ్చిందె.

16 "అన్నె, వేర దేసిమ్లుచ వేర ప్రెజల్ చ మాన్సుల్ అంక నంపజా అంచ మెండల్ జవుల. జోవయింక కి అంచి మందయ్ బెదవనుక అన్నె. జేవ్ కి అమ్చి అవాడ్ సూన జెవుల. అయ్లె, జేవ్ కి ఈంజేవ్ కి ఎక్కి మంద జవుల, చి జేవ్ ఎత్తిక ఆవ్ ఎక్కిలో గొవుడు జయిందె. 17 జలె, అంచ మెండల్ జలసక రచ్చించుప కెర్తి రిసా మొర గెచ్చిందె చి రిసా అబ్బొ అంక ఒగ్గర్ ప్రేమ దెకితయ్, చి మొర గెలె కి, అన్నె జీవ్ జా ఉట్టిందె. 18 మాన్సుల్ అంక మార గెలె కి, ఆవ్ నే ఒప్పొలె నెతిర్తి. గని, అంచి ఇస్టుమ్ కయ్ మొరిందె. అంచి ఇస్టుమ్ క మొరుక

† 10:10 10:10 'చెంగిల్ జీవ్' మెలె, పరలోకుమ్ తె బెదితి జివు. యోహాను 3:15.

అదికారుమ్ అస్సె, అన్నె, అన్నె జీవ్ జా ఉట్టుక కి అంక అదికారుమ్ అస్సె. జా ఎత్తి ఆవ్ నెరవెర్పుప కెరుక మెన అంచో అబ్బొ తియార్లి కామ్” మెన యేసు బోదన కెర్లన్.

యేసుచి రిసా వెల్లెల మాన్సుల్ అన్నె దొన్ని జట్టు జలిసి

19 యేసుచ ఈంజేవ్ కొడొచి రిసా యూదుల్చ ఒత్తచ వెల్లెల మాన్సుల్ అన్నె దొన్ని జట్టు జల. 20 జోవయింతె ఒగ్గర్జిన్, “జోక బూతుమ్ దెర్లి రిసా వెర్రి జా అస్సె. జోచ కొడొ అమ్ కిచ్చొక సూనుక?” మెన సంగిల. 21 అన్నె సగుమ్జిన్ “ఇస కొడొ బూతుమ్ దెర్ల కొడొ నెంజితి. అన్నె, గుడ్డి జల మాన్సుల్చ చెంగిల్ కెరుక బూతల్ దెర్లసక సెక్తి తయెదె గే? నాయ్, గెద?” మెన సంగిల. 22 ఇదిల్ పడ్డె, అన్నెక్ పండుగు అయ్లి. ‘ఎక్కి దేముడుకయ్ తవున్’ మెన పూర్గుమ్ పొది దేముడుచి గుడి సుద్ది కెర్లి ఏక్ కామచి గుర్తుచి పండుగు, జా. 23 చల్లి పొది జా, జలె, దేముడుచి గుడితెచి రానొ జలో సొలోమోను పూర్గుమ్చొచి నావ్ తిలి వెల్లి పేడితె యేసు బుల్తె తతికయ్, 24 యూదుల్చ వెల్లెల మాన్సుల్ జోచి నుట్టునంత బెర జా, జోక అన్నె పరిచ్చ కెరుక దెర్ల. కిచ్చొ మెన పుసిల మెలె, “అన్నె కెత్తి దీసల్ అమ్ నేన తతి రితి కెర్తె? తుయి రచ్చించుప కెర్తొసొ జతో క్రిస్తు జలె, అమ్క సొస్టుమ్ సంగు!” మెన సంగిల. 25 జలె, యేసు జోవయింక, “తుమ్క అగ్గె సంగిలయ్, గని తుమ్ నంప కెర్పు నాయ్. అబ్బొసి జలో దేముడుచి నావ్ తెన్ ఆవ్ కెర్త కమొ కి అంచి రిసా ‘జొయ్యి’ మెన సాచి సంగితతి. 26 గని, అంచి మెండల్ మందతెచ తుమ్ నెంజున్చి రిసా తుమ్ నంపజంక నెతుర్పు. 27 అంచ మెండల్ జలె, అంచి అవాడ్ నూన్తతి. ఆవ్ జోవయింక జాని, సైమ కెర్తసి, చి అంచి పట్టి జెతతి. 28 దేముడుచి రాజిమ్తె బెదితి, మొర్లె పరలోకుమ్తె గెచ్చు కెయెక తెయెక జితి వరుమ్ జోవయింక ఆవ్ దెతసిచి రిసా, జేవ్ కెయెక కి సిచ్చు జతి మొర్పుతె గెతి నాయ్, అన్నె, కో కి జోవయింక అంచి అత్తి తెంతొ ఉర్లుక నెత్తిర్తి. 29 అంచో

దేముడు అబ్బొ జోవయింక అంచి అత్తి సొర్పు కెర దిలన్. జొయ్యి ఎత్కిచి కంట వెల్లొచి రిసొ, జో అంచొ అబ్బొసి జలొ దేముడుచి అత్తి తెంతొ జోవయింక కో కి ఉర్లుక నెత్తిర్తి. ³⁰ ఆవ్ అంచొ అబ్బొ ఎక్కి” మెన యేసు వెల్లెల మాన్సుల్క సంగిలన్.

³¹ యేసు ఇసి సంగితికయ్, ‘జోక పత్రల్ తెన్ పెట మార గెలుమ’ మెన, జొ దీన్చి రితి వెల్లెల మాన్సుల్ పత్రల్ వెంట్ల. ³² యేసు జోవయింక, “దేముడు అబ్బొ కెరయ్ల చెంగిల్ కమొ ఒగ్గరి తుమ్క దెకవ అస్సి. జేవ్ కమొతె కేన్ కామ్క ‘గర్చి’ మెన తుమ్ అంక పత్రల్ గల మారుక ఉచర్లసు?” మెన పుసిలన్, చి ³³ వెల్లెల మాన్సుల్ జోక, “కిచ్చొ చెంగిల్ కామ్ కెర్లి రిసొ పత్రల్ గల మారుమ్ నాయ్, గని తుయి రితొయి మాన్సు దేముడు తెన్ సమ్మందుమ్ సంగుక, జోచి విలువ కడ్లి రిసొయి, జొ వెల్లి తప్పకయ్” మెన సంగిల.

³⁴⁻³⁵ జొకయ్ యేసు జోవయింక ఇసి మెన జబాబ్ సంగిలన్, “తుమ్క ‘దేముడ్లు జస్తె’ మెన సంగిలయ్ మెన జోవయించ కబుర్లు నూన సికడ్ల మాన్సుల్చి రిసొ తుమ్చి †మోసే పూర్లుమ్చొచి అత్తి దేముడు రెగ్డయ్ల ఆగ్గుల్తె రెగ్డయ్లొ, గెద? జో దేముడు రెగ్డయ్లొసి కో మాన్సు పిట్టవుక నెత్తిర్తి, గెద. ³⁶ జలె, జో దేముడు అబ్బొ అంక జోవయించి కామ్కయ్ నిసొన అదికారుమ్ దా అంక ఈంజ లోకుమ్తె తెద్రయ్లొ. తెద్రయ్లొ జలె, ‘ఆవ్ దేముడుచొ పుత్తుసి’ మెన ఆవ్ సంగిలి రిసొ ‘జోచి విలువ కడ్డయ్’ మెన తుమ్ కిసి సంగుక జయెదె! ³⁷ ఆవ్ దేముడు అబ్బొచ కమొ కెర్తసి నాయ్ జలె, అంక నంపజంక పొన. ³⁸ గని దేముడు అబ్బొచ కమొ ఆవ్ కెర్తసి జలె, అంకయ్ తుమ్ నే నంప కెర్లె కి, జేవ్ కమొ దెక జేవ్ కమొకయ్ నంపజొ. జేవ్ కమొక నంపజలె, దేముడు అబ్బొ అంచి పెట్టి తిలిసి, ఆవ్ జో అబ్బొచి పెట్టి తిలిసి చినితె, చి

† **10:34-35** 10:34-35 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెగ్డయ్లొ ఆగ్గుల్ మెన అమ్ జానుమ్. ఈంజ కొడొ ఎత్కి బైబిల్తె అగేచి పావ్ పుస్తకుమ్తె రెగ్డయ్లొ జొ అస్సి. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్లుమ్చొచి అత్తి రెగిడ్లి దేముడుచ ఆగ్గుల్ మెన రగ్డవ అస్సి.

తుమ్క అర్దుమ్ జెయెదె” మెన యేసు సంగిలన్. 39 యేసు దస్సి సంగితకయ్, జేవ్ వెల్లెల మాన్సుల్ జోక దెరుక దెకిల, గని జోవయించి అత్తి దెర్ను నే సేడ్తె బార్ జా ఉట్ట గెలన్.

40 యేసు ఉట్ట గెచ్చ, యోర్దాను గాడు ఒత్తల్తో గెచ్చ, అగ్గె యోహాను బాప్తిసుమ్ దెతె తిలిన్తె టాన్తె సగుమ్ దీసల్ ఒత్త తిలన్.

41 ఒత్త తతికయ్, మాన్సుల్ ఒగ్గర్జిన్ జోతె జా కెర, కిచ్చొ మెన సంగితె తిల మెలె, “దేముడుచి అదికారుమ్క గుర్తు దెకయ్త కమొ కేన్ కి యోహాను కెరె నాయ్, గని ఈంజొ యేసుచి రిసా జో సంగిలిసి ఎత్తి సత్తిమ్!” 42 ఒత్త తిలస బలేగ జిన యేసుక ఒత్త తెన్ నంపజల.

11

లాజర్ మెలో మాన్సు మొర గెలిసి

1 లాజర్ మెలో ఎక్కిలో జొర్డా సేడ్తెన్. జోకేన్ గవ్విచొ మెలె, మరియ మార్త మెల దొగుల బేస్సివొ చి బేతనియ గవ్విచొ. 2 పడ్తె తేర్బోద ఎక్కి యేసుక తేల్ గాన, జాచి సెండి తెన్ జోచ చట్టొ వుంచెదె. జయ్యి ఈంజ మరియ జయెదె. జొర్డా సేడ్తెసా జేవ్చొ అన్నొసి జయెదె.

3 జలె, లాజర్చ బేస్సివొ “ప్రబువ, తుయి ప్రేమ కెర్తొసా జబ్బు సేడ అస్సె” మెన యేసుతె కబుర్ తెద్రయ్ల. 4 గని యేసు ఈంజ కబుర్ సూన, “ఈంజ జబ్బు సేడ్తెసి జో మొర్తి రిసాయి నాయ్, గని దేముడుచి నావ్ గవురుమ్ జతి రిసాయి, ఆవ్ జోచొ పుత్తున్చి అదికారుమ్ దెకయ్తి రిసాయి” మెన, సిస్సుల్క సంగిలన్. 5 మార్తక, జాచి బేస్సిక, లాజర్క, యేసు బలే ప్రేమ తిలో, 6 గని లాజర్ ‘జబ్బు తెన్ అస్సె’ మెన సూన్లె కి, జో తిలి టాన్తె యేసు అన్నె దొరతి తాఁ గెలో.

7 జా దొరతి గెతికయ్, జోచ సిస్సుల్క, “యూదయ ప్రదేసిమి అన్నె గెచ్చుమ!” మెన యేసు సంగిలన్. 8 జేవ్ సిస్సుల్ జోవయింక “గురుబాబు, ఈంజ మదెనె యూదుల్చ వెల్లెల మాన్సుల్ తుక పత్తల్ గల మారుక ఉచర్తె తిలె కి, తుయి అన్నె ‘ఒత్త గెచ్చిందె’ మెన ఉచర్తెసి గే?” మెన బియఁ గెచ్చ జోక సంగిల. 9 యేసు జోవయింక, “ఒండి

మెద్దెనె పాసి పాసి బార గంటల్చి ఉజిడి తయెదె, గెద? దస్సి జలె, జా బార గంటల్చి ఉజిడి తిలె పొది మాన్సు ఇండిలె, ఈంజ లోకుమ్చి ఉజిడిచి రిసా జోక వాట్ డీస్తయ్, చి నేడె నాయ్. 10 గని, జేవ్ అందరె ఇండిలె, ఉజిడి నెంజిలి రిసా జేవ్ నేడుల” మెన సంగిలన్.

11 యేసు జోవయింక దస్సి సంగ అన్నె, “ఆవ్ ప్రేమ కెర్లో లాజర్ నిజ అన్నె, గని జోవయింక ఉట్టవుక గెతసి” మెలన్, చి 12 సిస్సుల్ “దస్సి జలె, ప్రబు, జో నిజ తిలెగిన, చెంగిల్ జయెదె. కిచ్చొ బాద నాయ్” మెలె. 13 జలె, ‘నిజ అన్నె’ మెన జో మొర్లిన్చి రిసా యేసు సంగ తిలన్. గని, ‘మాములుమ్ నిజ తతిన్చి రిసా సంగితయ్’ మెన సిస్సుల్ ఉచర్తతి. 14 తెదొడి “లాజర్ మొర గెచ్చు అన్నె” మెన యేసు జోవయింక సొస్టుమ్ సంగ, 15 అన్నె, “జో మొర గెలి పొది ఆవ్ ఒత్త నెంజిలిసి చెంగిలి. కిచ్చొక మెలె, తుమ్చి రిసాయి. మెలె, అంచి రిసా తుమ్ దయిరిమ్ తెన్ నంపజతి రిసా ఈంజ ఎత్కి జర్గు జతయ్. అల్లె, జోతె గెచ్చుమ!” మెన సంగిలన్.

16 ‘కల్వల్ జెర్మిలొసా’ మెలి ఆసిమ్ నావ్ తిలొ తోమా మెలొ సిస్సుడు, జలె, తిల సిస్సుల్క, “జోమ్మ, ఆమ్ ఇన్నెతెన్ మొర గెచ్చుక గెచ్చుమ!” మెన సంగిలన్, చి జేవ్ బార్ జల.

యేసు లాజర్చ బేన్సివొ తెన్ సంగిలిసి

17 జేవ్ బేతనియ గచ్చి పాసి అయ్లె, యేసు కిచ్చొ కబుర్ సూన్లొ మెలె, ‘లాజర్క మెన్నె రోవ చెత్తర్ పొదుల్ జా అన్నె’ మెన సూన్లన్. 18 జలె, జా గావ్ యెరూసలేమ్ పట్టుమ్ తెంతో పాసి పాసి ఎక్కి దొన్ని మయిలు దూరి అన్నె. ఒగ్గర్ దూరి నాయ్, 19 చి జేవ్చి అన్నొసి మొర్లి రిసా మార్తక చి మరియుక బురియవుక మెన, యెరూసలేమ్చ యూదుల్ ఒగ్గర్జిన్ జా అస్తి. 20 జలె, యేసు జెతయ్ మెన మార్త సూన కెర, జోక దస్సుల్ జంక మెన వాట్ ఎదక అయ్లి, గని మరియు గెరి తా గెలి. 21 మార్త జోక దస్సుల్ జా జొకర, యేసుక, “ప్రబు, తుయి ఇన్నె తత్తది జలె, అంచొ అన్నొ మొర్తో నాయ్. 22 గని అప్పె కి తుయి దేముడుతె కిచ్చొ సంగిలే కి తుక దెయెదె మెన జాని” మెన సంగిలి.

23 యేసు జాక, “తుచో అన్నొది అన్నె జీవ్ జా ఉట్టెదె” మెలన్.
 24 మార్త జలె, జోక “ఈంజ లోకుమ్ ఇసి తతిన్చి ఆకర్ దీసిక, ఈంజ లోకుమ్చ మాన్సుల్ ఎత్కిజిన్ అన్నెజీవ్ జా ఉట్టితి దీసిక, అన్నొ అన్నె ఉట్టెదె మెన జాని” మెన సంగిలి. 25 చి యేసు జాక, “మొర గెలనక ఉట్టయ్లోసా, దొర్కు జలి జీవ్ దెతోసా ఆవ్వి. అంక కో నంపజా గెచ్చుల గే జోవయించి ఆగ్ మొర గెలె కి, జివుల. 26 చి, కో అంక నంప తెన్ జితతి గే, సిచ్చ జతి మొర్కుతె కెయ్చ కి గెతి నాయ్. అమ్మ, ఈంజ కోడు తుయి నంపజతసి గే?” మెన పుసిలన్. 27 మార్త యేసుక “నంపజా అస్సి ప్రబు. ఈంజ లోకుమ్తె జెంక తిలో రచ్చించుప కెర్తోసా జతో క్రీస్తు తుయి మెన, దేముడుచో పుత్తుసి తుయి మెన నంప తెన్ అస్సి” మెన ఒప్పన సంగిలి.

28 జలె, మార్త ఇసి సంగిలి బేగి, యేసుక ఒత్త ముల దా గెరి గెచ్చు, “గురుబాబు జా అస్సె. తుక బుకార్తయ్” మెన బేస్సి జలి మరియక తిరీమ్ సంగిలన్. 29 మరియ ఈంజ కోడు సూన, చట్కున ఉట్ట, యేసుతె గెచ్చుక బార్ జలి. 30 ఈంజ మదెనె, యేసు కేనె అస్సె మెలె, మార్త జోక దస్సుల్ జా ముల దిలి టాన్తె రక అస్సె. గవ్వి జెంక నేతయ్.

31 మరియ చట్కున బార్ జతికయ్, జాతె జా తా జాక బురియయ్తె తిల యూదుల్ దెక, “మెస్సె ఏడుక గెతయ్, కిచ్చొగె” మెన ఉచర, జాచి పట్టి గెల.

32 జలె, యేసు తిలిన్తె మరియ పాచ కెర, జోక దెక జోచి చట్టె సెర్కు సేడ, “ప్రబు, తుయి ఇన్నె తత్తది జలె, అంచో అన్నొ మొర గెతో నాయ్” మెన సంగిలి.

33 జా ఏడ్డిసి, జేవ్ తెన్ అయ్ల యూదుల్ ఏడ్డిసి దెక, యేసు కన్కారుమ్ జా జోచి అత్తుతె బాద సేడ, 34 “జోక కేనె రోవిలదు?” మెన పుసిలన్, చి జేవ్ జోక “జా దెకు, ప్రబు!” మెన సంగిల.

35 యేసు ఆసుమ్ గేడవ ఏడ్లన్. 36 జో ఏడ్డిసి దెక, ఒత్త తిల యూదుల్ సగుమ్జిన్ “ఆదె, జోవయింక కెడ్డి ప్రేమ తిలో, ఈంజో!” మెన దెకయ్ల. 37 జోవయింతె అన్నె సగుమ్జిన్, మాత్తుమ్, “జో

గుడ్డి మాన్సుచ అంకివో డీనయలో, గెద. జలె, లాజర్ నే మొర్తి రితి కెర్టో జలె”, మెన సంగిల.

యేసు లాజర్ క జయడ్లిసి

38 తెదొడి యేసు జోచి ఆత్మతె అన్నె ఒగ్గర్ ఒగ్గర్ కన్నారుమ్ జా, మెన్నె పాచిలన్. ఈంజ మెన్నున్ కిసిచి మెలె, మెట్టయ్ తిలి సాప్రయ్ డొల్మి కెర్లి గది. జా డొల్మి కెర్లిన్ క డంక తిలిసి వెల్లో పత్తురు. 39 యేసు, “పత్తురు కడ గెల!” మెలన్. దస్సి మెంతికయ్, మొర గెలోసాచి మార్త మెలి బేన్ని జోక “ప్రబు, జో మొర గెచ్చు చెత్తర్ పొదుల్ జలి! పీనుమ్ వాసిన పెట్టె తయెదె!” మెన సంగిలి. 40 యేసు జాక “ఆవ్ తుక కిచ్చొ సంగిలయ్ గే, తుయి నంప తెన్ తిలెగిన, దేముడుచి గవురుమ్ నెక్కిచి రుజ్జు దెకితె.” మెన ఇదిల్ గోల కెర్లన్.

41 జలె, పత్తురు కడ గెల, చి యేసు ఆగాసుమ్ పక్క దెక “ఓ బ, తుయి అంచి ఆన నూన్లది మెన అంక సర్ద. 42 తుచి తెన్ ఆవ్ లట్టబ్బిసి తుయి కెయక తెయక నూన్తసి మెన ఆవ్ పూర్తి జాని, గని తుయి అంక తెద్రయ్ లిన్ చి రుజ్జు దెక నంపజతు మెన, ఇన్నె టీవ తిల ప్రెజలచి రిసా ఇసి చోడి పుట్టవ సంగితసి” మెన సంగ, గట్టిజ ఒర్న, 43 “లాజర్, బార్ జా!” మెన బుకార్లన్. 44 చి జో మొర గెలోసా, జోచ అత్తో చట్టో బందున్ తెన్ తతె, జోచి మొక్కె తువ్వల్ గుడియవ తతె, బార్ జా అయ్ లో, చి తిల మాన్సుల్ క యేసు “కట్టు యిప, జోక విడ్డల్ కెర!” మెన సంగిలన్.

యేసుక మారుక మెన యూదుల్ అన్నె కుట్ట కెర్లిసి

(మత్త 26:1-5; మార్కు 14:1-2; లూకా 22:1-2)

45 మరియ తెన్ జా తిల యూదుల్ తె ఒగ్గర్ జన్ జలె, యేసు కెర్లిసి దెక, జోక నంపజల. 46 గని జోవయింతె అన్నె సగుమ్ జిన్, పరిసయ్యుల్ తె గెచ్చు, యేసు కెర్లిసి జోవయింక సంగిల. 47 వెల్లెల పూజర్లు పరిసయ్యుల్ సబ కెర్తసక వెసవ దా, “అమ్ కిచ్చొ కెర్లె జయెదె? ఈంజొ మాన్సు ఒగ్గర్ ఒగ్గర్ వెల్లెల కమొ కెర్తయ్, చి 48 అమ్

జోక నే ములయ్యలె, ప్రైజల్ ఎత్కిజిన్ జోక నంపజా గెచ్చుల. చి రోమ్ దేసిమ్చ సయన్యుమ్ జా కెర, అమ్చి దేముడుచి గుడి కి అమ్చి ఒండి దేసిమ్ కి పాడ్ కెరుల” మెన సంగిల.

49 జలె, జేవ్ వెల్లెల మాన్సుల్తె కయప మెలో ఎక్కిలో తిలో. జా వెర్ని జొయ్యి ఎత్కిక వెల్లో పూజరి జా తిలో. సబతె తిలసక జో కిచ్చొ మెన సంగిలన్ మెలె, “తుమ్ కిచ్చొయ్ నేన్సు. 50 ఏక్ కోడు తుమ్ ఉచర. అమ్చ యూదుల్ అమ్చి దేసిమ్ పాడ్ నే జతి రితి ఎక్కిలో మొర్లె తుమ్క చెంగిలి” మెన సంగిలో. 51 జలె, జోక జొయ్యి ఈంజ కోడు సంగె నాయ్. గని జా వెర్ని జో ఎత్కిక వెల్లో పూజరి జా తిలి రిసా, దేముడు జోచి చోండి పుట్టవ సంగయ్లో. జా కబుర్చి అర్దుమ్ కిచ్చొ మెలె, యూదుల్తెచ మాన్సుల్క పాపుమ్ తెంతో రచ్చించుప కెర్తి రిసా యేసు మొరుక తిలి. 52 ఎక్కి యూదుల్తెచ మాన్సుల్క నాయ్. గని జోవయింక బోదల్ జల జోక నంపజల మాన్సుల్ ఎత్కిక, జేవ్ కేన్ దేసిమ్చ జలెకి, జేవ్క ఎక్కితె జోవయించి బెదవంతి రిసాయి మొరుక తిలి. 53 జలె జా దీసి తెంతో, ‘యేసుక కీసి మారుమ’ మెన, వెల్లెల మాన్సుల్ కుట్ర ఉచర్తె తిల.

54 జలె, జో మొర్తి సమయుమ్ జెంక నేతయ్చి రిసా యేసు, యూదుల్చ వెల్లెల మాన్సుల్ తిలిన్తె నే బుల్తె, ఒత్త తెంతో వెల్లి బయిలు పక్క, ఎప్తాయిమ్ మెంతి గవ్వె ఉట్ట గెచ్చు, జా మదెనె జోవయించ సిన్సుల్ తెన్ ఒత్త తా గెల.

55 యూదుల్చి జా వెర్నిచి *పస్కా పండుగు పాసి జా అయ్లి. జా పండుగు నే జెతె అగ్గె, సుద్ది కెరనుక మెన, యూదుల్ ఎత్కిజిన్ జోవయించ జోవయించ గవ్వెలె తెంతో యెరూసలేమ్తె జా అస్తి. 56 దేముడుచి గుడితె గెలస యేసుక రకితె అస్తి. ఒత్త రకితె తా కిచ్చొ మెన లట్టబంతె అస్తి మెలె, “తుమ్ కిచ్చొ ఉచర్తును? ఏక్ వేల పండుగ్క జెయె నాయ్ గే?” మెన లట్టబంతె అస్తి. 57 కిచ్చొక మెలె, జా మదెనె వెల్లెల పూజర్లు చి పరిసయ్యుల్ జోక జేలి కెరుక మెన ఉచర

* 11:55 11:55 పస్కా పండుగ్చి రిసా 2:13చి ఎట్టచి కోడు దెక.

“జో కేనె తయెదె గే కో జాన్లె, అమ్క సంగ!” మెన ప్రెజల్క ఆడ్ర దా అస్తి.

12

యేసుక వాసెన తేల్ గాన దిలిసి
(మత్త 26:6-13; మార్కు 14:3-9)

1 *పస్కా పండుగక సావ్యు పొదుల్ అగ్గె, యేసు బేతనియ గవ్వె అన్నె ఉట్ట అయలన్. జా గవ్వె యేసు జియడ్లె లాజర్ అస్సె. 2 జలె, యేసు ఒత్త తతికయ్, జోచి రిసా విందు దిల. మార్త జోగిడ్డి, చి యేసు తెన్ అన్నిమ్ కయలనతె లాజర్ తిలన్. 3 జేవ్ ఎత్కిజిన్ వెస తిలిన్తె, జలె, మరియ ఒగ్గర్ విలువ తిలి ఏక్ ఎదిలి చెంగిల్ వాసెన తేల్ ఆన్లి. ఆన, యేసుచ చట్టెతె గాన, జాచి సెండి తెన్ వుంచిలి, చి ఒండి గెరి జా తేల్చి వాసెన బెర్రి.

4 జలె, ఇస్కరియోతు యూదా మెలో యేసుచ సిస్సుల్తె తా, జో కి ఒత్త అస్సె. కొస్సె మెలె, జో వడ్డె విరోదుమ్ సుదల్తె యేసుక దెర దెయెదె. జలె, యేసుక మరియ జా తేల్ గాస్తికయ్, జో యూదా జాక, 5 “ఈంజ తేల్ సావ్యు వుంజో వెండ్లుక విక గెల్తది జలె, బీద సుదల్క జా డబ్బుల్ దర్ముమ్ దెంక జతి!” మెన గోల కెర్లన్. 6 గని ఆరిక సంగిలో, బీద సుదల్చి ఉప్పిర్చి కన్యారుమ్క నాయ్. కిచ్చొక మెలె, జో చోరు. సిస్సుల్చి డబ్బుల్ పెట్టె జోచి అత్తి తిలి, చి జా డబ్బుల్ జో చోర కంక అలవాల్ జా తిలో.

7 జలె, యూదా జా కోడు సంగితికయ్, యేసు జోక, “జాక గోల కెరు నాయ్. అంక †రోవెతి దీసికచి కామ్క ఈంజ గుర్తు తతి రితి జా, జా తేల్ తియ దా తిలి. తవుసు. 8 బీద సుదల్ కెయెక తెయెక తుమ్చి తెన్ తవుల చి రిసా ఇస్సుమ్ అయ్లి పొది జోవయింక

* 12:1 12:1 పస్కా పండుగచి రిసా 2:13చి ఎట్టెచి కోడు దెక. † 12:7 12:7 పస్కా పండుగక కీసి మెండవిల్లక అర్పితుమ్ దెవుల గే, దస్సి, ఈంజ జెతె తిలి పస్కా పండుగక యేసుయి పాపల్ గెచ్చయ్తి అర్పితుమ్ జయెదె.

దర్ముమ్ దెంక జయెదె. ఆమ్, మాత్రుమ్, కెయఁక తెయఁక తుమ్చి తెన్ ఇసి తయె నాయ్” మెన సంగిలన్.

⁹ యెరూసలేమ్తె †పండుగక బెర తిల యూదుల్, జలె, యేసుచి రిసా, జో ‘బేతనితె లాజర్తె అస్సె’ మెన నూన కెర, యేసుక దెకుక మెన, చి జో జియణ్ణో లాజర్క దెకుక మెన ఒత్త ఉట్ట అయ్ల.

10-11 జాకయ్, ‘లాజర్క జియణ్ణిసిచి రుజ్జు దెక ఒగ్గర్జిన్ అమ్చి ఆచారిమ్ ముల దా యేసుక నంపజతతి’ మెన వెల్లెల పూజర్లు బియఁ కెర, లాజర్క కి మారుక ఉచర్ల.

యేసు యెరూసలేమ్తె ఉట్ట అయ్లో

(మత్త 21:1-11; మార్కు 11:1-11; లూకా 19:28-40)

¹² ‘యేసు యెరూసలేమ్తె జెతయ్’ మెన పండుగక బెర తిల మాన్సుల్ అన్నెక్ దీసి నూన కెర, ¹³ ‘జో తెన్ దస్సుల్ జమ్దె’ మెన, పట్టుమ్ తెంతో బార్ జా కజురుమ్ రూకుల్చ మట్టల్ మోడ దెరన వట్టె జా తా, యేసు పాసి అయ్లి పొది “అమ్చో ప్రబుచి నావ్ తెన్ జెతో రచ్చించుప కెర్తొసాక జోఒర, జోఒర! అమ్చి ఇస్రాయేల్చ ప్రెజల్చో రానొక ఓనన్న, ఓనన్న!” మెన జోచి రిసా కేకుల్ గల్తె తిల.

14-15 జలె, ‘జర్లు జయెదె’ మెన దేముడుచి కొణెతె పూర్గుమ్ దేముడు రెగ్గయ్లి తిలిసి జర్లు జలి. కిసి మెలె, యేసు ఏక్ గాడ్డె పిల్ల దొర్కు కెరన, వెగ, పట్టుమ్తె అయ్లో.

“ఓ కీసిమోనుచి దువిసి, తుయి అన్నె బి నాయ్!

గాడ్డె పిల్లతె వెగ, తుమ్చో రానొ జెతయ్!”

మెన రెగిణ్ణి కోడు.

¹⁶ ఈంజ ఎత్కి జర్లు జతె తిలి పొది యేసుచ సిస్సుల్ కి అర్దుమ్ కెరంతి నాయ్. గని యేసు దేముడు అబ్బొన్తె అన్నె వెగ గెలి పడ్డె, యేసుక ఇసి జలి, చి జోచి రిసా దేముడు అబ్బొసి జా కోడు రెగ్గవ తిలన్ మెన ఉచార కెర్ల.

† 12:9 12:9 2:13చి ఎట్టొచి కోడుక దెక. § 12:14-15 12:14-15 ‘సీయోసుచి దువిసి’ మెలె, యూదుల్ మొత్తుమ్క టాలి జయెదె.

17 జలె, యేసు జో లాజర్ క మెస్సున్ తెంతో బుకారా జియడ తిలిన్ తె బెర తిల మాన్సుల్ జేవ్ జా ఇసి సొంత దెకిలిన్ క అప్పె సాచి సంగితె తిల. 18 యెరూసలేమ్ తెచ ప్రెజల్ కిచ్చొక యేసు తెన్ దన్నుల్ జంక బార్ జా తిల మెలె, లాజర్ క యేసు జియడ జోచి అదికారుమ్ క రుజ్జు దెకయ్ లిన్ చి రిసా సూన తిల. 19 ప్రెజల్ యేసుక నంపజతతి మెన పరిసయ్యుల్ దెక, “అయ్యె, జోవయింక పిట్టయ్ తిసి అమ్ అన్నె కిచ్చొ కెరుక కామ్ క నెంజె. ఆదె, లోకుమ్ ఎత్తిచ మాన్సుల్ జోచి పట్టి గెచ్చు అస్సి” మెన ఎక్కిలో తెన్ ఎక్కిలో లట్టబన్ల.

20 పండుగు పొది బక్తి కెరుక అయ్ లనతె నగుమ్ జన్ గ్రీసు దేసిమ్ చ మాన్సుల్ ఒత్త అయ్ ల. 21 జేవ్ జలె, గలిలయ తె తిలి బేత్ నయిదా గెవ్విచొ పిలిప్ మెంతో యేసుచొ సిస్సుడు ఎక్కిలోక చజ కెర జోక “బాబు, యేసు తెన్ లట్టబుక మెన అయ్ లమ్” మెన సంగిల. 22 చి పిలిప్ అంద్రెయ మెలో సిస్సుడుక సంగ, జేవ్ దొగుల యేసుతె జా, జోక సంగిల.

యేసు మొర గెచ్చుక తిలిన్ చి రిసా సంగిలిసి

23 యేసుక జేవ్ దొగుల సిస్సుల్ జా కబుర్ సంగితికయ్, జో జోవయింక, “ఆవ్ మాన్సు జా జెర్మన్ అయ్ లొసా గవురుమ్ జతి సమయమ్ జా అస్సె. 24 తుమ్ క ఆవ్ కిచ్చొ నిజుమి కచితుమ్ సంగితసి మెలె, గోదుమ్ గిడ్డ జవున్ పంటొ దెరుక జలె, బుయ్యె సేడ చొప్పా కుసుడ గెలెకయ్ జయెదె. దస్సి తొలితొ మొర్లి రితి నే జలెగిన, ఎక్కి గిడ్డయ్ తా గెచ్చెదె. గని దస్సి మొర్లి రితి జలె, ఒగ్గర్ పంటొ దెరెదె.

25 “జోచి జివుక జో కో ప్రిమ కెర రచ్చించుప కెరనుక ఉచరుల గే, జోచి ప్రానుమ్ పాడ్ జా గెచ్చెదె, గని ఈంజ లోకుమ్ తె కో జోచి సొంత జివుక విలువ నే దెకితె దేముడుక నిదానుమ్ కెరుల గే, జోచి జివు జోక దొర్కు జా, పరలోకుమ్ తె గెచ్చు కెయ్ క తెయ్ క ఒత్త జివుల. 26 అంచి సేవ కో కెరుల గే, అంచి పట్టి అయ్ లి రితి ఆవ్ కెర్తి రితి కెరుక, చి ఆవ్ కేనే తయిందె గే, అంచొ సేవ కెర్తొసా ఒత్తయ్ తంక. కో అంచి సేవ కెరుల గే, జోక కచితుమ్ దేముడు అబ్బొ గవురుమ్ కెరెదె.

27 “ఓ బ, అప్పె అంచి పెట్టి ఒగ్గర్ బాద జతసి. ఆవ్ తుక కిచ్చొ సంగుక? ‘ఓ బ, ఈంజ సమయుమ్చి కామ్ అంక పిట్టవు’ మెన సంగుక గే? నాయ్, నెంజె. ఈంజ కామ్చి రిసాయి, సమయుమ్చి రిసాయి ఈంజ లోకుమ్తె ఆవ్ అయ్లయ్, గెద? 28 ఓ బ, తుచి నావ్ గవురుమ్ కెరను” మెన దేముడు అబ్బొన్క ప్రార్దన కెర్లన్, చి బేగి, ఆగాసుమ్ తెంతో జో దేముడు జోచి అవాడ్ సూనయ్లన్. కిచ్చొ మెన సూనయ్లన్ మెలె, “అంచి నావ్ గవురుమ్ కెర అస్సి, చి అన్నె గవురుమ్ కెరనిందె” మెన సంగిలన్.

29 పాసి టీచ తిల జనాబ్ సూన్ల, చి “ఉర్ముల్ కెర్లి” మెన జోవయింతె సగుమ్జిన్ సంగిల. అన్నె సగుమ్జిన్, మాత్తుమ్, “దేముడుచి దూత ఎక్కిలో జో తెన్ లట్టబ్లన్” మెన సంగిల. 30 యేసు జోవయింక, “ఈంజ అవాడ్ సూనయ్లినీ అంక దయిరిమ్ కెర్లి రిసా నాయ్, అంక దయిరిమ్ అస్సె. గని తుమ్కయ్ ‘నంపజతు’ మెన సూనయ్లన్. 31 కిచ్చొక మెలె, అప్పె జర్గు జంక తిలిన్చి రిసా ఈంజ లోకుమ్చ తీర్పు జవుల. అప్పె జర్గు జంక తిలిన్చి రిసా, ఈంజ లోకుమ్క అప్పెచి మట్టుక ఏలుప కెర్తో సయ్తాసుక బార్ కెర పెలవ దెయెదె. 32 అన్నె, మాన్సుల్ అంక బుయి తెంతో ఉక్కుల టీచడ్డి పొదిక దేసిమ్లు ఎత్తి తెంతోచ మాన్సుల్క అంచితె బుకారా ఆనిందె” మెన ఒత్త తిలసక యేసు సంగిలన్. 33 ‘ఉక్కుల టీచడ్డి పొదిక’ మెలి కోడుతె కిచ్చొ అర్దుమ్ మెలె, ఏక్ *సిలువతె మాన్సుల్ యేసుక టీచడ్డె, మొరెదె. జో సంగిలిన్తె జయ్యి అర్దుమ్.

34 జలె, యేసు జా కోడు సంగితికయ్, జనాబ్తెచ మాన్సుల్ ఆచారిమ్ జా కిచ్చొ మెల మెలె, “ ‘రచ్చించుప కెర్తొసా జతో క్రీస్తు నే

* 12:33 12:33 ‘సిలువ’ కీసి తయెదె మెలె, ఏక్ టీచటి చి ఏక్ అడ్డుమ్ జతి దొన్ని డేడివో రిత డండల్ బెదవుల జా సిచ్చు జతో మాన్సుక జా సిలువతె ఎంగ్గవ కెర, జోవయించ అత్తొ చట్టొ చంపొ కెరవ, అత్తొచట్టొ మేకుల్ పెట, నెంజలె వాలివో తెన్ బంద దా, సిలువ బుయ్యె టీచ రోవ కెర దస్సె ములుల. జో సిచ్చు జతోసా దస్సి ఒడొయ్ జా మొరెదె. రోమ్ దేసిమ్చి అలవాట్ తెన్ చి సిచ్చ, జా.

మొరై కెయఁక తెయఁక తా గెచ్చెదె' మెన †మోసే పూర్ణమచొచి అత్తి దేముడు రెడ్డయల ఆగ్గుల్తె తిలిసి సూన అస్సుమ్. గని తూయి జలె, 'ఆవ్ మాన్సు జా జెర్మున్ అయ్లోసొక ఉక్కుల టీవడుక అస్సె' మెన తుయి సంగితసి. దస్సి జలె మాన్సు జా జెర్మున్ అయ్లోసొ క్రిస్తు జయెదె గే, నెంజె గే?" మెన అన్యానుమ్ జల.

35 జేవ్ దస్సి జతికయ్, యేసు జోవయింక, "అన్నె సగుమ్ దీసల్ అంచి ఉజిడి తుమ్చి తెన్ తయెదె. తుమ్ అందర్బుద్దిక దెర్పు నే సేడ్డి రిసొ, ఈంజ ఉజిడి తతె తుమ్ ఈంజ ఉజిడతె ఇండ. కిచ్చొక మెలె, అందర్తె కో ఇండుల గే, కేనె గెతతి గే నేన్తి. 36 తుమ్ ఉజిడవ పుత్తర్లు జతి రిసొ, ఈంజ ఉజిడి తుమ్తె తతె ఎద ఈంజ ఉజిడక పూర్తి నంపజంక దెర" మెన బోదన కెర్లన్. యేసు ఇసి సంగ కేడయ్లి పడ్డొ, ఒత్త తెంతొ బార్ జా, యూదుల్ నే చజతి రితి లుంకిల్ రితి తిలొ.

యూదుల్ నే నంపజలిన్చి రిసొచి కోడు

37 యేసు జోవయించి మొక్కె జోచి అదికారుమ్క రుజ్జు దెకయ్త ఎత్తివాల్ కమొ కెర తిలె కి, జోక జేవ్ నంపజతి నాయ్. 38 జేవ్ నే నంపజతిసి కిచ్చొక మెలె, యెసయా పూర్ణమచొచి అత్తి దేముడు రెగిడ్లి కోడు నెరవెర్నువ జతి రిసొయి.

"ఓ ప్రబువ, అమ్ సంగిలి తుచి కబుర్ సూన్లె కి, కో నంపజా అస్సి?

కోయి నాయ్. తుచి అదికారుమ్క రుజ్జు దెకయ్త కమొ

దెకిలెకి, జోవయించి జా సెక్తి కో చిన అస్సి? కోయి నాయ్"

మెన రెగిడ్లి కోడు. 39 జాకయ్ యేసుక నంపజంక నెతిర్ల. 40 పడ్డొ జోవయించి సిచ్చుచి రిసొ యెసయా పూర్ణమచొచి అత్తి జో ప్రబు రెగియ్లిసి అన్నెక్తె కి జయ్యి అర్దుమ్.

"జోవయించ అంకివొ గుడ్డి కెర్లి రితి కెర,

† 12:34 12:34 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రద్దయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పాచ్ పుస్తకుమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్ణమచొచి అత్తి రెగిడ్లి దేముడుచ ఆగ్గుల్ మెన రద్దవ అస్సె.

జోవయించి పెట్టి బేడు బందిలి రితి దేముడు కెర అస్యె.

‡ ‘జోవయించ అంకివో దెకుత్ నాయ్,
జోవయించి పెట్టి అర్దుమ్ కెరంతు నాయ్,
ఆవ్ దెతి వరుమ్ నజనుక బుల జెతు నాయ్’ మెన అంచి సెలవ్”
మెన ప్రబు రెగ్డయ్లి కోడు.

41 యెసయా పూర్గుమ్చో కిసి ఇసి మెలన్ మెలె, దేముడు దెకయ్లి సివుతె యేసుచి గవురుమ్చి గుర్తు దెక తిలో, చి జోచి రిసా రెగిడ్లన్.

42 యూదుల్తె ఒగ్గర్జిన్ యేసుక నే నంపజలెకి, జోవయింతె ఒగ్గర్జిన్ వెల్లెల మాన్సుల్ కి నంపజల. గని మాన్సుల్చి మొక్కె ఒప్పన్తి నాయ్. కిచ్చొక మెలె, ‘పరిసయ్యుల్ సూన్లె, అమ్క సబ గెరలె అన్నె పెనయితి నాయ్’ మెన బిల. 43 కిచ్చొక దస్సి బిల మెలె, దేముడు దెతి గవురుమ్చి కంట, మాన్సు దెతి గవురుమ్చయ్ ఆస జా తిల.

44 జలె, ఎత్కిజిన్ సూన్తి రితి కేక్ గల యేసు కిచ్చొ మెన బోదన కెర్లన్ మెలె, “కో అంకయ్ నంపజతతి గే, ఎక్కి అంకయ్ నాయ్, గని అంక తెద్దయ్లోసొక నంపజతతి. 45 అంకయ్ కో దెకితతి గే, అంక తెద్దయ్లోసొక దెకితతి.

46 “ఈంజ లోకుమ్తె కిచ్చొక అయ్లయ్ మెలె, అందర్బుద్ది ఇండిత ఈంజ లోకుమ్చ మాన్సుల్క ‘దస్సి తత్తు నాయ్, గని అంక నంపజా రచ్చించుప జతు’ మెన దొర్కు జలి ఉజిడి తా ఈంజ లోకుమ్తె అయ్లయ్. 47 అంచ కొణొ కో సూన్తతి గని కెర్తి నాయ్ గే, జోవయింక ఆవ్ తీర్పు కెరి నాయ్. కిచ్చొక మెలె, ఆవ్ ఈంజ లోకుమ్తె అయ్లిసి ఈంజ లోకుమ్చక తీర్పు కెర సిచ్చు కెర్తి రిసా నాయ్, గని జోవయింక రచ్చించుప కెర్తి రిసాయి అయ్లయ్.

48 “గని జాగర్త తా. కిచ్చొక మెలె, కో అంక నంప కెర్తి నాయ్, చి అంచ కొణొ సూన కెరుక నెసితి గే, జోవయింక తీర్పు కెర సిచ్చుతె తెద్దయ్తిసి అస్యె. మెలె, ఈంజ లోకుమ్చక తీర్పు కెర్తి జా ఆకర్

‡ 12:40 12:40 నెంజిలె. “నెంజిలె జోవయించ అంకివో దెకిత, జోవయించి పెట్టి అర్దుమ్ కెరంత, చి ఆవ్ చెంగిల్ కెర్తి వరుమ్ నజనుక పసుల జెత”.

దీనిక, ఆవ్ అప్పె సంగిల కొడొ జోవయింక కచితుమ్ తీర్పు కెర సిచ్చుతె తెద్రవుల. ⁴⁹ కిచ్చొక మెలె, అవ్వి కెర ఆవ్ కిచ్చొ సంగి నాయ్. ఆవ్ కిచ్చొ మెన లట్టబుక గే, కిచ్చొ సంగుక గే, అంక తెద్రయ్లో దేముడు అబ్బొయి అంక ఆడ్ర దా అస్సె. ⁵⁰ అన్నె కేనె నాయ్, గని జోచి కోడు కెర్తినెయ్ పరలోకుమ్తె బెదితి కెయ్చ తెయ్చ చెంగిల్ తతి సెక్తి అస్సె మెన కచితుమ్ జాని. జాకయ్ ఆవ్ కిచ్చొ సంగితసి గే, దేముడు అబ్బొయి సంగిల్ రితి ఆవ్ సంగితసి.”

13

యేసు జోచ సిస్సుల్క చట్టా దోవిలిసి

¹ ఈంజ లోకుమ్ ముల దా దేముడు అబ్బొనె అన్నె ఉట్ట గెతి సమయుమ్ అయ్లి మెన యేసు జానె. జో ఈంజ లోకుమ్తె నిసాన్ల బారజిన్ సిస్సుల్క అగ్గె తెంతో ప్రేమ కెర్తయ్, గని అప్పె, *పస్కా పండుగ్క ఏక్ దీసి అగ్గె, ఆకర్ ఎదచి జోచి ఎదివాట్ ప్రేమ సొస్టుమ్ దెకయ్లో.

² జా సంజె, యేసు జోవయించ బారజిన్ సిస్సుల్ తెన్ ఎక్కితె అన్నిమ్ కెర్తతి. ఇస్కరియోతు సీమోనుచొ యూదా మెలో పుత్తుసి జోవయింతె అస్సె. జలె, యేసుక విరోదుమ్ సుదల్చి అత్తి దెర దెంక మెన సయ్తాన్ యూదాక సికడ అస్సె. ³ గని, ‘దేముడు అబ్బొ అంచి అత్తి ఎత్తి సార్ప కెర దా అస్సె, చి దేముడు అబ్బొ తెంతో ఉత్త్ర అయ్లయ్, చి దేముడు అబ్బొతెయి ఆవ్ అన్నె ఉట్ట గెతసి’ మెన యేసు జానె.

⁴ జలె, అన్నిమ్ కెరె తిలి పొది యేసు ఉట్ట, జో గలన తిలి దిగిల్ సొక్క రితిసి తియ దా, జోవయించ సిస్సుల్క, జో గొత్తి సుదొ జతి రితి గుర్తుక, ఏక్ తువ్వల్ కెరంటె బందన్లన్. ⁵ తెదొడి తప్పలయ్ పాని సువ కెర, సిస్సుల్క చట్టా దోవ జో బందన్ల తువ్వల్ తెన్ పుంచుక

* **13:1** 13:1 పస్కా పండుగ్క కిసి మెండపిల్లక అర్చితుమ్ దెవుల గే, దస్సి, ఈంజయ్ పండుగు దీసి యేసుయి పాపల్ గెచ్చయ్తి అర్చితుమ్ జయెదె.

దెర్లన్. నగుమ్జిన్చ చట్టా దోవ వుంచ తా, 6 సీమోను పేతురుచ చట్టా దోవుక మెన జోతె పావిలన్. గని పేతురు జోక, “ప్రబు, తుయి అంచ చట్టా దోవుక గే? పొని!” మెన బమ్మ తెన్ సంగిలన్. 7 ‘పొని’ మెన సంగితికయ్, యేసు జోక “ఆవ్ అప్పె కెర్లిసి తుక అప్పె అర్దుమ్ నాయ్. గని పడ్డొక అర్దుమ్ కెరంతె” మెన సంగిలన్. 8 పేతురు జోక అన్నె, “ప్రబు, తుయి అంచయ్ చట్టా కెయ్చ కి దోవుక ఆవ్ ఒప్పి నాయ్” మెన ఒగ్గర్ జా సంగిలన్. యేసు జోక, “ఆవ్ తుక †సుబ్బుమ్ నే కెర్లె, అంచి రాజిమ్తె తుక కిచ్చొ వాట తయె నాయ్” మెన సంగిలన్. 9 పేతురు జోక, “ప్రబు, దస్సి జలె, అంచ చట్టా అత్తో బోడి కి, ఎత్తి దోవ గెలు!” మెన సంగిలన్.

10 తెదొడి యేసు జోక, “కో పొని నాయ తవుల గే, జోచ చట్టాక పిట్టవ, పూర్తి సుబ్బుమ్ జా తవుల. దస్సి, ఎక్కిలోక పిట్టవ, తుమ్ ఎత్తిజిన్ సుబ్బుమ్ జా అస్సున్” మెలన్. 11 యేసు కిచ్చొక దస్సి మెలన్ మెలె, కో జోక విరోదుమ్ సుదల్తె దెర దెయెదె గే జో జానె. జాకయ్ ‘ఎక్కిలోక పిట్టవ తుమ్ ఎత్తిజిన్ సుబ్బుమ్ జా అస్సున్’ మెన సంగ తిలొ.

12 సిస్సుల్చ చట్టా దోవ కేడయ్లి పడ్డొ, జోచ పాలల్ అన్నె గలన, అన్నె అన్నిమ్తె వెన, యేసు జోవయింక, “ఆవ్ తుమ్క కెర్లి గుర్తుచి రిసా తుమ్క అర్దుమ్ జలి గే నాయ్ గే? 13 అల్లె, అంక ‘గురు’, ‘ప్రబు’ మెన తుమ్ సంగితసు. బాద నాయ్. ఆవ్ నిజుమి తుమ్చొ గురు, తుమ్చొ ప్రబు. 14 ఆవ్ జలె, తుమ్చొ ప్రబు తుమ్చొ గురు జలెకి, తుమ్క సేవ కెర్లి ఏక్ గుర్తుక తుమ్చ చట్టా దోవితని జలె, తుమ్ జా గుర్తుచి అర్దుమ్ కెరన తుమ్ కి ఎక్కిలోచ చట్టా ఎక్కిలో దోవిలి రితి జా, ఎక్కిలోక ఎక్కిలో సేవ కెర్లె తంక. 15 ఆవ్ అప్పె కెర్లిసి జా గుర్తుకయ్, తుమ్క ఆవ్ కెర్లి రితి తుమ్ ఎక్కిలోక ప్రేమ కెర్లె తంకయ్. 16 తుమ్క నిజుమి కచితుమ్ ఆవ్ కిచ్చొ సంగితని మెలె, సేవ కెర్లొసా జోచొ ఎజొమానిచి కంట వెల్లొ నెంజె. దస్సి, తెద్రయ్ జలొసా, జలె,

† 13:8 13:8 13:1చి ఎట్టాచి కోడు దెక.

జోక తెద్రయ్లోసాచి కంట వెల్లో నెంజె. 17 జలె, ఈంజ ఎత్కిచి అర్దుమ్ కెరన్దదు మెలె, జా బుద్ది ఇండితె తిలె తుమ్క చెంగిలి.

విరోదుమ్ సుదల్తె దెర దెయెదె

(మత్త 26:20-25; మార్కు 14:17-21; లూకా 22:21-23)

18 “గని, ఆవ్ అప్పె సంగిలి బుద్ది తుమ్ ఎత్కిజిన్ జసు నాయ్. కిచ్చొక మెలె, ఆవ్ నిసాన్లసచి బుద్ది ఆవ్ జాని. అప్పె జర్గు జతిసి కిచ్చొక జయెదె మెలె,

అంచి తెన్ అన్నిమ్ కెర్లొ ఎక్కిలో అంక తావ్ దిలి రితి కెరెదె

మెన రెగిడ్డి కోడు అప్పె నెరవెర్పుప జంకయ్. 19 ఈంజ ఎత్కి జర్గు నే జతె అగ్గె ఆవ్ తుమ్క కిచ్చొక సంగితసి మెలె, జా జర్గు జలి మెలె, జా రుజ్జు దెక, ‘నిజుమి దేముడు తెద్రయ్లో క్రీస్తు రచ్చింఛుప

కెర్లొసా’ మెన అంచి రిసా తుమ్ పూర్తి దయిరిమ్ తెన్ నంప జస్సె. 20 తుమ్క అన్నె కిచ్చొ నిజుమి కచితుమ్ ఆవ్ సంగితసి మెలె, ఆవ్ తెద్రయ్త మాన్సుల్క కో నంపజా మరియాద కెరుల గే, అంకయ్ నంపజా మరియాద కెర్లి రితి జయెదె. అంకయ్ నంపజా కో మరియాద కెరుల గే, అంక తెద్రయ్లోసాక నంపజా మరియాద కెర్లి రితి జయెదె”

మెన సంగిలన్.

21 ఈంజేవ్ కొణొ సంగ కెర, యేసు జోచి మెన్సుతె బాద సేడ, సిస్సుల్క కిచ్చొ సాచి సంగిలన్ మెలె, “తుమ్క కిచ్చొ నిజుమి కచితుమ్ ఆవ్ సంగితసి మెలె, తుమ్చితె ఎక్కిలో అంక విరోదుమ్ సుదల్చి అత్తి సార్పు కెర దెయెదె” మెన సంగిలన్. 22 జలె, కిచ్చొ రిసా సంగితయ్ గే నేన్తి, చి ఎక్కిలోక ఎక్కిలో అన్మానుమ్ తెన్ దెక దుకుమ్ జల. 23 గని యేసు ఒగ్గర్ పేమ కెర్లొ సిస్సుడు ఎక్కిలో యేసుచి †గుండెచి ఉప్పిరి పెల వెస అస్సె. 24 జాకయ్, సీమోను పేతురు జో సిస్సుడుక నయ్న కెర, “కచి రిసా సంగితయ్ గే, నూన అమ్క సంగు” మెన సంగిలన్. 25 జాకయ్, యేసుచి గుండెచి ఉప్పిరి

† 13:23 13:23 జోవయింఛ విందుల్ రిత అన్నిమ్తె బల్లచి నుట్టునంత బెంచి చి ఉప్పిరి ఇదిల్ ఎంగ్గ తిలి రితి ఒర్గు జా అన్నిమ్ కెరుల.

పెల తిలో జో సిస్సుడు “ప్రబు, కచి రిసా దస్సి సంగిలది?” మెన పుసిలన్, చి ²⁶ యేసు పొడి గండ దెర, “ఈంజ పొడి గండ రోన్తె బుడ్డవ కక్క దెయిందె గే, జొయ్యి” మెన సంగిలన్. సంగ, జా గండ బుడ్డవ కెర, ఇస్కరియోతు సీమోనుచొ పుత్తున్ జలో యూదాక దిలో. ²⁷ యూదా జా గండ నజ్లి బేగి, సయ్తాన్ జోక దెర్లన్. యేసు జానె, చి “తుయి కెరుక తిలిసి బే బేగి జర్గు కెరు!” మెన యూదాక సంగిలన్.

²⁸ యేసు యూదాక కిచ్చొక దస్సి సంగిలన్ గే జా అన్నిమ్ కెర్తె తిలనతె కోయి నేన్తి. ²⁹ గని జోచి డబ్బుల్ పెటె యూదాచి అత్తి తిలి, చి ‘పండుగు అన్నిమ్క దొర్కు జలిసి గెన ఆను’ జలెకు, ‘బీద సుదల్క కిచ్చొ జవున్ దర్ముమ్ దేసు’ మెన యేసు జా కోడు సంగ తయెదె మెన సగుమ్జిన్ ఉచర్ల. ³⁰ జలె, జా గండ నజన, యూదా చట్కున బార్ జా ఉట్ట గెలన్. తెదొడి అందర్ జా తిలి.

ఎక్కిలోక ఎక్కిలో ప్రేమ కెర్తె తా

³¹ యూదా బార్ జతికయ్, తిల సిస్సుల్క యేసు, “అప్పెయి జర్గు జతిసి తెన్ ఆవ్ మాన్సు జా జెర్మున్ అయ్లోసాచి గవురుమ్ డీసెదె, చి అంక జర్గు జతిన్చి రిసా దేముడు ప్రబుచి గవురుమ్ డీసెదె. ³² అంచితె జర్గు జతిన్తె దేముడుక గవురుమ్ జెయెదె, చి జా కామ్తె అంక కి జో గవురుమ్ కెరెదె. బేగి గవురుమ్ కెరెదె.

³³ “ఓ పుత్తర్లు, అప్పె ఏక్ గడియయ్ తుమ్చి తెన్ ఇసి తయిందె, చి ఉట్ట గెచ్చిందె. ఆవ్ గెలె, అంక చజితె, గని యూదుల్క ఆవ్ సంగిలి రితి, ఆవ్ కేనె గెచ్చిందె గే, తుమ్ అప్పె ఒత్త జెంక నెతుర్పు.

³⁴ “జలె, తుమ్క ఏక్ నొచి ఆగ్గు దెతసి. కిచ్చొ ఆగ్గు మెలె, తుమ్ ఎక్కిలోక ఎక్కిలో ప్రేమ కెర్తె తా. ఆవ్ తుమ్క కెర్ది ప్రేమ దెకవ అస్సి గే, దస్సి తూమ్ కి ఎక్కిలోక ఎక్కిలో ప్రేమ కెర్తె తంక. ³⁵ తుమ్చితె ఎక్కిలోక ఎక్కిలో దస్సి ప్రేమ కెర్తె తిలె, తుమ్క ‘అమ్చ సిస్సుల్’ మెన పైజెల్ ఎత్తి చినుల. జయ్యి జోవయింక రుజ్జు తయెదె” మెన బోదన కెర్లన్.

36 తెదొడి సీమోను పేతురు “ప్రబు, కేనె గెతి రిసా తుయి సంగితసి?” మెన యేసుక పుసిలన్, చి యేసు జోక, “ఆవ్ కేనె గెతసి గే, తుయి అప్పె అంచి పట్టి జెంక నెతిర్ని, గని పడ్డొక జెస్తె” మెన సంగిలన్. 37 జాకయ్ పేతురు జోక, “ప్రబు, ఆవ్ కిచ్చొక అప్పె తుచి పట్టి జెంక నెతిరి? తుచి రిసా ఆవ్ మొర కి గెచ్చిందె!” మెన సంగిలన్. 38 యేసు జోక, “అంచి రిసా తుయి మొర గెచ్చుక దయిరిమ్ గే? తుక కిచ్చొ నిజమి కచితుమ్ ఆవ్ సంగితసి మెలె. ఆజి రాతిక, కుకుడొ నే వాస్తై అగ్గె, ‘జోక నేని’ మెన తుయి తివ్వెరి అంచి రిసా సంగితె” మెన సంగిలన్.

14

యేసు సిస్సుల్క దయిరిమ్ సంగిలిసి

1 తెదొడి యేసు సిస్సుల్క, “ఆవ్ ఉట్ట గెలె, తుమ్చ పెట్టి చింత గలన నాయ్. దేముడుక నంపజా దయిరిమ్ తెన్ తా. అంక కి నంప తెన్ తా. 2 జో అంచొ అబ్బొసి జలొ దేముడుచి గెరి ఒగ్గర్ గదివొ అస్తి. తుమ్క కి ఒత్త టాన్ అస్సె. నెంజిలె తుమ్క సంగితయ్. తుమ్క జా టాన్ తెయార్ కెరుకయ్ ఆవ్ గెతసి. 3 ఆవ్ గెచ్చ తుమ్ తతి టాన్ తెయార్ కెర్లయ్ మెలె, తూమ్ కి అంచి తెన్ తంక మెన, అంచితె కడ నెతి రిసా అన్నె జెయిందె. 4 ఆవ్ గెతి టాన్చి వాట్ తుమ్ జాన్సు” మెన సంగిలన్.

5 జాకయ్ తోమా మెలొ సిస్సుడు జోక, “ప్రబు, తుయి కేనె గెతసి గే నేనుమ్. జా వాట్ అమ్ కీసి జానుక జయెదె?” మెన పుసిలన్, 6 చి యేసు జోవయింక, “ఒత్త గెతి వాట్ ఆవ్వి. ఒత్త గెతి రిసా దొర్కు జలి సత్తిమ్ ఆవ్వి. ఒత్త గెతి రిసా దొర్కు జలి బీవు ఆవ్వి. అంక నంపజలెకయ్ మాన్సు దేముడు అబ్బొతె జెంక జయెదె. నెంజిలె కొ జెంక నెతిర్తి. కేన్ వేర వాట్ నాయ్. 7 అంక తుమ్ నిజమి జాన్తసు జలె, అంచొ దేముడు అబ్బొకయ్ జాన్తసు. అప్పె తెంతొ తుమ్ జోక జాన్సు, జోక దెక అస్సున్” మెన సంగిలన్.

8 జలె, పిలివ్క అర్దుమ్ నాయ్ చి రిసా, “ప్రబు, దేముడు అబ్బొద్క అమ్క దెకవు, చి అమ్క అన్నె కిచ్చొ నాయ్” మెన సంగిలన్. 9 యేసు జోక, “ఓ పిలివ్, తుమ్చి తెన్ ఆవ్ ఎత్తి దీసల్ తిలె కి, అప్పెక అంక చినిస్ నాయ్ గే? కో అంకయ్ దెక అస్తి గే, దేముడు అబ్బొన్క కి దెక అస్తి. జాకయ్, దేముడు అబ్బొద్క అమ్క దెకవు మెన తుయి కిచ్చొక వునుక? 10 ఆవ్, అబ్బొసి జలో దేముడుచి పెట్టి తిలిసి, దేముడు అబ్బొ అంచి పెట్టి తిలిసి, తుయి నంప కెర్చి నాయ్ గే? తుమ్క ఆవ్ సంగితిసి సికడ్డిసి ఆవ్ అచ్చి ఉచర్చిసి నెంజె. అంచి పెట్టి తిలొ దేముడు అబ్బొ అంచి అత్తి జోచ కమె కెర్తయ్. 11 ఆవ్ అబ్బొసి జలో దేముడుచి పెట్టి అస్సి, దేముడు అబ్బొ అంచి పెట్టి అస్సె. ఈంజ కోడు నంప కెరు. నెంజెలె, ఆవ్ సంగిలి రిసా నే నంప కెర్లె, అంచి అత్తి జర్గు జత కమెక ఉచర నంప కెర్లు. 12 తుమ్క నిజుచ్చి కచితుమ్ ఆవ్ కిచ్చొ సంగితసి మెలె, అంక కో నంపజవుల గే, ఆవ్ కెర్త కమె జేవ్ కి కెరుల. ఆవ్ కెర్లనచి కంట జిన్లన కెరుల. కిచ్చొక మెలె, ఆవ్ దేముడు అబ్బొతె ఉట్ట గెతసి. 13 అంచి నావ్ తెన్ తుమ్ కిచ్చొ నజెతె గే, ఆవ్ పుత్తుసి కెర్తినతె అబ్బొసి జలో దేముడుచి గవురుమ్ డీసున్ మెనయ్, జయి ఆవ్ జర్గు కెరిందె. 14 అంచి నావ్ తెన్ తుమ్ కిచ్చొ జలెకి నజెలె కి, జర్గు కెర దెయిందె.

దేముడుచి నుద్ది తిలి ఆత్మ తెద్రవుక తిలిన్చి యేసు సంగిలిసి

15 “తుమ్ అంచి ఉప్పిరి ప్షేమ తెన్ తిలె, అంచ *కొడొ రితి ఇండితె తస్సె. 16 తుమ్ దస్సి జలె, దేముడు అబ్బొన్క సంగిమెదె, చి అన్నెక్లొ తోడు కెర్తొసాక తుమ్తె తెద్రయెదె. జో తుమ్చి పెట్టి తా, కెయ్చ తెయ్చ తుమ్క తోడు తయెదె. 17 జో కొన్సొ మెలె, పరలోకుమ్చి సత్తిమ్ తిలి సత్తిమ్ దెకయ్తి ఆత్మ. ఈంజ లోకుమ్చి బుద్ది తిల మాన్సుల్ జోక నంపజంక నెత్తిర్చి. కిచ్చొక మెలె, జో డీస్తొసా నెంజె,

* 14:15 14:15 నెంజెలె, ‘అంచ ఆగ్గుల్ రితి ఇండితె తస్సె’.

చి జోక చినితి నాయ్, నేన్తి. తూమ్ మాత్రుమ్, జోక జాన్సు. కిచ్చొక మెలె, జో తుమ్చి తెన్ తత్తయ్, †చి పడ్డొక తుమ్చి పెట్టి తయెదె.

18 “తుమ్క ములిలె, తుమ్ పొరబోదల్ తతి రితి కెరి నాయ్. తుమ్తె జెయిందె. 19 గడియయ్ తిలె, మాములుమ్ ఈంజ లోకుమ్చ మాన్సుల్ అంక అన్నె దెకితి నాయ్, గని తూమ్ అంక అన్నె దెకితె. మెలె, ఆవ్ జితసిచి రిసా తూమ్ కి జిస్తె. 20 ఆవ్ అబ్బొసి జలో దేముడుచి పెట్టి తిలిసి, తూమ్ అంచి పెట్టి తిలిసి, చి ఆవ్ తుమ్చి పెట్టి తిలిసి, తెదొడకయ్ తుమ్క అర్దుమ్ జెయెదె. 21 అంచ †కొడొ కో నూన కెరుల గే, జెవ్వి అంక ప్రేమ కెర్తసయ్. కో అంకయ్ ప్రేమ కెర్తతి గే, అంచో దేముడు అబ్బొ జోవయింకయ్ ప్రేమ కెరెదె. ఆవ్ కి జోక ప్రేమ కెర, అంచి సత్తిమ్చి రిసా జోక రుజ్జుల్ దెకయిందె, జోక ఆవ్ సొన్లుమ్ సొంత డీసిలి రితి” మెన యేసు సంగిలన్.

22 తెదొడి యూదా మెలొ ఎక్కిలొ, ఇస్కరియోతు యూదా నెంజె, వేరచొ జో, జలె, యేసుక “కిచ్చొక ఈంజ లోకుమ్చ మాములుమ్ మాన్సుల్క నాయ్, గని ఎక్కి అమ్కయ్ డీస్తె, తుచ రుజ్జుల్ దెకయ్తె?” మెన పుసిలొ. 23 పుసిలె యేసు జోక, “అంచి ఉప్పిరి కో ప్రేమ తెన్ తవుల గే, అంచి కొడొ రితి కెరుల, దస్సి జలసకయ్ దేముడు అబ్బొ ప్రేమ కెరెదె. దస్సి జలసతెయి దేముడు అబ్బొ ఆవ్ జెమ్దె, చి జోచి తెన్ బస జా జో తెన్ తా గెచ్చుమ్దే. 24 అంచి ఉప్పిరి కో ప్రేమ తెన్ తతి నాయ్ గే, జెవ్వి అంచ కొడొ రితి కెర్తి నాయ్. తుమ్ నూన్తి ఈంజ కోడు, జలె, కచి మెలె, ఆవ్ అవ్వి ఉచర్లిసి నెంజె. అంక తెద్రయ్లొ అబ్బొసి జలో దేముడుచి కోడు.

25 “జలె, ఆవ్ తుమ్చి తెన్ ఈంజ లోకుమ్తె తతె, అవ్వి ఈంజ బోదన ఎత్తి తుమ్క నూనవ అస్సి. 26 గని, ఆవ్ దేముడు అబ్బొతె గెలె, దేముడు అబ్బొ అంచి నావ్ తెన్ తుమ్క తోడు తతోసొక తెద్రయెదె. జో తోడు తతోసొ కొన్సొ మెలె, దేముడుచి సుద్ది తిలి అబ్బొసి జలో దేముడుచి సుద్ది తిలి ఆత్మయి. జో అమ్చి ఆత్మయి

† 14:17 14:17 నెంజలె, “చి తుమ్చి పెట్టి అస్సె”. ‡ 14:21 14:21 నెంజలె ‘అగ్గుల్’.

తతోసా తుమ్క ఎత్తి సికడెదె. ఆవ్ తుమ్క సంగిలిసి ఎత్తి తుమ్క ఉచార కెరయెదె.

27 “జలె, ఆవ్ తుమ్క సేంతుమ్ దా కెర ఉట్ట గెతసి. అంచి సేంతుమ్ తుమ్క దెతసి. ఈంజ లోకుమ్చ దెతి రగుమ్చి నెంజె. జాకయ్ కిచ్చొ బాదల్ అల్లర్ అయ్లె కి, తుమ్చ పెట్టి చింత గలన నాయ్, బయిమ్ తియన నాయ్. 28 ‘ఆవ్ ఉట్ట గెలె కి, తుమ్తె అన్నె జెయిందె’ మెన సంగిలిసి నూన్లదు. తుమ్ అంచి ఉప్పిరి పూర్తి ప్రేమ తత్తదు జలె, ఆవ్ దేముడు అబ్బొతె గెతినచి రిసా సర్ల జతదు. కిచ్చొక మెలె, దేముడు అబ్బొ అంచి కంట వెల్లో. ఒత్త గెలె, ఇన్నె తతి కంట అంక చెంగిలి, తుమ్క చెంగిలి. 29 జలె, జా ఎత్తి జర్గు నే జతె అగ్గె తుమ్క కిచ్చొక సంగితసి మెలె, తుమ్క ‘జా జర్గు జతి పొదిక, పూర్తి నంప తెన్ తా, బమ్మ నెంతె దయిరిమ్ తత్తు’ మెనయ్ అంచి ఆస.

30 “తుమ్చి తెన్ అన్నె ఒగ్గర్ లట్టబుక సమయుమ్ నాయ్. కిచ్చొక మెలె, ఈంజ లోకుమ్ ఈంజ మదెనె ఏలుప కెర్తొసా, సయ్తాన్ జెతయ్. అంచి ఉప్పిరి జోక కిచ్చొ అదికారుమ్ నాయ్, 31 గని దేముడు అబ్బొ అంక తియార్లి కామ్ ఆవ్ కెరుక అస్సె. జో సంగిలి రితి ఆవ్ కెర్లె, అంక ‘నిజుమి, దేముడు అబ్బొన్క ప్రేమ కెర్తయ్’ మెన లోకుమ్ ఎత్తిచ చినుల. అల్లె, జొమ్మ, గెచ్చుమ!” మెన సంగిలన్.

15

ద్రాచ రూకచి టాలి

1 తెదొడి యేసు ఇసి మెన టాలి సంగిలన్. “ఆవ్ నిజుమ్ జలొ ద్రాచ రూకు జయిందె. అంచొ దేముడు అబ్బొ రూకుక పొస్తాసా జయెదె. 2 జలె, అంచ కొన్నుల్తె కేన్ కొన్నుతె పంటొ దెరె నాయ్ గే, ఈంజొ రూకు పొస్తా దేముడు అబ్బొ జా కొన్ను గెచ్చువ గెలెదె. గని కేన్ కొన్నుతె పంటొ దెరెదె గే, ‘అన్నె ఒగ్గర్ పంటొ దెర్పు’ మెన, కొన్నుల్ కుట్టవ గెలెదె.

3 “తుమ్క ఆవ్ నూనయలి కొణొ నూన్లదుచి రిసా, తుమ్ నుద్ది జా అస్సున్. 4 జలె, ఆత్మక అంచి తెన్ బెద తా అంచి తెడి తుమ్ జియ అంచి సెక్తిక ఇండ, అంచి పెట్టి తా. ఆవ్ కి తుమ్చి పెట్టి తయిందె. తీగెచి కొన్న అజ జలె, ఒత్త కిచ్చొ పంటొ దెరుక నెత్తె. తీగె తెన్ ఎక్కి తిలెకయ్ ఒత్త పంటొ దెరెదె. దస్సి, తుమ్ ఆత్మక అంక ముల అజ జలె, తుమ్తె కిచ్చొ *పంటొ దెర్తి రితి జంక నెతుర్పు. అంచి తెన్ ఎక్కి తిలెకయ్ †పంటొ తుమ్తె దెరెదె.

5 “ద్రాచ రూకు అచ్చి, రూకీచి జీవు అంచి పెట్టి అస్సి. తూమ్ అంచ కొన్నల్. ఆత్మక అంచి తెన్ బెద తా అంచి తెడి జియ అంచి సెక్తిక కో ఇండ అంచి పెట్టి తవుల గే, జోచి పెట్టి ఆవ్ తయిందె, చి జో తెన్ ఒగ్గర్ ‡పంటొ దెర్తి తయెదె. ఆవ్ నెంజిలె, తుమ్ కిచ్చొ కెరుక నెతుర్పు. 6 కో ఆత్మక అంచి తెన్ బెద నే తతె అంచి తెడి నే తతె అంచి సెక్తిక నే ఇండితె అంచి పెట్టి తతి నాయ్ గే, కామ్క నెంజిలి కొన్న కుట్టవ వెంట గెలి రితి జయెదె, కొమ్మ జా మొర గెచ్చెదె. కొన్నల్ దస్సి జలె, జోవయింక గుడ్డ కెర ఆగితె గల డయుల. కో ఆత్మక అంచి తెన్ బెద నే తతె అంచి తెడి నే తతె అంచి సెక్తిక నే ఇండితె అంచి పెట్టి తతి నాయ్ గే, దస్సి జవుల. 7 గని ఆత్మక అంచి తెన్ బెద తా అంచి తెడి జియ అంచి సెక్తిక తుమ్ ఇండ అంచి పెట్టి తా అంచి కోడు రితి తుమ్ కెర్తె తిలె, తుమ్ అంచితె కిచ్చొ నజితె గే, తుమ్చి రిసా జర్గు జయెదె. 8 తుమ్ దస్సి జా చెంగిల్ సీపంటొ ఒగ్గర్ తుమ్తె దెర్తె, చి దేముడు అంచొ అబ్బొన్క మాన్సుల్ గవురుమ్ కెరుల. జయ్యి పంటొ జోవయింక గవురుమ్ ఆనెదె, అంచ సిస్సుల్ తుమ్ కచితుమ్ జలిన్క రుజ్జు డీసెదె.

9 “దేముడు అంచొ అబ్బొ అంకయ్ కీసి ప్రేమ కెర్తయ్ గే, ఆవ్ కి తుమ్క దస్సి ప్రేమ కెర అస్సి. అంచి ప్రేమ తెడి తుమ్ తా. 10 దేముడు

* 15:4 15:4 ‘పంటొ’ నెంజిలె ‘ఆత్మపంటొ’. † 15:4 15:4 ‘పంటొ’ నెంజిలె ‘ఆత్మపంటొ’. ‡ 15:5 15:5 ‘పంటొ’ నెంజిలె ‘ఆత్మపంటొ’. § 15:8 15:8 ‘పంటొ’ నెంజిలె ‘ఆత్మపంటొ’.

అంచొ అబ్బొచ *కొడొ ఆవ్ కెర్తె తా జోచి ప్రేమచి తెడి తా జోచి ప్రేమ తెన్ ఇండితసి. దస్సి, అంచయ్ కొడొ తూమ్ కెర్తె తిలె, అంచి ప్రేమచి తెడి తుమ్ తా అంచి ప్రేమ ఇండితె. 11 'అంచి సంతోసుమ్ తుమ్చి పెట్టి తవున్' మెన, తుమ్క 'పూర్తి సంతోసుమ్ జా తత్తు' మెనయ్, ఈంజేవ్ కొడొ ఎత్తి ఆవ్ సంగ అస్సి.

12 "ఆవ్ తుమ్కయ్ కిసి ప్రేమ కెర అస్సి గే, తూమ్ కి ఎక్కిలోక ఎక్కిలో ప్రేమ కెర్తె తా, మెన తుమ్క ఆవ్ సంగితసి. ఈంజయి తుమ్క ఆగ్గు జా అస్సి. 13 'జితు' మెన, జోవయించ మింతర్పుల్చి రిసా కో జలెకు మొర్తి కంట, కిచ్చొ జిన్లి ప్రేమ నాయ్. 14 ఆవ్ తుమ్క సంగిల్ రితి తుమ్ కెర్తె, అంచ గోతుసుదల్ జా తస్తె. 15 తుమ్క 'గొత్తి సుదల్' రితి అప్పె తెంతొ దెకి నాయ్. కిచ్చొక మెలె, జోవయించొ ఎజొమాని కిచ్చొ కెర్తె తయెదె గే గొత్తి సుదల్ నేన్తి. ఆవ్, మాత్తుమ్, అంచొ అబ్బొన్తె సూన్లిసి ఎత్తి తుమ్క సంగ అస్సి. జాచి రిసా తుమ్క 'గోతుసుదల్' రితి దెకితసి.

16 "తూమ్ అంకయ్ నిసాన్సు నాయ్. ఆవ్ తుమ్కయ్ నిసాన్లయ్. ఆవ్ తుమ్క కిచ్చొక నిసాన అంచి కామ్ తియార్ అస్సి మెలె, తుమ్ ఈంజ లోకుమ్తె బార్ జతు, చి అంచి ఆత్మపంటొ జోవయింతె దెర్తె తవున్ మెన 'జోవయింతె దెర్తి ఈంజ పంటొ కెయఁక తెయఁక చెంగిల్ తా కామ్క జెతె తవున్'. తుమ్ అంక నిదానుమ్ తిలెగిన, అంచి నావ్ తెన్ దేముడు అంచొ అబ్బొతె తుమ్ కిచ్చొ నజిలె కి, తుమ్క దెయెదె. 17 తుమ్క కిచ్చొ ఆగ్గు దెతసి మెలె, ఎక్కిలోక ఎక్కిలో తుమ్ ప్రేమ కెర్తె తంకయ్.

నంపజలసక ఈంజ లోకుమ్ విరోదుమ్ జవుల

18 "ఈంజ లోకుమ్చ మాన్సుల్ తుమ్క విరోదుమ్ జతతి జలె, అంక కి అగ్గె తెంతొ విరోదుమ్ జా అస్సి. 19 ఈంజ లోకుమ్చ కమొ కెర్తెన తుమ్ జతదు జలె, ఈంజ లోకుమ్చ మాన్సుల్ తుమ్క ప్రేమ కెర్తె. గని, ఈంజ లోకుమ్చ తెంతొ తుమ్క ఆవ్ నిసాన్లయ్, చి ఈంజ

* 15:10 15:10 నెంజలె 'ఆగ్గుల్' నెంజలె 'ఆడ్రల్'.

లోకుమచ కమొ తుమ్ కెర్పు నాయ్ చి రిసా ఈంజ లోకుమచ తుమ్క విరోదుమ్ జా అస్తి.

20 “జలె, ఆవ్ తుమ్క సంగిలి కోడు తుమ్ పచ్చు నాయ్. కేన్ కోడు మెలె, ‘సేవ కెర్తొసా జోచొ ఎజొమానిచి కంట వెల్లో నెంజె’ మెలిసి. ఈంజ లోకుమచ మాన్సుల్ అంకయి అల్లర్ కెర అస్తి జలె, తుమ్క కి అల్లర్ కెరుల. జేవ్ అంచయ్ కొణొ రితి కెర్తతి జలె, తుమ్చయ్ కొణొ సూన కెరుల. 21 అంచి రిసాయి తుమ్క అల్లర్ కెరుల మెలె, కిచ్చొక మెలె అంక తెద్రయ్లో దేముడుక జేవ్ నేన్తి.

22 “ఆవ్ జెతయ్ నాయ్ జలె, జోవయింక సుబుమ్ కబుర్ సంగితయ్ నాయ్ జలె, జా పాపుమ్ జేవ్ వయిత నాయ్. గని, అయ్లయ్, సంగిలయ్, చి అప్పె, ‘నేన కెర దస్సి కెర్లమ్’ మెన జేవ్ సంగుక నెతిర్తి. జా పాపుమ్ వయ అస్తి. 23 మెలె అంకయ్ కొ విరోదుమ్ జవుల గే, దేముడు అబ్బొన్క విరోదుమ్ జా అస్తి. 24 అన్నె, కేన్ మాన్సుకి కెయ కి నే కెర్త కమొ ఆవ్ జోవయించి మొక్కె కెర్తయ్ నాయ్ జలె, జా పాపుమ్ వయిత నాయ్. గని అంక దెకయ్ అంక విరోదుమ్ జా అస్తి. జేవ్ అంకయ్ దెక విరోదుమ్ జలిసి జలె, అబ్బొక దెక విరోదుమ్ జలిసి జయెదె. దస్సి జా, అబ్బొన్క కి విరోదుమ్ జా అస్తి. 25 జోవయించి †మోసే పూర్గుమ్చొచి అత్తి దేముడు రెడ్డయ్ల ఆగ్గుల్తె పూర్గుమ్ దేముడు అబ్బొ రెడ్డయ్లిసి నెరవెర్చుప జంకయ్ ఇసి జా అస్తి. కేన్ కోడు మెలె,

‘ఆరిక అంక విరోదుమ్ జల.’

26 “దేముడు అంచొ అబ్బొతె తెంతో ఆవ్ సంగిలో తోడ్ కెర్తొసాక తుమ్ సిస్సుల్తె తెద్రయిందె. జో అబ్బొచి పెట్టి తెంతో బార్ జా జెతోసా. నిజుమ్ జలి ఆత్తు, జో. జో తుమ్తె జా కెర, అంచి రిసాయి

† 15:25 15:25 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెడ్డయ్లి ఆగ్గుల్ మెన అమ్ జానుమ్. ఈంజ కొణొ ఎత్తి బైబిల్తె అగేచి పావ్ పుస్తకుమ్తె రెడ్డయ్ జా అస్సి. ఈంజ దెకవుక మెన కుపియ బాసత నొయి ప్రమానుమ్తె మోసే పూర్గుమ్చొచి అత్తి రెగిణ్ణి దేముడుచ ఆగ్గుల్ మెన రెడ్డవ అస్సి.

సాచి సంగెదె. ²⁷ తూమ్ కి అంచి రిసా సాచుల్ జా అస్సున్. కిచ్చొక మెలె, అంచ కమె మొదొల్ కెర్లి తెంతో అంచి తెన్ని అస్సున్.”

16

¹ “ఆవ్ కిచ్చొక తుమ్క ఈంజ ఎత్తి సంగ అస్సి మెలె, తుమ్క ‘తెదొడ్క బమ్మ జా అన్మానుమ్ జతు నాయ్’ మెన జేవ్ అల్లర్ నే జతె అగ్గె తుమ్క ఆవ్ సంగితసి. ² జేవ్ దీసల్క తుమ్క జోపయించ సబ గెరల్ తెంతో ఉదడ అన్నె పెసయ్తి నాయ్. అన్నె, ‘ఇన్నెక మార్లె చెంగిలి, మార్లె దేముడుచి సేవ కెర తమ్దె’ మెన సగుమ్జిన్ ఉచర తుమ్క మారుల. ³ కిచ్చొక దస్సి కెరుల మెలె, జేవ్ అంక నేన్తి. ⁴ జా నే జతె అగ్గె తుమ్క ఆవ్ కిచ్చొక సంగ అస్సి మెలె, జా సమయుమ్ జా అయ్లె, ‘ఇసి జయెదె మెన సంగిలో’ మెన తుమ్ ఉచార కెర్తె. జలె, తుమ్ అంచ సిస్సుల్ జలి మొదొల్ తెంతోయ్ ఈంజ ఎత్తి తుమ్క ఆవ్ కిచ్చొక సంగుక నాయ్ మెలె, తుమ్చి తెన్ తిలయ్, చి సంగుక నాయ్.

తుమ్క తోడ్ తతి రిసా అమ్చి ఆత్మ తుమ్చితె తెద్రయిందె

⁵ “అప్పె, అంక తెద్రయ్లోసాతె ఆవ్ అన్నె గెతసి. గని ‘కేనె గెతసి?’ మెన అప్పె తుమ్చితె కో అంక పుసున్ నాయ్. ⁶ ఆవ్ ఈంజ ఎత్తి తుమ్క సంగిలి రిసా దుకుమ్ జా అస్సున్. ⁷ జలెకి, తుమ్క కిచ్చొ సత్తిమ్ సంగితసి మెలె, ఆవ్ గెలెకయ్ తుమ్క చెంగిలి. కిచ్చొక మెలె, ఆవ్ నే గెలె, అమ్చి ఆత్మ జతో ఆవ్ సంగిలో తోడ్ కెర్తొసా తుమ్క తోడ్ జెయె నాయ్. గని ఆవ్ గెలె, తుమ్తె జోక తెద్రయిందె.

⁸ “జో అయ్లో మెలె, పాపుమ్చి రిసా, సత్తిమ్చి రిసా, తీర్పు కెర్తిసిచి రిసా ఈంజ లోకుమ్చ మాన్సుల్క రుజ్జుల్ దెకయెదె. ⁹ లోకుమ్ అంక నంపజయె నాయ్ చి రిసా పాపుమ్ వయ అస్సి మెన అంక నంపనెంజిలనక రుజ్జు దెకయెదె. ¹⁰ అంచొ దేముడు అబ్బొన్తె ఆవ్ ఉట్ట గెచ్చిందె, అంక అన్నె తూమ్ ఇసి దెకున్ నాయ్. అంచి పున్నిమ్చి రిసా ఈంజ లోకుమ్చక జో రుజ్జు దెకయెదె. ¹¹ జాచి రిసా

ఈంజ లోకుమ్క అప్పెచి మట్టుక ఏలుప కెర్తొ నయ్తాన్ తీర్పు జా, జోచి పాపుమ్ వయ సిచ్చతె గెచ్చుక అస్సె మెన రుజ్జు దెకయెదె.

12 “ఆవ్ తుమ్క సంగితిసి కెత్తిగే అస్సె. గని, అప్పె సంగిలె తుమ్ ఓర్పుప జంక నెతుర్పు. 13 జలె జో, సత్తిమ్ జలి ఆత్మ జలోసా తుమ్చి పెట్టి అయ్లె, జొయ్యి సత్తిమ్తె తుమ్క ఇండయెదె. జోక, జొయ్యి కిచ్చొ సంగె నాయ్. జో ఒత్త అమ్తె కిచ్చొ నూనెదె గే, జయ్యి తుమ్క సంగెదె. 14 జో అంచితె తిలిసియి కడన తుమ్క నూనెదె. జాచి రిసాయి అంక గవురుమ్ కెరెదె. 15 అబ్బొసి జలో దేముడుచి ఎత్తి అంచి, జాకయ్ ‘జో తుమ్క సంగితిసి ఎత్తి అంచి’ మెన తుమ్క సంగిలయ్.

పడ్డొక తుమ్క సంతోసుమ్ జెయెదె

16 “ఇదిల్ కాలుమ్ గెలి పడ్డొ అంక తుమ్ దెకుక నెతుర్పు, అన్నె, ఇదిల్ కాలుమ్తె అంక దెకితె మెన సంగిలన్. 17 జోచ సిస్సుల్తె సగుమ్జన్ ఎక్కిలో తెన్ ఎక్కిలో లట్టబ, గడియ గెలె, అంక దెకున్ నాయ్. ఒత్త తెంతో అన్నె గడియ గెలె, అంక అన్నె దెకితె మెన కిచ్చొక సంగిలన్. ఆవ్ ‘దేముడు అబ్బొతె ఉట్ట గెచ్చొందె’ మెన కిచ్చొక సంగిలన్?” మెన సంగితె తిల. 18 “గడియ గెలె మెన కిచ్చొ అర్దుమ్ తెన్ సంగితయ్? జో కిచ్చొచి రిసా సంగితయ్ గే నేనుమ్” మెన లట్టబన్.

19 జేవ్ జొయ్యి పుసితతి మెన, నా యేసు జానయ్ జేవ్చి తెన్ ఇసి సంగిలో. అన్నె గడియ గెలె, తుమ్ అంక దెకున్ నాయ్. ఒత్త తెంతో. అన్నె గడియ గెలె, తుమ్ అంక అన్నె దెకితె మెన ఆవ్ సంగిలయ్, గెద. ఇన్నెచి రిసా ఎక్కిలో తెన్ ఎక్కిలో లట్టబ్బను, నాయ్ గే? 20 తూమ్ దుకుమ్ జా ఏడ్డె. గని, లోకుమ్చ సర్ద జవుల తుమ్చి దుకుమ్ సర్దతెను తయెదె మెన తుమ్క కచితుమ్ సంగితసి.

21 లడెన్ జతి తేర్బోద, జలె, జాచి కంట్లు పావ జా అయ్లి మెలె, ఏడెదె, గెద. గని, లడెన్ జలి మెలె, ఈంజ లోకుమ్తె ఏక్ ‘బోద జెర్పిలో’ మెన జాచి సర్దక బేగి దుకుమ్ ఎత్తి పచ్చు గెలెదె. 22 దస్సి,

ఆవ్ అప్పె గెలె, తుమ్క గడియ దుకుమ్ తయెదె. గని, ఆవ్ తుమ్చి తెన్ అన్నె దస్సుల్ జయిందె, చి తుమ్చి పెట్టి సంతోసుమ్ జా గెతె, చి కో కి తుమ్చితె తిలి సంతోసుమ్ కడుక నెతిర్తి.

23 జేవ్ దీసల్తె అంక తుమ్ కిచ్చొ కి పుసితిసి నాయ్. తుమ్ దేముడు అబ్బొతె కిచ్చొ సంగిలే కి, అంచి నావ్ తెన్ దొర్కు జయెదె మెన తుమ్క కచితుమ్ సంగితసి. 24 అప్పె ఎద అంచి నావ్ తెన్ తుమ్ కిచ్చొ నజుక నాయ్. తుమ్చి సంతోసుమ్ పూర్తి జతి లెక నజు, దొర్కు జయెదె.

25 “ఈంజ సంగతి ఒండి కి అర్దుమ్ లుంకయ్ జలి రితి సంగ అస్సి. జలె ఆవ్ కెయ్యక జలెకి అర్దుమ్ లుంకయ్ జలి రితి తుమ్చి తెన్ నే లట్టబై, అబ్బొన్చి రిసా తుమ్క సొస్టుమ్గ సూనయ్తి గడియ జెతయ్. 26 జా దీసల్ అయ్లి పొది అంచి నావ్ తెన్, తుమ్ నజితె. గని, దేముడుక తుమ్చి తెన్ ఆవ్ నెడిమి జా ప్రార్దన కెర్తిసి నెంజె మెన సంగుక నాయ్. 27 కిచ్చొక మెలె అబ్బొ తుమ్క ప్రేమించుప కెర్తయ్. తూమ్ అంక ప్రేమించుప కెర, అంక అబ్బొ జలో దేముడు తెంతో బార్ జా అయ్లన్ మెన నంపజలదు. 28 దేముడు అబ్బొ తెంతో ఆవ్ బార్ జా ఈంజ లోకుమ్తె అయ్లయ్. అన్నె, అప్పె ఈంజ లోకుమ్ ముల దా, ఒత్త జోతె అన్నె గెతసి” మెన సంగిలన్.

29 జోచ సిస్సుల్, జలె, “ఈందె, అర్దుమ్ లుంకయ్ జలి రితి కిచ్చొ కి నే సంగితె సొస్టుమ్గ లట్టబ్బసి. 30 తుయి ఎత్తి జాన్ని, చి అమ్ నే పుసిలేకి, అమ్చి మెన్ను తిలిసి తుయి జాన్ని మెన అప్పె జానుమ్. దేముడుతె తెంతో తూయి బార్ జా అయ్లదు మెన నంపజా సంగితి కాయ్. 31 యేసు జోవయింక దెక, అప్పె తూమ్ నంపజతను గే? 32 ఈందె తుమ్చితె ఒండిజిన్క కి కచి గెరి జొయ్యి సెదుర్ప జా అంక ఎక్కిలోకయి ముల దెతి గడియ జెతయ్, జా అస్సె. జలె అబ్బొ అంచితె అస్సె చి రిసా ఆవ్ ఎక్కిలోయి నెంజి.

33 “ఈంజ ఎత్తి కిచ్చొక తుమ్క సంగ అస్సి మెలె, ‘అంచి తెడి తుమ్క సేంతుమ్ తవున్’ మెనయ్. కిచ్చొక మెలె, ఈంజ లోకుమ్తె

అల్లర్ సేడ్తె, గని దయిరిమ్ తెన్ తా. ఈంజ లోకుమ్తెచ అల్లర్చి ఉప్పిరి ఆవ్ జిన అస్సి” మెన సంగిలన్.

17

యేసు ప్రార్థన కెర్లసి

¹ యేసు ఈంజ ఎత్తి సంగ కేడవ, ఆగాసుమ్ వక్క దెక, పరలోకుమ్ తిలో దేముడు అబ్బొన్క ప్రార్థన కెర్లన్.

“ఓ బ, అంచి సమయుమ్ జా అయ్లి మెన జాని. ఆవ్ తుచొ పుత్తుది తుచి గవురుమ్ దెకయ్తి రితి, ఆవ్ పుత్తున్ తా గవురుమ్ కెరు. ² ఈంజ లోకుమ్ ఎత్తిచ మాన్సుల్చి ఉప్పిరి ఆవ్ పుత్తుక తుయి అదికారుమ్ దా అస్సిన్. కో అంక నంపజంక తుయి సెలవ్ దా అస్సిన్ గే, జెవ్వి తుచి రాజిమ్తె బెదితి, మొల్లె పరలోకుమ్తె గెచ్చ కెయ్చ తెయ్చ జితి రితి ఆవ్ దెంక మెన, తుయి అంచి అత్తి సార్పు కెర దా అస్సిన్. ³ తుయి ఎక్కిలోయి నిజుమ్ జలో దేముడు తుక, తుయి తెద్రయ్లో అంక, జేవ్ నంపజతిసి, అమ్క జేవ్ జాన్తిసి, ఆవ్ యేసు తుయి తెద్రయ్లో రచ్చించుప కెర్లెసా జతో క్రిస్తు. ⁴ తుయి అంక తియార్లి కామ్ ఆవ్ పూర్తి నెరవెర్గుప కెర, ఈంజ లోకుమ్తె తుక గవురుమ్ ఆన అస్సి. ⁵ ఓ బ, ఈంజ లోకుమ్ నే జెర్మున్ జతె అగ్గె తెంతో తుచి తెన్ ఆవ్ ఒత్త తతె అంక కీసి గవురుమ్ తిలి గే, అప్పె తుచితె పరలోకుమ్తె అన్నె దస్సి గవురుమ్ జతి రితి కెరు.

⁶ “అంచ సిస్సుల్ జతి రితి, ఈంజ లోకుమ్చ మాన్సుల్తె సగుమ్జిన్క తుయి నిసాన, అంచి అత్తి సార్పు కెర దా అస్సిన్. తుయి కీసాచొ గే ఈంజేవ్ దెకిత్ రితి ఆవ్ ఈంజ లోకుమ్తె జియ అస్సి. తుచయ్ మాన్సుల్ ఈంజేవ్, చి ఇన్నెక అంచి అత్తి తుయి సార్పు కెర దిలది, చి తుచి కోడు రితి ఈంజేవ్ నిదానుమ్ ఇండ అస్తి. ⁷ తుయి అంక దిలిసి ఎత్తిచి రిసా ‘వేరచి నెంజె, గని తుయి దిలిసి’ మెన అప్పె జాన్తి. అంక తుయి తెద్రయ్లోసా నిజుమ్ మెన చినిల. ⁸ ‘సంగు’ మెన తుయి సంగిలి కొడొ ఎత్తి ఇన్నెయింక ఆవ్ సంగ అస్సి, చి ఈంజేవ్ నూన, నంపజా, ఆవ్ తుచితె తెంతో ఉట్ట అయ్లిన్క

‘నిజుమ్’ మొన జాన్తి. తుయి అంక తెద్రవ అస్సిన్ మొన నంపజా అస్సి.

9 “ఇన్నెచి రిసాయి ఆవ్ అప్పె ప్రార్దన కెర్తసి. ఈంజ లోకుమ్చ ఎత్కిజిన్చి రిసా ఇసి మొన ప్రార్దన కెరి నాయ్, గని ఈంజేవ్ తుయి అంచి అత్తి సార్ప కెర దిలనయ్చి రిసా ప్రార్దన కెర్తసి. ఈంజేవ్ తుచయ్ మాన్సుల్. 10 అంచి ఒండి తుచయ్, తుచి ఒండి అంచయ్, చి ఈంజేవ్ నిదానుమ్ జలిన్ తెన్ అంక గవురుమ్ జెతయ్.

11 “ఆవ్ తుచితె అప్పె అన్నె జెతసి చి అప్పె తెంతో ఆవ్ ఈంజ లోకుమ్తె తయె నాయ్. గని ఈంజేవ్, మాత్రుమ్ తవుల. సుద్ది తిలో ఓ బ, ఈంజేవ్ చెంగిల్ తతి రితి, *తుయి అంక దిలి తుచి నావ్చి సెక్కిక ఇన్నెక రక్కు, చి ఆవ్ తుయి కిసి †ఎక్కి జా అస్సుమ్ గే ఈంజేవ్ కి ఎక్కి జా తంక తుచి నావ్ తెన్ ఇనయింక దెకు. 12 ‡ఆవ్ ఇనయింతెన్ బుల్తె తిలి పొది, తుయి అంక దిలి తుచి నావ్ తెన్ ఇన్నెక రకితె తిలయ్. ఆవ్ జేవ్క జాగరిత తెన్ రకిలయ్ చి, ఇనయింతె కో నాసెనుమ్ జతి నాయ్. నాసెనుమ్తె గెతో జో ఎక్కిలో పిట్టవ, జలె, తుయి పూర్గుమ్ రెగ్గయ్లి రితి నాసెనుమ్ జా అస్సె, దేముడుచి కొడొతె తిలి జా కోడు అప్పె నెరవెర్పువ జతి రిసా.

13 “అప్పె, జలె, ఆవ్ తుచితె జెతసిచి రిసా, ‘అంచి సంఠోసుమ్ ఇన్నెచి పెట్టి నెరవెర్పువ జా కామ్ కెర్పు’ మొన ఈంజ ఎత్కి, అప్పె ఈంజ లోకుమ్తె ఆవ్ తతె, ఇన్నెచి మొక్కె తుక నూనయ్తసి.

14 “ ‘సంగు’ మొన తుయి సంగిలిసి ఎత్కి ఇన్నెయింక ఆవ్ సంగ అస్సి. ఆవ్ ఈంజ లోకుమ్చొ నెంజి, చి అంచ సిస్సుల్ ఈంజేవ్ జలి తెంతో, ఈంజేవ్ కి ఈంజ లోకుమ్చ నెంజితిచి రిసా, ఈంజ లోకుమ్చ ప్రెజల్ ఇన్నెయింక విరోదుమ్ దెకితతి. 15 జలె, తుక ‘ఈంజ లోకుమ్తె తెంతో ఇన్నెయింక కడ నెవుసు’ మొన అంచి ఆస నాయ్,

* 17:11 17:11 నెంజిలె, ‘తుయి అంచి అత్తి సార్ప కెర దిల ఈంజేవ్ సిస్సుల్క తుచి నావ్చి సెక్కిక రక్కు’. † 17:11 17:11 నెంజిలె, ‘ఎక్కి ప్రేమయ్ అస్సుమ్ గే, ఈంజేవ్ కి ఎక్కిలో తెన్ ఎక్కిలో ఎక్కి ప్రేమయ్ తెన్ తవుల’. ‡ 17:12 17:12 నెంజిలె, తుయి అంచి అత్తి సార్ప కెర దిల ఈంజేవ్ సిస్సుల్ తెన్ ఆవ్ బుల్తె తిలి పొది తుచి నావ్ తెన్ ఇన్నెక రకితె తిలయ్....

గని 'ఈంజ లోకుమ్తె ఈంజేవ్ తా గెలె, సయ్తాన్క, జోచి సేవక, ఈంజేవ్ దెర్ను నే సేడ్డి రితి రక్కు' మెన తుక ప్రార్దన కెర్తసి.

16 "ఆవ్ కీసి ఈంజ లోకుమ్చో నెంజి గే, అంక నంపజలి తెంతో ఈంజేవ్ కి ఈంజ లోకుమ్చ నెంజితి. 17 ఈంజేవ్ పూర్తి తుచయ్ జా తుచి సేవ నిదానుమ్ కెర్తె తతి రితి, తుచి సత్తిమ్తె ఇన్నెక సుద్ది కెరు. తుచి కోడు సత్తిమ్. 18 తుయి కీసి అంకయ్ ఈంజ లోకుమ్తె తెద్రయ్లది గే, మాన్సుల్క ఈంజేవ్ సత్తిమ్ వాట్ దెకయ్తి రితి, ఆవ్ ఇన్నెక తెద్రవ దా అస్సి. 19 ఈంజేవ్ కి తుచి సత్తిమ్తె తుచయ్ జా, తుచి సుద్ది జా తుక నిదానుమ్ తత్తు మెనయ్, అంచి జీవ్ తుచి అత్తి ఆవ్ సార్చ కెర దెతసి.

20 "ఎక్కి ఈంజేవ్ అంచ సిస్సుల్చి రిసా ఇసి ప్రార్దన కెరి నాయ్. ఈంజేవ్ అంచి రిసా సాచి సంగిలె, ఇన్నెయింది కోడు నూన అన్నె కో అంక నంపజా గెచ్చుల గే, జోవయింది రిసా కి ఆవ్ ప్రార్దన కెర్తసి. 21 ఓ బ, తుయి కీసి అంచి పెట్టి అస్సిన్ గే, చి ఆవ్ కీసి తుచి పెట్టి అస్సి గే, దస్సి ఈంజేవ్ కి, జేవ్ కి, అమ్చి పెట్టి తా కీఎక్కి జతు, చి దస్సి ఎక్కి జల మెలె, ఈంజ లోకుమ్చ అన్నె మాన్సుల్ దెకిలె, తుయి అంక తెద్రయ్లిసి జేవ్ కి నంపజవుల. 22 తుచి గవురుమ్తె అంక కీసి తుయి టీవడ అస్సిన్ గే, అంచి గవురుమ్తె ఆవ్ ఇన్నెయింక టీవడ అస్సి, చి ఆవ్, తూయి, కీసి ఎక్కి జా అస్సుమ్ గే, ఈంజేవ్ కి *ఎక్కి జతు మెనయ్ అంచి ఆన. 23 దస్సి, ఆవ్ ఇన్నెయింది పెట్టి, తుయి అంచి పెట్టి తమ్దె, చి ఈంజేవ్ పూర్తి †ఎక్కి జవుల. దస్సి జలె, ఈంజ లోకుమ్చ మాన్సుల్ కిచ్చో దొన్ని చినుల మెలె, అంక తెద్రయ్లోసా తుయి మెన చినుల, చి తుయి అంకయ్ కెద్ది ప్రేమ కెర అస్సిన్ గే, ఇన్నెయింక కి తుయి తెద్ది ప్రేమ కెర్తసి మెన చినుల.

24 "ఈంజ లోకుమ్ నే జెర్మున్ కెర్తె అగ్గె తెంతో అంచి ఉప్పిర్చి తుచి

§ 17:21 17:21 ఎక్కి ఉద్దెనుమ్ ఎక్కి ప్రేమచి కోడు. 11 నంబర్ కోడుచి ఎట్టాచి కోడు దెక. *

17:22 17:22 ఎక్కి ఉద్దెనుమ్ ఎక్కి ప్రేమచి కోడు. 11 నంబర్ కోడుచి ఎట్టాచి కోడు దెక. †

17:23 17:23 ఎక్కి ఉద్దెనుమ్ ఎక్కి ప్రేమచి కోడు. 11 నంబర్ కోడుచి ఎట్టాచి కోడు దెక.

ఎదివాట్ ప్రేమక అంక ఒగ్గర్ గవురుమ్ దా అస్సిన్. జలె, ఓ బ, తుయి అంక దిల సిస్సుల్ కి †ఆవ్ తిలిన్తె అంచి తెన్ తత్తు, చి తుయి అంక దిలి గవురుమ్ దెకుతు, మెన అంచి ఆస. 25 పున్నిమ్ తిలో ఓ బ, ఈంజ లోకుమ్చ తుక నేన తిలె కి, ఆవ్ తుక జాని, చి కచితుమ్ తుయి అంక తెద్రయ్లిసి ఈంజేవ్ సిస్సుల్ జాన్తి. 26 తుయి అంక ప్రేమ కెర్లి ప్రేమ ఇన్నెయించి పెట్టి తవున్ మెన, ఆవ్ ఇన్నెయించి పెట్టి తంక మెన, తుయి కీసాచొ జా అస్సిన్ గే, ఇన్నెయింక ఆవ్ దెకవ అస్సి, దెకయ్తె తయిందె” మెన దేముడు అబ్బొస్క యేసు ప్రార్దన కెర్లన్.

18

యేసుక విరోదుమ్ సుదల్ దెర్లిసి

(మత్త 26:47-56; మార్కు 14:43-50; లూకా 22:47-53)

1 యేసు ఈంజేవ్ కొడొ సంగ కేడవ, జోచ సిస్సుల్ తెన్ బార్ జా, కెద్రోను మెంతి లోయ ఒత్తల్తోచి ఒడ్డుతె జీన గెచ్చు, సిస్సుల్ తెన్ ఒత్త తిలి తోటతె పెసిల. 2 పుండితి రిసా యేసు జోచ సిస్సుల్ తెన్ ఒత్త గెచ్చుక అలవాట్చి రిసా, అప్పె ఒత్త గెచ్చు తవుల మెన, జోక విరోదుమ్ సుదల్తె దెర దెంక గెలో యూదాక అజ్జ. 3 జో యూదా జలె, వెల్లెల పూజర్లుతె చి పరినయ్యుల్తె గెచ్చు, జోచ జమాన్లు సగుమ్జిన్క, సయన్యమ్ సుదల్ సగుమ్జిన్క కడ ఆన, జేవ్, లాంతెర్లు దివ్వొ, అయ్దల్ దెరన, యేసు తిలిన్తె ఉట్ట అయ్ల.

4 జోక జర్గు జంక తిలిసి ఎత్కి యేసు జానె చి, జేవ్ దెర్లన ఒత్త పావ జెతికయ్, జో పురైతొ జా, “కక్క చజితను?” మెన జోవయింక పుసిలన్. 5 జేవ్ జోక, “నజరేతు గవ్విచొ యేసుక చజితనుమ్” మెన జబాబ్ దిల, చి యేసు జోవయింక “అవ్వి జో!” మెలన్. జోవయించి అత్తి జోవయింక దెర దెంక ఒప్పన్లో యూదా జోవయింతెన్ ఒత్త టీవ అస్సి. 6 జలె, “అవ్వి జో” మెన యేసు సంగితికయ్, జోక దెరుక మెన అయ్ల జనాబ్ పడ్డొ గుంచ బుయ్యె సేడ గెల.

† 17:24 17:24 నెంజిలె ‘ఆవ్ గెతిన్తె జా, అంచి తెన్ తత్తు’.

7 పడ్డో, “కక్క చజితసు?” మెన యేసు జోవయింక అన్నెక్ సుట్టు పుసిలన్, చి “నజరేతు గవ్విచో యేసుక” మెన అన్నెక్ సుట్టు సంగిల. 8 సంగిలె, యేసు జోవయింక “ ‘అవ్వొ జో’ మెన తుమ్క సంగిలయ్, గెద. అంకయ్ చజితసు జలె, అంకయ్ దెర, గని అంచి తెన్ తిలనక పోన” మెన జబాబ్ దిలన్. 9 చి యేసు అగ్గె సంగ తిలి ఏక్ కోడు ఇన్నెయితెన్ * ఏక్ రగుమ్క నెరవెర్పువ జలి. “తుయి అంచి అత్తి సార్ప కెర దిలనతె కో నాసెనుమ్ జతి నాయ్” మెన దేముడు అబ్బొన్క తెదొడి సంగ తిలి కోడు.

10 జలె, సీమోను పేతురుక ఏక్ కండా తిలి. జో పేతురు జా కండా కడన, ఎత్కిక వెల్లో పూజరిచో గొతిమాన్సు ఎక్కిలోక కుంద, జోచి ఉజిల్ కండ్లో సింద గెలన్. జో గొతిమాన్సుచి నావ్ ‘మల్కు’. 11 పేతురు దస్సి కెర్తికయ్, “కండా తియ దేస్! దేముడు అబ్బొ అంక తియార్లి కామ్ దుకుమ్ సైమల్ జతిసి జలెకి, ఆవ్ జా కామ్ కెరుకయ్, జా దుకుమ్, జా సైమ ఓర్పువ జంకయ్” మెన పేతురుక యేసు సంగిలన్.

12 జలె, జేవ్ జమాన్సు, జోవయించో అదికారి చి దేముడుచి గుడిచ సయన్యుమ్ సుదల్ యేసుక దెర, బంద గెల. 13 తొలితో † ‘అన్నా’ మెలోసాతె కడ నిల. జో కొన్సో మెలె, కయప మెలో జా వెర్నిచో ఎత్కిక వెల్లో పూజరిచో మామెసి. ‡ 14 ‘అమ్చ యూదుల్ నస్టుమ్ నే జతి రిసా ఎక్కిలో మొర్లె చెంగిలి’ మెన యూదుల్చ వెల్లెల మాన్సుల్క, ఎత్కిక వెల్లో పూజరి † అగ్గె సంగ తిలో. ఈంజో కయప జో ఎత్కిక వెల్లో పూజరి.

జోచో సిస్సుడు నెంజి మెన పేతురు సంగిలిసి

(మత్త 26:69-70; మార్కు 14:66-68; లూకా 22:55-57)

* 18:9 18:9 17:12 చి కోడు దెక. అన్నెకిచ్చొ రగుమ్క నాసెనుమ్ జతి నాయ్ మెలె, జేవ్ మొర్లె ఎదక యేసుక నిదానుమ్ తాఁ గెల. † 18:13 18:13 ‘అన్నా’ అగ్గె ఎత్కి వెల్లో పూజరి జా తిలో. ‡ 18:13 18:13 13-14 ఈంజ మత్తెలి తొలితో రెగిళ్ల పుస్తకల్తె ఏక్ పుస్తకుమ్తె 13 నంబర్చి కోడు కేడ్లి బేగి 24 నంబర్చి కోడు గల అస్తి; 14 నంబర్చి కోడుచి కంట అగ్గె. § 18:14 18:14 11:50 చి కోడు దెక.

15 యేసుక జేవ్ మాన్సుల్ దెర ఎత్కిక వెల్లో పూజరితె కడ నెతె తిలి పొది, సీమోను పేతురు, అన్నెక్లో సిస్సుడు, దొగుల, జేవ్ దెర్లనచి పట్టి గెల. ఎత్కిక వెల్లో పూజరి జో అన్నెక్లో సిస్సుడుక జానె, చి జో సిస్సుడు కి యేసు తెన్ ఎత్కిక వెల్లో పూజరిచి గెరి తెడి పెసిలన్.

16 గని, పేతురు గుమ్ముమ్ పాసి, బయిలె టీవ జా తిలో. జలె, ఎత్కిక వెల్లో పూజరి జాన్లో జో అన్నెక్ సిస్సుడు అన్నె బార్ జా, గుమ్ముమె రకితి తేరీబోద గొత్తి సుదొక సంగ, పేతురుక తెడి కడ ఆన్లన్. 17 జా తేరీబోద గొత్తి సుదొ పేతురుక దెక, “తుయి కి జో మాన్సుచొ సిస్సుడు, కిచ్చొగె” మెలన్, గని “నెంజి” మెన పేతురు సంగిలన్.

18 జలె, ‘చల్లి’ మెన, ఎత్కిక వెల్లో పూజరిచ గొత్తి సుదల్ దేముడుచి గుడిచ నయన్యుమ్ సుదల్ తెన్ మెసి బొగుల్చి ఆగి లావ తపితె తిల. పేతురు కి, తపుక మెన గెచ్చ, ఒత్త జోవయింతెన్ అస్సె.

ఎత్కిక వెల్లో పూజరి యేసుక పరిచ్చ కెర్లెసి

(మత్త 26:59-66; మార్కు 14:55-64; లూకా 22:66-71)

19 మదెనె ఎత్కిక వెల్లో పూజరి యేసుక పరిచ్చ కెర్లన్. జోచ సిస్సుల్చి రిసా, జోచి బోదనచి రిసా పరిచ్చ కెర్లన్. 20 యేసు జోక కిచ్చొ జబాబ్ దిలన్ మెలె, “అంచి బోదన, జలె, ఈంజ లోకుమ్చ ఎత్కిజిన్ సూన్తి రితి ఎదార్డుమ్ సంగ అస్సి. అమ్చ యూదుల్చ నబ గెరలె బోదన కెరై తిలయ్, చి దూరి పాసి తెంతో ఎత్కిజిన్ యూదుల్ బెర జెతికయ్ అమ్చి దేముడుచి గుడితె కి బోదన కెరై తిలయ్. ఆవ్ కెయ్య కి, కిచ్చొ కి లుంకచోరు సంగి నాయ్. 21 జాకయ్, కిచ్చొక అంకయ్ పుసుక? కిచ్చొ కిచ్చొ సంగ అస్సి గే, అంక సూన్లనకయ్ పుస” మెన యేసు జబాబ్ దిలన్.

22 యేసు దస్సి సంగితికయ్, పాసి టీవ తిలో నయన్యుమ్ సుదొ ఎక్కిలో యేసుక పెట, “ఎత్కిక వెల్లో పూజరిక తుయి దస్సి జబాబ్ దెంక బెదెదె గే? పొని!” మెన గోల కెర్లన్. 23 యేసు జోక కిచ్చొ జబాబ్ దిలన్ మెలె, “ఆవ్ సంగిలిసి తప్పు తిలెగిన, రుజ్జు దెకవ సాచి సంగ,

గని, ఆవ్ సంగిలినీ సత్తిమ్ జతయ్. జాక, కిచ్చొక అంక పెటుక?” మెన సంగిలన్.

24* తెదొడి అన్నా, యేసుక బందున్ తెన్ ఎత్కిక వెల్లో పూజరి జలో కయపతె తెద్రయ్లన్.

యేసుచొ సిస్సుడు నెంజి మెన పేతురు అన్నె సంగిలినీ
(మత్త 26:71-75; మార్కు 14:69-72; లూకా 22:58-62)

25 సీమోసు పేతురు ఒత్త ఆగి తపితె అస్సె, జలె, ఒత్త తిల మాన్సుల్ జోక “తుయి కి యేసుచొ సిస్సుడు, నెంజిన్ గే?” మెంతికయ్, జో “ఆవ్ నెంజి” మెలన్. 26 గని ఎత్కిక వెల్లో పూజరిచొ గొతిమాన్సుచి కండొ పేతురు అగ్గె సింద తిలొ. జలె, జో మాన్సుచొ సొంత మాన్సు ఎక్కిలొ ఒత్త తిలొ. జో, జలె, పేతురుక “అప్పె తూయి జోవయింతెన్ తోటతె తిలది. తుక దెకిలయ్, గెద?” మెలన్. 27 గని, “నాయ్, జో మాన్సుక నేని!” మెన పేతురు సంగిలన్, చి జో సంగిల్ బేగి కుకుడొ వాసిలన్.

రోమ అదికారి యేసుక పరిచ్చ కెర్లెసి
(మత్త 27:1-2,11-31; మార్కు 15:1-20; లూకా 23:1-25)

28 తెదొడి, యేసుక కయప మెలొ జో ఎత్కిక వెల్లో పూజరి పుస కెర కేడయ్తికయ్, జా రోమ దేసిమ్ తెంతొచొ అదికారిచి మేడతె జోక వెల్లెల మాన్సుల్ కడ నిల. గని, జోక కడ నిలస జా మేడ తెడి పెసితి నాయ్. కిచ్చొక మెలె, జేవ్ యూదుల్ జవుల, చి పస్కా మెలి జోవయించి పండుగు తిలి, చి ‘యూదుల్ నెంజిల మాన్సుల్చ గెరలె పెసిలె గార్ జవ్దె, చి గార్ జలె పండుగ్ అన్నిమ్ కంక గారు. పండుగు పిట్టెదె’ మెంతతి.

29 జాకయ్, పిలాతు మెలొ జో అదికారి బార్ జా, జోవయింతెన్ జా కెర “కిచ్చొ నేరిమ్ కెర్లె మెన ఈంజొ మాన్సుచి రిసా తుమ్ సంగితసు?” మెన యూదుల్చ జేవ్ వెల్లెల మాన్సుల్క పుసిలన్. 30 జేవ్ జోక

* 18:24 18:24 13 నంబర్చి కోడుచి ఎట్టొచి కోడుక దెక.

“ఈంజొ నేరిమ్ కెరొ నాయ్ జలె, ఇన్నెక తుచితె సొర్పు కెరుక మెన కడ ఆన్తమ్ గే? నాయ్” మెన జబాబ్ దిల.

31 దస్సి సంగితికయ్, పిలాతు జోవయింక, “తుమ్ ఇన్నెక కడన, తుమి, దేముడు మోసే తెన్ దిలి తుమ్చ సొంత ఆగ్గుల్ రితి ఇన్నెక తీర్పు కెర!” మెలన్. దస్సి మెంతికయ్ జేవ్ జోక “ఆమ్ కెర్తి రితి పత్రల్ గల మార్తి సిచ్చ కెరుక జలె, ‘నాయిమ్ నాయ్’ మెన, తుమ్ రోమియులు ఒప్పున్ నాయ్” మెన జబాబ్ దిల. 32 జేవ్ దస్సి జబాబ్ దిలి తెంతో ‘†సిలువతె మొర గెచ్చిందె’ మెలి అర్దుమ్ తెన్, జో మొర్తిసి కిచ్చో రగుమ్ జర్గు జతిన్చి రిసొ యేసు అగ్గె సంగ తిలి కోడు నెరవెర్పువ జలి.

33 పడ్డొ పిలాతు, మేడచి తెడి అన్నె పెన, యేసుక బుకార్లన్. యేసుచి రిసొచ కొడొ నూన తిలొ, చి “తుయి యూదుల్చొ రానొ గే?” మెన జోక పుసిలన్. 34 ఇసి పున పరిచ్చ కెర్తికయ్, యేసు జోక, “తుయి అజ్జ కెర అంక దస్సి సంగితసి గే? నాయ్ మెలె, కో జలెకు వేర మాన్సు తుక †దస్సి మెన అంచి రిసొ సంగ అస్తి గే?” మెన పుసిలన్. 35 జాచి రిసొ, పిలాతు జోక “ఆవ్ యూదుడు గే, చి దస్సి మెనిందె? నెంజి, తుచ సొంత యూదుల్చ వెల్లెల మాన్సుల్, వెల్లెల పూజర్లు, తుక అంచితె సొర్పు కెర అస్తి. కిచ్చొ కెర అస్సిన్, చి తుక దస్సి కెర్తతి?” మెన పిలాతు పుసిలన్.

36 యేసు, జలె, కిచ్చొ జబాబ్ దిలన్ మెలె, “అంచి రాజిమ్ ఈంజ లోకుమ్చి నెంజె. అంచి రాజిమ్ ఈంజ లోకుమ్చి జతి జలె, యూదుల్చ వెల్లెల మాన్సుల్చి అత్తి ఆవ్ దెర్ను నే సేడ్డి రితి అంచ

† 18:32 18:32 12:32, 33క దెక. ‘సిలువ’ కీసి తయెదె మెలె, ఏక్ టీవ్తి చి ఏక్ అడ్డుమ్ జతి దొన్ని డేడివొ రిత డండల్ బెదవుల. జా సిచ్చ జతో మాన్సుక జా సిలువతె ఎంగ్లవ కెర, జోవయింక అత్తి చట్టొ చంపొ కెరవ, అత్తిచట్టొతె మేకుల్ పెట, నెంజలె వాలివొ తెన్ బంద దా, సిలువ బుయ్యె టీచ రోవ కెర, దస్సి ములుల. జో సిచ్చ జతోసొ దస్సి ఒడొయ్ జా మొరెదె. రోమ్ దేసిమ్చి అలవాట్ తెన్ చి సిచ్చ, జా. † 18:34 18:34 యూదుల్చొ రానొ మెనంతయ్ మెన యేసుచి రిసొ పిలాతుక సంగిలె, అంచి రోమ్ దేసిమ్చి అదికారుమ్ యేసు పిట్టవుక ఉచర్తయ్ మెన పిలాతు కోవుమ్ జా మొర్తి సిచ్చ దెయెదె మెన యూదుల్చ వెల్లెల మాన్సుల్ కుట్ట కెర తిల. లూకా 23:2.

గొత్తి సుదల్ యుద్దుమ్ కెర్త. గని అంచి రాజిమ్ ఈంజ లోకుమ్చి నెంజె” మెన జబాబ్ దిలన్.

³⁷ యేసు దస్సి సంగితికయ్, పిలాతు జోక “దస్సి జలె, ‘రానొ’ మెన తుయి నిజుమ్ సంగితసి గే?” మెన అన్నె పరిచ్చ కెర్లన్, చి యేసు జోక, “ ‘రానొ’ మెన తుయి అంక సంగితసి. ఆవ్ కిచ్చొక జెర్మిలయ్, కిచ్చొక ఈంజ లోకుమ్తె అయ్లయ్ మెలె, సత్తిమ్ దెకవుక, సత్తిమ్చి రిసా సాచి సంగుక అయ్లయ్. జయ్యి అంచి కామ్. కో సత్తిమ్తె బెదితన జవుల గే, అంక నంపజవుల” మెన సంగిలన్. ³⁸ యేసు దస్సి సంగితికయ్, పిలాతు మెలొ జో అదికారి, “కేతె, సత్తిమ్?” మెన సంగిలొ.

పిలాతు దస్సి సంగ కెర, మేడ తెంతొ బార్ జా, యూదుల్చ వెల్లెల మాన్సుల్ తిలిన్తె అన్నె గెచ్చ, “ఈంజొ కిచ్చొ నేరిమ్ నే కెర్లి రితి అంక డీస్తయ్. ³⁹ తుమ్చి నీపస్కా వండుగ్గక మాత్తుమ్, జేల్తె తిలొ కేన్ జవున్ జేలి జలోసాక తుమ్చి రిసా ఆవ్ విడ్డల్ కెరుక అంక అలవాట్. జలె, కక్క ఆవ్ ముల దెంక? తుమ్చ యూదుల్చొ ఈంజొ రానొక ముల దెంక?” మెన పిలాతు పుసిలన్. ⁴⁰ గని జేవ్ కిసి జల మెలె, “ఈంజొ మాన్సుక పొని! బరబ్బక ములు!” మెన ఒర్చ దిల. బరబ్బ, జలె, మాన్సుక మొరయ్తెసా.

19

యేసుక సిలువ గల్లి రిసా సిచ్చ కెర్లిసి

¹ జలె, పిలాతు తెదొడి కిచ్చొ కెర్లన్ మెలె, *“పెల్లె సాలు కిచ్చొగె” మెన ఉచర, కొర్డల్ తెన్ పెటయిలన్.

² ఒత్త తెంతొ, సయ్న్యమ్ సుదల్ సగుమ్జిన్, యేసుక †మేడచి తెడి కడ నా కెర, ఆరి కొంకడ్డి రితి ‘రానొ’ మెన కంటకంపల్ తెన్ ఏక్

§ 18:39 18:39 పూర్ణుమ్ పొది యూదుల్ ఐగుప్తు దేసిమి తా గొతిమాన్సుల్ జలిన్ తెంతొ ఎత్తి అదికారుమ్ తిలొ దేముడు విడ్డల్ కెర్లిసి ఏద కెర్లి రిసా యూదుల్ ఈంజ పస్కా వండుగు కెరుల. ఈంజయి వెర్చి యేసు పాపల్ తెంతొ విడ్డల్ కెర్లొసా జయెదె మెన నేన్తి. * 19:1 19:1 లాకా 23:16, 22క దెక. † 19:2 19:2 మత్తయి 27:27, మార్కు 15:16.

కిరీటుమ్ గంచ, జోచి బోడితె గల, †ఊద రంగుచొ పాలుమ్ జోక గల దా తెయార్ కెర, ³ పాసి జా జోకర, “యూదుల్చొ రానొ, తుక జెయ్యి!” మెన మొక్కె పెట్ట.

⁴ తెదొడి, యూదుల్చ వెల్లెల మాన్సుల్ తిలిన్తె పిలాతు అన్నె బార్ జా, జోవయింక “ఓదె, జో కిచ్చొ నేరిమ్ నే కెర్లి రితి అంక డీస్తయ్, చి జయి గుర్తుక, తుమ్క రుజ్జు దెకయ్తి రితి, తుమ్ తిలిన్తె ఆవ్ జోక బార్ కెర్తసి” మెన సంగితికయ్, ⁵ కంట కంపల్చి కిరీటుమ్ జోచి బోడి తతె, ఎరన పాలుమ్ జో గలన తతె, యేసుక బార్ కెర్ల, చి “ఈందె జో మాన్సు!” మెన, పిలాతు దెకయ్లన్.

⁶ యేసుక దెకిల్ బేగి, వెల్లెల పూజర్లు చి దేముడుచి గుడిచ సయన్యమ్ సుదల్ కిసి జల మెలె, “జోక సిలువతె గల మొర్తి సిచ్చ కెరు! సిలువతె గలు!” మెన ఒర్నిల. జేవ్ దస్సి జతికయ్, “తుమి కడన సిలువతె గల! ఈంజొ కిచ్చొ నేరిమ్ నే కెర్లి రితి అంక డీస్తయ్. జా పూచి నెసి!” మెన పిలాతు సంగిలన్.

⁷ యూదుల్చ వెల్లెల మాన్సుల్ జోక కిచ్చొ జబాబ్ దిల మెలె, “అమ్క దేముడు మోసె తెన్ దిలి ఆగ్గుల్ అస్సె. జా ఆగ్గు కిసిచి మెలె, అమ్చొ దేముడు తెన్ కో జలెకు సమ్మందుమ్ సంగనై, ‘వెల్లి పాపుమ్ కెర అస్సె’ మెన, జో మాన్సు మొర్తి సిచ్చ జంక అస్సె. ఈంజొ, జలె, ‘దేముడుచొ పుత్తుసి ఆవ్’ మెనన, జయ్యి పాపుమ్ కెర అస్సె, చి మొర్తి సిచ్చ జో జంక అస్సె!” మెన వెల్లెల మాన్సుల్ సంగిల.

పిలాతు యేసుక అన్నె పరిచ్చ కెర్లిసి

⁸ పిలాతు, జలె, జేవ్ కొడొ నూన, బలె కీబియఁ గెచ్చ, యేసుక అన్నె కడన, ⁹ జా మేడచి తెడి అన్నె పెన, జోక, “తుయి కేనె తెంతో అయిలది?” మెన పుసిలన్. గని యేసు తుక్కెతా జబాబ్ దెయె నాయ్.

† 19:2 19:2 ఎరన చి నీలిమ్ రంగు బెదయ్లె, ఊద రంగు జయెదె. సార్ రంగు, § 19:8 19:8 పిలాతుచొ అదికారి జలొ రోమ్ దేసిమ్చొ కైసర్ రానొ, జలె, ఎత్తి అదికారుమ్ తిలొ దేముడుక సమ్మందుమ్ సంగితయ్ కి, చి ‘జేక అమ్చి రోమ్చి అదికారుమ్చి ఉప్పిరి అన్నె విరోదుమ్ దెకవుల’ మెన, ‘అంక కి జా విరోదుమ్ దెకవుల’ మెన జో పిలాతు బియఁ తయెదె.

10 తుక్కె తతికయ్, పిలాతు జోక, “తుయి కిచ్చొక అంచి తెన్ లట్టబ్బి నాయ్? తుక విడ్డల్ కెరుక జవున్, నెంజిలె మొర్తి సిచ్చు దా సిలువతె గలుక జవున్, అంక అదికారుమ్ అస్సె మెన తుయి నేన్సి గే?” మెన సంగిలన్. 11 జో దస్సి సంగితికయ్, యేసు జోక కిచ్చొ జబాబ్ దిలన్ మెలె, “జా అదికారుమ్, జలె, దేముడు తుక దెతో నాయ్, జలె, అంచి ఉప్పిరి తుక కిచ్చొ అదికారుమ్ తత్తి నాయ్. గని, తుయి ఇన్నె ఏలువ కెరుక నాయిమ్. జాకయ్, తూయి అప్పె కెర్తినచి పాపుమ్ తొక్కి. తుచి అత్తి అంక సార్పు కెర్లసచి పాపుమ్ ఒగ్గరి!” మెన పిలాతుక యేసు సంగిలన్.

యూదుల్చ అత్తి పిలాతు యేసుక సార్పు కెర్తిసి

12 తెదొడి, యేసుక విడ్డల్ కెరుక మెన పిలాతు ఇస్టుమ్ జా, యూదుల్చ వెల్లెల మాన్సుల్ తిలిన్తె అన్నె బార్ జా, జోవయింక సంగిలన్, గని జేవ్ పిలాతుక కిచ్చొ మెన బియడ్ల మెలె, “ఎక్కిలో ‘రానొ’ మెనన్లె, జో తుచొ అదికారి జలొ రోమ్ దేసిమ్చొ *కైసర్ రానొక యుద్దుమ్ కెర్తి రితి జయెదె, చి దసొ మాన్సుక తుయి విడ్డల్ కెర్లె, ‘కైసర్క విరోదుమ్ జలొ’ మెన తుచి రిసొ కి నేరిమ్ వయడుక జయెదె” మెన పిలాతుక బియడ్ల.

13 జేవ్ కొడొ సంగ పిలాతుక దస్సి బియడ్డికయ్, ఒత్త జేవ్ తిలిన్తె పిలాతు యేసుక అన్నె బార్ కెరవ, మేడచి పురెచి నదె తిలి తీర్పు కెర్తి టాన్తె వెసిలన్. సద్దుర్క ‘గబ్బతా’ మెన యూదుల్చి ఎబ్రీ బాస తెన్ సంగుల. 14 ఈంజ కెయె జర్గు జలి మెలె, యూదుల్చి పస్కా పండుగ్కచి సెలవ్ కడన్లి తెయార్ కెర్తి అగ్గె దీసి, పాసి పాసి మెద్దెనె. పిలాతు, జలె, యేసుక అన్నె దెకవ, “అల్లె, తుమ్చొ రానొ, ఈంజొ!” మెన యూదుల్చ వెల్లెల మాన్సుల్క సంగిలన్. 15 జేవ్, “జోక అమ్చొ రానొ మెంతసి గె? జో గెస్సు! మొర్పు! సిలువతె గలు!” మెన ఒర్పిల. జేవ్ దస్సి జతికయ్, పిలాతు జోవయింక అన్నె, “తుమ్చొ

* 19:12 19:12 ‘కైసర్’ నెంజిలె ‘వెల్లొ రానొ’ మెనుల. ‘సీజరు’ మెలె, ఇంగ్లన్ తెన్ బెదితి కోడు, ‘కైసర్’ మెలె, గ్రీకు బాస తెన్ బెదితి కోడు, ‘వెల్లొ రానొ’ మెలె, తెలుగు తెన్ బెదితి కోడు.

రానొక ఆవ్ సిలువతె గల మారుక గే?” మెన జోవయింక కొంకడ్లన్. చి వెల్లెల పూజర్లు కిచ్చొ మెల మెలె, “ఎక్కి కైసర్ అమ్క రానొ. అన్నె కొ నాయ్!” మెన సంగిల. ¹⁶ జేవ్ దస్సి సంగితికయ్, యేసుక సిలువతె గల మొర్తి సిచ్చ కెర్తి సెలవ్ దా, జోక జోవయించి అత్తి పిలాతు సొర్ప కెర దిలన్. తెదొడి జమాన్లు యేసుక దెర నిల.

యేసుక సిలువతె గల మార్గిసి

(మత్త 27:32-44; మార్కు 15:21-32; లూకా 23:26-43)

¹⁷ తెదొడి, సిలువతె గల మారుక మెన, యేసుక దెర్ల, చి జోక గల్లి సిలువ జొయ్యి వయన బార్ జా, ‘గొల్లోతా’ మెలి మెట్టయ్ ఉట్టు గెల. ఎబ్రీ బాస తెన్ జా నావ్చి అర్దుమ్ కిచ్చొ మెలె, ‘గిడ్డి పొలికచి టాన్’. ¹⁸ ఒత్త, జా †సిలువతె జోక గల, జోచి ‡అత్తోచట్టోతె మేకుల్ పెట, సిలువతె టీచడ రోవల. యేసుచి సిలువ నెడిమి రోవ, జోచి డెబ్బి పక్క ఎక్కిలోక, ఉజెతో పక్క అన్నెక్కోక, దొగుల చోర్లుక కి దస ఎక్కెక్ సిలువల్తె గల, దస్సి టీచడ్ల.

¹⁹ ‘యేసుచి సిలువచి బొడి గల’ మెన పిలాతు ఏక్ దార్చిగండతె రెగ్డయిలన్. కిచ్చొ రెగ్డయిలన్ మెలె, “నజరేతు గవ్వెచొ యేసు, ఈంజొ యూదుల్చొ రానొ జయెదె” మెన రెగ్డయిలన్. ²⁰ యేసుక సిలువతె గలిలి టాన్, జలె, యెరూసలేమ్ పట్టుమ్చి పాసిచి రిసా, యూదుల్ ఒగ్గర్జిన జా వాట్ గెచ్చుక జెంక జతె తిల, చి జా దార్చిగండతె కొడొ సదు కెర్ల. తిన్ని బాసల్ తెన్ కి పిలాతు జా దార్చిగండతె రెగ్డవ తిలొ, జోవయించి సొంత ఎబ్రీ బాస తెన్ కి, రోమ దేసిమ్చి లాటిన్ బాస తెన్ కి, పడ్డొ ఒగ్గర్ బియ్యారి కెర్తి గ్రీకు దేసిమ్చి గ్రీకు బాస తెన్ కి, రెగ్డవ తిలన్. దస్సి తిలె, కో అయ్లె కి అర్దుమ్

† 19:18 19:18 ‘సిలువ’ కిసి తయెదె మెలె, ఏక్ టీచేతి చి ఏక్ అడ్డుమ్ జతి దొన్ని డేడివొ రిత డండల్ బెదవుల. జా సిచ్చ జతో మాన్సుక జా సిలువతె ఎంగ్లవ కెర, జోవయించ అత్తి చట్టొ చంపొ కెరవ అత్తోచట్టోతె మేకుల్ పెట, నెంజలె వాలివొ తెన్ బంద, సిలువ బుయ్యె టీచ రోవ కెర, దస్సి ములుల. జో సిచ్చ జతోసా దస్సి ఒడొయ్ జా మొరెదె. ‡ 19:18 19:18 యోహాను 20:20, 25. లూకా 24:39.

కెరనుల, గెద, 21 చి 'జా దార్చిగండ దెకితస అమ్క ఆనుల' మెన యూదుల్చ వెల్లెల మాన్సుల్క లాజు, కోపుమ్, చి రిసా, జోవయించ వెల్లెల పూజర్లు పిలాతుతె గెచ్చ, " 'యూదుల్చొ రానొ జయెదె' మెన రెగుడుక కిచ్చొక? జా పోని, గని 'యూదుల్చొ రానొ ఆవ్ మెన ఈంజొ మాన్సు సంగన్లొ' మెన రెగుడు!" మెన పిలాతుక సంగిల. 22 గని పిలాతు, "ఆవ్ రెగ్గయిలిసి ఆవ్ రెగ్గవ అస్సి. దస్సి తవును" మెన, మార్పుప కెరె నాయ్.

యేసుచ పాలల్ సయ్న్యమ్ సుదల్ వంటన్నిసి

23 సయ్న్యమ్ సుదల్, జలె, యేసుక సిలువతె గల టీవడ్డి పడ్డె, జోచ పాలల్క చెత్తర్ వాటల్ కెర, వంటన్ల. జోచి దిగిల్ సొక్క కి తిలి, గని కుటు నెంతె వీన్లొ పాలుమ్ జా, చి దస్సి వంటనుక నెంజిలి. 24 జాక, "జా పాలుమ్ చిరుక పోని. చీటి గలుమ, చి కక్క సేడెదె గే, దెకుమ" మెన చీటి గలిల. కిచ్చొక ఇసి జర్లు జలి మెలె, దేముడు పూర్లుమ్ రెగ్గయిలి కోడు నెరవెర్పుప జంకయ్ ఇసి జలి.

"అంచ పాలల్ వంటనుల, చి అంచొ ఏక్ పాలుమ్క చీటి గలుల" మెన రెగిడ్డి కోడు.

25 సయ్న్యమ్ సుదల్, జలె, యేసుచ పాలల్క ఆస జా దస్సి కెర్ల, గని యేసుచి అయ్యసి, పడ్డె క్లోప మెలొ ఎక్కిలొచి తేర్ని మరియ, యేసుచి అయ్యస్చి అప్పుసి జయెదె, యేసుక పెద్దయసి జయెదె, పడ్డె మగ్గల పట్నమ్చి మరియ కి, జేవ్ తేర్బోదల్ యేసుచి సిలువచి పాసి టీవఁ అస్సి.

26 జలె, యేసు అయ్యస్క దెకిలన్, చి జో ఒగ్గర్ ప్రేమ కెర్లొ సిస్సుడు కి ఒత్త టీవ అస్సె మెన దెకిలన్, చి జో సిస్సుడుక దెకవ అయ్యస్క "ఓదె, తుచొ పుత్తుది!" మెన సంగ, 27 అయ్యస్క దెకవ, జో సిస్సుడుక "ఈందె, తుచి అయ్యది!" మెన సంగిలన్. జాక జయి గడియ తెంతొ జో సిస్సుడు దెకిత్ తంక మెన, సొర్పు కెర దిలొ, చి

జయి గడియ తెంతో జో సిన్సుడు జాక గెరి కడన, 'అయ్య' మెన జాక పోసిలో.

యేసు మొర గెలిసి

(మత్త 27:45-56; మార్కు 15:33-41; లూకా 23:44-49)

28 తెదొడి 'అంచి కామ్ ఎత్కి కేడ గెలి' మెన యేసు జానన, "అంక తాన్ కెర్తయ్" మెన సంగిలన్. ఇన్నెతెన్ కి, దేముడు పూర్ణమ్ రెగ్డయ్లి కోడు నెరవెర్చువ జలి. 29 జలె, ఒత్త ఏక్ తప్పెలయ్ అమ్డి ద్రాచ రస్సుమ్ తిలి, చి ఏక్ బూంజు రితిసి జా రస్సుమ్తె బుడ్డవ కెర, ఏక్ రివ్వతె దెరవ కెర, యేసు చుప్పిర్తి రితి ఒత్తవ నయ్న్యుమ్ సుదల్ చంపొ కెర్ల. 30 జలె, యేసు జా రస్సుమ్ చుప్త కెర, "కీఅంచి కామ్ పూర్తి జలి" మెన సంగ, బోడి వంపొ కెర, జోచి ప్రానుమ్ దేముడు అబ్బోన్చి అత్తి సార్ప కెర దా, మొర గెలన్.

31 జా దీసి తెయార్ జతి దీసి. అన్నెక్ దీసి, సెలవ్ కడన్లి దీసి, 'మొర్త పీనుమ్లు సిలువల్తె తా గెలె గారు' మెన, 'బేగి మొర్తి చి అగ్గెయ్ ఉత్తవ వెంట గెలుక జయెదె' మెన, యూదుల్చ వెల్లెల మాన్సుల్ పిలాతుతె గెచ్చ కెర, "సిలువల్తె గలిలనచ చట్టో బగయ్తు, చి పీనుమ్ల్క ఉత్తవ దా బేగి వెంట గెల్తు" మెన సెలవ్ నజిల, చి పిలాతు సెలవ్ దిలన్.

32 జాకయ్, నయ్న్యుమ్ సుదల్ గెచ్చ కెర, తొలితో ఎక్కిలోచ పడ్డొ అన్నెక్కోచ, యేసు తెన్ బెద సిలువల్తె గలిల దొగుల చోర్లచ చట్టో బగవ గెల. 33 గని, యేసుతె అయ్లె, 'నాయ్, అగ్గెయి మొర గెచ్చ అస్సె' మెన దెక, జోక చట్టో బగయితి నాయ్. 34 గని, జోవయింతె ఎక్కిలో యేసుక ఈంటె తెన్ పక్కయ్ బూసిలన్. బూసిల్ బేగి, లోయి కి పాని కి నూయి జలి.

§ 19:30 19:30 జో ఈంజ లోకుమ్తె బుల బుల దేముడు అబ్బోన్చి ప్రేమ అదికారుమ్ దెకయ్లిన్చి కామ్ ఇన్నెతెన్ కేడ్లి, గని అన్నె కిచ్చొ ముక్కిమ్చి జోవయిన్చి కామ్ ఇన్నెతెన్ కేడ్లి మెర, జో పాపల్ గెచ్చయ్తి దొర్కు జలి అర్పితుమ్ జలిసి, పస్కా వండుగ్చొ మెండపిల్ల జలిసి.

35 తుమ్ ఈంజ సదు కెర్తస కి నూన్తస కి, తుమ్క 'జేవ్ కి పూర్తి నంపజతు' మెనయ్ జా ఎత్కి *దెకిలోసా జోచి సాచి సంగ అస్సె. జో సంగిలి సాచి సత్తిమ్, చి 'సత్తిమ్' మెన జో కచితుమ్ జానె. 36 ఈంజ కిచ్చొక ఇసి జర్గు జలి మెలె, ఇన్నెతెన్ దేముడు పూర్ణమ్ రెగ్డయ్లి కోడు నెరవెర్పువ జలి.

“జో అర్పితుమ్ జలోసాతె కేన్ ఆడు కి బగయితి నాయ్”

మెన రెగిడ్డి కోడు, చి

37 “జేవ్ బూసిలోసాక జేవ్ దెక ఉచరుల”
మెన అన్నెక్ కోడు అస్సె.

యేసుచి పీనుమ్ మెన్సున్తె ఎంగ్డవ దిలిసి

38 యూదుల్చ వెల్లెల మాన్సుల్తె ఎక్కిలో, అరిమతయ్ మెలి గెవ్వెచో యోసేపు మెలోసా, జో, జలె, యేసుచ సిస్సుడు, గని అన్నె వెల్లెల మాన్సుల్క బియఁ కెర, ఎదార్లుమ్ ఒప్పనె నాయ్. లుంకచోరు యేసుక సిస్సుడ్ రిత్తి జా అస్సె. జో, జలె, అప్పె పురె జా పిలాతుతె గెచ్చ కెర, “యేసుచి పీనుమ్ కావలె. దెర గెచ్చుమదే” మెన సంగితికయ్, పిలాతు సెలవ్ దిలో, చి పీనుమ్ దెర గెచ్చుక మెన, సిలువ తిలిన్తె అయ్లో. 39 అన్నెక్లో కి అయ్లో. కొన్సొ మెలె, నీకొదేమొ మెలో పరినయ్యుడు. యేసుచి బోదన నూనుక మెన, ఒగ్గర్ ఆగ్గెయ్ రాతి, లుంకచోరు యేసుతె జా తిలోసా జోయ్యి. జో, జలె, అప్పె ఒగ్గర్ విలువ తిలి వాసెన సామన్ దెరన అయ్లో. జా వాసెన సామన్ కెర్ది జాడుచి మెలె, పాసి పాసి యాబయ్ కేజిల్ చి జాడు.

40 జేవ్ దొగుల, జలె, యూదుల్ కెర్తి అలవాట్ కెర, వెల్లో గండల్ విలువ బట్ట తెన్ జా వాసెన సామన్ బెదవ బెదవ, పీనుమ్క గుడియవ బందిల. పీనుమ్క దస్సి తెయార్ కెర మెస్సె వయ నిల.

41 యేసుక సిలువతె గలిలి టాన్చి పాసి, జలె, ఏక్ తోట అస్సె. జా తోటతె సాప్రయ్ డొల్మి కెర్లి గది తిలి రితి నోవి మెన్సున్ అస్సె. కక్క నే

* 19:35 19:35 'జా ఎత్కి దెకిలోసా' మెన ఏక్ వేల ఈంజ పున్సుకుమ్ రెగిడ్డి యోహాను సాంతచి రిసా సంగితయ్.

రోవెలిసి. ⁴² సెలవ్ కడన్లి దీసిక చి పండుగు దీసిక జా దీసి తెయార్ జతి దీసి రిసా 'దూరి వయుక గారు' మెన యూదుల్ సంగులచి రిసా, జా మెస్సున్ పాసి తతికయ్, యేసుచి పీనుమ్ ఒత్తయ్ తెడి ఎంగ్గవ దిల.

20

మెస్సున్ డంపితి పత్తురు ఒస్సుల్ జా తిలిసి
(మత్త 28:1-10; మార్కు 16:1-8; లూకా 24:1-12)

¹ యేసుక విరోదుమ్ సుదల్ మార తిర్తక, *అయ్తర్ దీసి పెందలె, మగ్గల పట్టుమ్చి మరియ మెస్సె అయ్లి. అయ్లె, కిచ్చొ దెకిలి మెలె, సాప్రయ్ డొల్లి కెర్లి మెస్సున్క డంక తిలొ పత్తురు కీసి గే ఒస్సుల్ జా అస్సె. ² ఇసి జా అస్సె మెన దెక, బమ్మ జా, సీమోను పేతురు చి యేసు ఒగ్గర్ ప్రేమ కెర్లొ జో అన్నెక్లొ సిస్సుడు దొగుల ఎక్కితె తిలిన్తె మరియ నిగ గెచ్చ, "యేసు ప్రబుచొ పీనుమ్ మెస్సున్ తెంతొ ఉక్లన అస్తి, చి జోక కేనె అన్నె ముల దా అస్తి గే నేనుమ్" మెన జోవయింక సంగిలి.

యేసు జీవ్ జా ఉట్టిన్చి రుజ్జు అయ్లిసి

³ జా మరియ దస్సి సంగితికయ్, పేతురు, జో అన్నెక్లొ సిస్సుడు మెస్సె గెచ్చుక మెన బార్ జల. ⁴ జేవ్ దొగుల నిగ గెలె, జో అన్నెక్లొ సిస్సుడు బేగి నిగ, పేతురుచి కంట తొలితొ మెస్సె పావెలన్. ⁵ ఈంజొ తొలితొ పావ, వంపొ జా తెడి ఒయర దెకిలె, రితయ్ బట్ట గండల్ ఒత్త నేడ అస్తి మెన దెకిలన్, గని తెడి పెసె నాయ్.

⁶ తెదొడి, జోవయించి పడ్డొ సీమోను పేతురు నిగ జా పావెలన్, చి మెస్సున్ తెడిక పెసిలన్. రితయ్ బట్ట గండల్ ఒత్త నేడ అస్సె. ⁷ చి జేవ్ గండల్క ఇదిల్ దూరిక, యేసుచి బోడి బంద తిలి బట్ట గండ, గుడియయ్ జలి రితి జా, అజ నేడ అస్సె. ⁸ తెదొడి, జో అన్నెక్లొ

* 20:1 20:1 సత్తు పాదుల్తె అగేచి దీసి

సిస్సుడు కి, మెలె, మెన్నె తొలితో పావిలోసా, మెన్సున్ తెడి పెన దెక, యేసుక 'జీవ్ జా ఉట్ట అస్సె' మెన, నంపజలన్.

9 యేసుక "మొర జీవ్ జా ఉట్టక అస్సె"

మెన అగ్గెయ్ తెంతో దేముడు రెద్దవ తిలిసి సిస్సుల్ తెదొడి ఉచార అర్దుమ్ కెరనుక నేతయ్. 10 జలె, దెక కెర, యేసుక 'జీవ్ జా ఉట్ట అస్సె' మెన నంపజా, జేవ్ దొగుల సిస్సుల్ జోవయించ గెరలె ఉట్ట గెల.

మగ్గల పట్టుమ్చి మరియుక యేసు డీసిలిసి
(మార్కు 16:9-11)

11 మదెనె మగ్గల పట్టుమ్చి మరియు, ఏడ ఏడ మెన్నెచి బయిలె టీవ అస్సె. తెదొడి, ఏడ ఏడ, మెన్నెచి తెడి ఒయర్తి రిసా వంపొ జలి. 12 ఒయర్లె, కిచ్చొ దెకిలి మెలె, చొక్కెల పాలల్ గలన తిల దొగుల దూతల్ యేసుచి పీనుమ్ అగ్గె ఎంగ్డ తిలిన్తె దెకిలి. యేసుచి బోడి అగ్గె తిలిన్తె ఎక్కిలో, చట్టొ అగ్గె తిలిన్తె ఎక్కిలో వెన అస్తి. 13 ఈంజేవ్ జాక "అమ్మ, కిచ్చొక ఏడ్తసి?" మెన సంగిల. చి జా జోవయింక "అంచొ ప్రబుక దెర గెచ్చు అస్తి, చి జోక కేనె అన్నె ముల దా అస్తి గే నేని" మెన సంగిలి. 14 దస్సి మెన సంగ, కీసిగె పడ్డొ పసిలి, చి యేసు ఒత్తయ్ టీవ తిలిసి దెకిలి. గని 'జొయ్యి' మెన చినుక నెత్త గెలి.

15 యేసు జలె, జాక "అమ్మ, కిచ్చొక ఏడ్తసి? కక్క చజితసి?" మెన సంగిలన్. జా, జోక 'తోట రూకుల్ పొస్తాసా' మెన ఉచర, జోక "బాబు, తూయి జలెకు జోక ఉక్కుల వేరతె నిలది జలె, జోక కేనె ముల దా అస్సిన్ గే, అంక సంగు, చి ఆవ్ జోచి పీనుమ్ దెర గెచ్చు రోవిందె" మెన సంగిలి. సంగితికయ్, 16 యేసు జాక "మరియ!" మెన, ఎక్కి జాచి నావ్ సంగిలన్. సంగిల్ బేగి జా, జోక చిన పసుల, "రబ్బోనీ!" మెన సంగిలి. అరమయ్ బాసతె 'రబ్బోనీ' మెలె, 'గురు' మెలి అర్దుమ్ తయెదె.

17 యేసు, జలె, జాక, “అంక చడు నాయ్. ఆవ్ అన్నె దేముడు అబ్బొతె వెగ గెచ్చుక నేతయ్. గని, తుయి కిచ్చొ కెరుక జయెదె మెలె, అంచ బావుడ్లు జల అంచ సిస్సుల్తె గో, చి పరలోకుమ్ తిలొ తుమ్చో దేముడు తుమ్చో అబ్బొది జలొ అంచో దేముడు అంచో అబ్బొతె ఆవ్ ఉట్ట గెతసి మెన యేసుప్రబు సంగిలన్ మెన సంగు” మెన, జాచి అత్తి జోచ సిస్సుల్క కబుర్ తెద్రయ్లన్.

18 జాకయ్, మగ్గల పట్టుమ్చి జా మరియ, యేసుచ సిస్సుల్తె గెచ్చు, “యేసుప్రబుక దెక అస్సి!” మెన సంగ, జో సంగిలి కబుర్ ఎత్తి జోవయింక సంగిలి.

యేసు జోచ సిస్సుల్క డీసిలిసి

19 జా దీసి సంజె, నత్తరెక్క తొల్లి దీసి, మెలె యేసు జీవ్ జలి జా †అయ్తర్ దీసి సంజె, సిస్సుల్ ఎక్కితె బెర తిల. గని యూదుల్చ వెల్లెల మాన్సుల్క బియఁ కెర, కెప్పివొ డంపన లుంకిల్ రితి తిల. జేవ్ దస్సి బిలి రితి జా ఒత్త కెప్పివొ డంపన తతికయ్, యేసు జా కెర, జోవయించి నెడిమి టీవ, “తుమ్క సేంతుమ్ తవుసు!” మెన ఉంక్రయ్లన్. 20 దస్సి ఉంక్రవ కెర, ‘అవ్వి’ మెన దెకయ్తి రిసొ, సిలువతె గలిలి పొది మేకుల్ అత్తితె పెట్టినచి మచ్చల్, పక్కయ్ బూసిలిన్చి మచ్చ, జోవయింక దెకయ్లన్, చి జేవ్, ‘యేసుప్రబు’ మెన జోక చిన, నర్దసంతోసుమ్ జల.

21 యేసు, జలె, జోవయింక అన్నె, “అంచి సేంతుమ్ తుమ్చి పెట్టి తవుసు. పరలోకుమ్ తిలొ దేముడు అబ్బొ ఈంజ లోకుమ్తె అంక కీసి తెద్రయ్లన్ గే, దస్సి ఈంజ లోకుమ్చ మాన్సుల్తె తుమ్క ఆవ్ తెద్రయ్తసి” మెన సంగిలన్. 22 ఇసి సంగ కెర, జోవయించి ఉప్పిరి పుజ దా, “దేముడుచి నుద్ది తిలి ఆత్మ తుమ్క ఆవ్ దెతసి. నజనా. 23 కచ పాపల్ తుమ్ చెమించుప కెర్తె గే, చెమించుప జా అస్సి. కచ పాపల్ చెమించుప నే జతి రితి తుమ్ కెర్తె గే, జా పాపుమ్ జోవయింక తయెదె” మెన సంగ యేసు ఉట్ట గెలన్.

† 20:19 20:19 సత్తు పాదుల్తె అగేచి దీసి

24 యేసు జా సుట్టు సిస్సుల్ క డీసిలిసి, జలె, 'కల్వల్ తె జెర్మిలోసా' మెన ఆసిమ్ నావ్ తిలో తోమా మెలోసా ఒత్త నాయ్. 25 చి జో తెన్ దస్సుల్ జలి పొది "యేసుప్రబుక దెకిలమ్!" మెన తిల సిస్సుల్ సంగిల. గని, తోమా జోవయింక, "జో జివ్ జా తిలె, అంక రుజ్జు దెకాయిత. జోచ అత్తోతె దెకిలె, ఒత్త మేకుల్ పెట్ల మచ్చల్ తిలెకయ్, జేవ్ మచ్చల్ ఆవ్ చడ దెకిలెకయ్, పడ్డో జేవ్ జోక పక్కయ్ బూసిలిన్ తెడి ఆవ్ సొంత ఆతు గల దెకిలెకయ్, 'జొయ్యి' మెన నంపజయిందె" మెలన్.

26 జలె, ఒత్త తెంతో అన్నె అట్టు పొదుల్ గెతికయ్, యేసుచ సిస్సుల్ జా గెరి అన్నె అస్తి. గని, ఈంజ సుటు తోమా కి జోవయింతెన్ అస్సె. జా సుట్టుచి రితి జేవ్ కెప్పివో డంపన తిలె కి, యేసు జా జోవయించి నెడిమి టీచ, జోవయింక "తుమ్క సేంతుమ్ తవుసు!" మెన ఉంక్రయ్ లన్.

27 తెదొడి, తోమాక దెక, "తుచి ఊంటి చంప కెర, అంచ అత్తో చడ దెకు! తుచి ఆతు చంప కెర, అంచ పక్కయ్ బూసిలిన్ చి తెడి గల దెకు! అన్మానుమ్ జా నాయ్. నంపజా దయిరిమ్ జా!" మెన, యేసు జోక సంగిలన్. 28 తోమా సర్దసంతోసుమ్ జా, "అంచొ ప్రబు, అంచొ దేముడు!" మెన పూర్తి నముకుమ్ జా సంగిలన్. 29 జాకయ్ యేసు జోక, "అంక దెకిలి రిసా తుయి నంపజలది. అంక నే దెకిలెకి కో అంక నంపజవుల గే, జోక చెంగిలి!" మెన సంగిలన్.

30 ఇన్నె రెగిడ్లనచి కంట, జోచి అదికారుమ్ దెకయ్ త వెల్లెల కమొ ఒగ్గరి యేసు జోచ సిస్సుల్ చి మొక్కె కెర్లన్, గని మొత్తుమ్ తె ఎత్లయి రెడ్డ అస్సి. 31 ఈంజేవ్, జలె, కిచ్చొక రెడ్డ అస్సి మెలె, యేసుక 'నిజుమి దేముడు తెద్రయ్ లో రచ్చించుప కెర్లొసా క్రిస్తు జో' మెన తుమ్క 'నంపజతు' మెనయ్ రెడ్డ అస్సి. తూమ్ కి నదు కెర్లస నూన్ తన నంపజలె, తూమ్ కి యేసుప్రబుచి దయచి రిసా జోచి జివ్క జియ, పరలోకుమ్ చి రాజిమ్ తె బెదితె.

యేసు సిస్సుల్ క అన్నె డీసిలిసి

1 యేసు సిస్సుల్ క డీస అన్నె సగుమ్ దీసల్ గెలి వడ్డో, తిబెరియ సముద్రుమ్ తె, మెలె గలిలయ తెచి సముద్రుమ్ రితి గడ్డె, జోచ సిస్సుల్ సగుమ్ జిన్ తతికయ్, యేసు జోవయింక అన్నె డీస జో జీవ్ జలిన్ క జోచి అదికారుమ్ క రుజ్జు దెకయ్ లన్. ఇసి జర్గు జలి.

2 ఏక్ దీసి, సీమోను పేతురు, 'కల్వల్ తె జెర్మిలోసా' మెన ఆసిమ్ నావ్ తిలో తోమా, జా గలిలయ ప్రాంతుమ్ చి కానా గవ్విచో నతనియేలు, జెబెదయి మెలోసాచ దోగుల పుత్తర్పుల్, చి అన్నె దోగుల సిస్సుల్, మొత్తుమ్ సత్తుజిన్, ఎక్కి తె తిల, చి ³ "ఆవ్ మొస్సు దెరుక గెతసి" మెన సీమోను పేతురు సంగ బార్ జంక దెర్రికయ్, తిల సిస్సుల్ "ఆమ్ కి బెద జెమ్ దె!" మెన సంగిల. జేవ్ ఎత్కి జిన్ బార్ జా, జోవయించి దోని తె వెగ, మొస్సు దెరుక గెల. గని జయి రాతి ఎక్కి మొస్సా కి దెర్రి నాయ్.

4 గని, రాత్ పయి తె తతికయ్, ఒత్త ఒడ్డు తె యేసు టీవ అస్సె. గని 'యేసు' మెన సిస్సుల్ చినితి నాయ్. ⁵ జో, జలె, జోవయింక కేక్ గల, "ఓ గోతునుదల్, మొస్సు దెర అస్సున్ గే?" మెన పునిలన్. చి "నాయ్, బాబు, కిచ్చోయ్ నాయ్!" మెన జబాబ్ దా కేక్ గల.

6 యేసు, జలె, జోవయింక కిచ్చో సంగిలన్ మెలె, "దోనిచి ఉజెతో పక్కయ్ వల గల, చి దోర్కు జవుల!" మెన కేక్ గలన్, చి జో సంగిల్ రితి జయ్యి పక్క వల గలిల. గలిలె, ఎత్తివాట్ మొస్సు బెర తిలి రిసా వల కడుక నెత్తిర్.

7 దస్సి జతికయ్, యేసు ఒగ్గర్ ప్రేమ కెర్లొ సిస్సుడు జోక చిన కెర, "అమ్చో యేసుప్రబు, జో!" మెన పేతురుక సంగిలన్. జోక 'అమ్చో యేసుప్రబు' మెన సీమోను పేతురు సూన్లి బేగి, కామ్చి రిసా జో కడ తిలి సొక్క అన్నె గలన, సముద్రుమ్ తె డేవ, యేసు తె గెలన్. ⁸ గని, తిల సిస్సుల్ దోని తె తా, మొస్సు బెర తిలి వల ఒగ్గొడ ఆన, పడ్డో అయ్ ల. ఒగ్గర్ దూరి జెంక నాయ్. ఒడ్డు తెంతో పాసి పాసి ఎక్కి పుంజెక్ గజాలు దూరి తిల.

9 జలె, ఒడ్డుతె అయ్లె కిచ్చొ దెకిల మెలె, ఒత్త మెసి బొగుల్చి ఆగి తిలి, చి ఆగితె మొస్స సిజితె తిల. పోడియొ కి తిల. 10 తెదొడి యేసు జోవయింక “తుమ్ అప్పె దెర్ల మొస్స సగుమ్ ఆన” మెలన్, 11 చి సీమోను పేతురు దోనితె అన్నె వెగ, వల ఒడ్డుతె ఒర్గొడ ఆన్లన్. అన్నె, వెల్లెల మొస్స బెరయ్ అస్తి. కెత్తి మెలె, పుంజెక్ యాబయ్ తిన్ని వెల్లెల మొస్స. గని, ఎత్తివాట్ తిలె కి, వల చిరి జయె నాయ్.

12 “అల్లె, కంక జా,” మెన యేసు సిస్సుల్క బుకార్లన్. జేవ్ సిస్సుల్తె జలె, “తుయి కో?” మెన కో కి జోక పుసుక దయిరిమ్ నాయ్. జోక ‘యేసుప్రబు’ మెన జాన్తి. 13 జేవ్ దస్సి ఇదిల్ బితె తతికయ్, యేసు పురై జా, పోడియొ వెంట, వంట దిలన్. దస్సి మొస్స కి వెంట, వంట దిలన్.

14 యేసు మొర జీవ్ జా ఉట్ట సిస్సుల్క డీసిలిసి ఇన్నెతెన్ తివ్వెర్ జలి.

పేతురుక యేసు చెమించుప కెర్తిసి

15 జేవ్ * అన్నిమ్ కెర కేడయ్లి వడ్డొ, సీమోను పేతురుక యేసు బుకారా, ఇదిల్ దూరి కడన, జోక ఇసి మెలన్. “ఓ సీమోను, యోహానుచొ పుత్తుసి, ఇన్నెచి కంట అంక తుయి ఒగ్గర్ ప్రేమ కెర్తసి గే?” మెన పుసిలన్. పుసిలె, పేతురు “ఒయ్యి, ప్రబు, ఆవ్ తుక ప్రేమ కెర్తిసి తుయి జాన్సి” మెలన్. యేసు జోక “దస్సి జలె, విలువ జల మెండ పిల్లల్క చెంగిల్ అన్నిమ్ గొవుడు దొర్కు కెర్తె తతి రితి తా!” మెన సంగిలన్.

16 పడ్డొ అన్నెక్ సుట్టు, “ఓ సీమోను, యోహానుచొ పుత్తుసి, అంక ప్రేమ కెర్తసి గే?” మెన పుసిలన్. పుసిలె, పేతురు జోక అన్నె, “ఒయ్యి, ప్రబు, ఆవ్ తుక ప్రేమ కెర్తిసి తుయి జాన్సి” మెన సంగిలన్. యేసు జోక అన్నె, “దస్సి జలె, విలువ జల మెండల్క చెంగిల్ రకిత్ రితి తుయి దెకితె తా!” మెన సంగిలన్.

* 21:15 21:15 యూదుల్ చింబొ కతి నాయ్. ముక్కిమ్క పోడియొ కవుల.

17 తెదోడి అన్నెక్ సుట్టు కి, పేతురుక యేసు పుసిలన్. “ఓ సీమోను, యోహానుచో పుత్తుసి, అంక ప్రేమ కెర్తసి గే?” మెన అన్నె పుసితికయ్, ‘అంక ప్రేమ కెర్తసి గే?’ మెన యేసు పుసిలిసి అప్పె తివ్వోర్ జలి రిసా, పేతురు మెన్సు ఒగ్గర్ దుకుమ్ జలన్, చి “ప్రబు, తుయి ఎత్తి జాన్చి. ఆవ్ తుక ప్రేమ కెర్తసి తుయి దెకితసి!” మెన అన్నె సంగిలన్, చి యేసు జోక “విలువ జల మెండల్క సరి జతి అన్నిమ్ దొర్కు కెర్లి రితి తుయి తా.

18 “తుక ఆవ్ అన్నె కిచ్చో కచితుమ్ సంగితసి మెలె, తుయి ఉబెడోబోద తిలి పొది, తుకయ్ తూయి తెయార్ కెరన, ఇస్టుమ్ అయ్లి రితి బుల్తె తిలది, గని తుయి మంత్రో జలె పొది కీసి జస్తె మెలె, తుచ అత్తో చంపొ కెర్తె, చి వేర సుదో తుక తెయార్ కెరెదె. చి తుయి ఇస్టుమ్ నెంజిలిన్తె తుక వయ నెయెదె” మెన పేతురుక యేసు సంగిలన్. 19 కిచ్చోక దస్సి సంగిలన్ మెలె, పేతురు మంత్రో జలె పొది, విరోదుమ్ సుదల్ జోక †మారుల. దస్సి జయెదె మెలి గుర్తుకయ్ యేసు దస్సి మెలన్. జలె, ఒత్త తెంతో యేసు పేతురుక, ‡“అంచి పట్టి జే!” మెలన్.

20 తెదోడి పేతురు పన్ల, యేసు ఒగ్గర్ ప్రేమ కెర్లొ సిస్సుడు జోచి పట్టి జెతిసి దెకిలన్. కక్క మెలె, యేసు సిస్సుల్ తెన్ ఆకర్ అన్నిమ్ కెర్లి పొది, యేసుచి గుండెతె పెల వెస తిలొ సిస్సుడు. జొయ్యి, జా సుట్టు ‘తుక విరోదుమ్ సుదల్తె దెర దెతోసా కొన్నో?’ మెన యేసుక పున దిలన్.

21 పేతురు, జలె, జో సిస్సుడుక దెక కెర, “ప్రబు, ఈంజో మాన్సుక కిచ్చో జయెదె?” మెన పుసిలన్. 22 పుసితికయ్, యేసు జోక, “ఆవ్ దేముడు అబ్బొతె పరలోకుమ్తె గెచ్చు ఈంజ లోకుమ్తె అన్నె జెతె ఎదక ఈంజో తాఁ గెచ్చుక అంచి ఇస్టుమ్ జలె, తుక కిచ్చో బాద? అంచి

† 21:19 21:19 వేర పుస్తకల్తె కిచ్చో అస్సె మెలె, పడ్డో పేతురుక కీసి మార్ల మెలె, జోవయింక బోడి ఎట్టో చట్టో ఉప్పిరి ఒడొవ సిలువతె మార్ల. ‡ 21:19 21:19 క్రీస్తుచి రితి నిదానుమ్ ఇండితిసిచి కోడు, పడ్డో సిలువతె జో కి మొర్తినచి అర్దుమ్ కి ఇన్నె తయెదె.

పూచి, జా. తుచి పూచి కిచ్చొ మెలె, అవ్ తియార్లి కామ్ కెరుక. అంచి పట్టి జె!” మెలన్.

²³ జో అన్నెక్లొ సిస్సుడుచి రిసా యేసు సంగిలి జా కోడుచి రిసా సగుమ్జిన్ పడ్డొ కిచ్చొ సంగితె తిల మెలె, ‘ఈంజొ అన్నెక్లొ సిస్సుడు మొరె నాయ్’ మెంతె తిల. గని జో ‘మొరె నాయ్’ మెన యేసు సంగె నాయ్. ఎక్కి “అవ్ అన్నె జెతె ఎదక ఈంజొ తా గెచ్చుక అంచి ఇస్టుమ్ జలె, తుకయ్ కిచ్చొ బాద?” మెనయ్ సంగ తిలో.

²⁴ ఈంజ ఎత్కిచి రిసా సాచి జలొసా, ఈంజ ఎత్కిచి రిసా రెగిడ్లొసా కొన్సొ మెలె, జొయ్యి సిస్సుడు. యేసు ఒగ్గర్ ప్రేమ కెర్లొసా. జోచి సాచి సత్తిమ్ మెన జానుమ్.

²⁵ యేసు కెర్ల కమొ అన్నె ఒగ్గర్ అస్తి. జేవ్ కమొ ఎత్కిచి రిసా రెగుడుక జలె, జేవ్ కమొ ఎత్తివాట్ జవులచి రిసా జోవయించి రిసా రెగిడ్ల పుస్తకల్ ఈంజ బూలోకుమ్ దెరుక నెత్తె. తెద్దిలి.

Kupia New Testament
Kupia: Kupia New Testament (New Testament)

copyright © 2019 Wycliffe Bible Translators, Inc.

Language: (Kupia)

Contributor: SIL International (in Asia)

All rights reserved.

2020-11-18

PDF generated using Haiola and XeLaTeX on 21 Feb 2024 from source files
dated 29 Jan 2022

7ccb2690-4432-5e86-88c1-f8ee976f30f4